



UNIVERSITÄTS-
BIBLIOTHEK
PADERBORN

Universitätsbibliothek Paderborn

Monumenta Paderbornensia

Ferdinand <Paderborn, Bischof, II.>

Amstelodami, 1672

Panegyricus, Natali Die Academiae Theodoriana Paderbornensis, ...

urn:nbn:de:hbz:466:1-7830



Theodorus Furstenbergius
Episcopus Paderbornensis, et S.R.I.
electus v. Juny. An. M D LXXXV.
XVIII. et sepultus Paderbornae

Dei et Apostolicae Sedis Gratia
Princeps, natus An. M D X L Y I.
Defunctus 19. Decemb. An. M D C
in aede Cathedrali.

P A N E G Y R I C U S,
N A T A L I D I E
A C A D E M I A E T H E O D O R I A N A E
P A D E R B O R N E N S I S,
oblatus ejus munificentissimo Fundatori,
Reverendissimo atque Illustrissimo Principi,
D. T H E O D O R O
E P I S C O P O P A D E R B O R N E N S I
S. R. I. P R I N C I P I, D O M I N O, A C
P R I N C I P I C L E M E N T I S S I M O.

L I B E R I.

De Academia in VWestphalia fundata.

C A P U T I.

Proœmium.

Icet jam, Reverendissime & Illustrissime Prin-
ceps, tandem aliquando huic florentissimæ
Juventuti crumpere pressam adhuc animis,
clausamque lætitiam, & sua erga Cels. V. stu-
dia, condito amplissimo in hac Urbe opti-
marum artium domicilio jampridem inflam-
mata, publicâ gratulatione testari. Quanquam enim alterum
jam annum hoc maximo, præstantissimoque beneficio sanè
frequentes utebamur, quoniam tamen necdum publicè pro-
positis iis literis, quibus Pontifex Maximus, & Cæsar Aca-
demia nobis immunitates & jura concedunt, necessarius
a qui-

quidam splendor deerat, nos quoque gaudia ac vota nostra tantisper in hominum lucem, atque oculos proferre verebamur. At hodierno die quis jam obscurè ferat sensum animi sui, cùm ad earum litterarum promulgationem ex omnibus propè Westphaliae partibus concursus in hanc Urbem fiant? cùm tot mortales in te inhient, tibique gratias agere gestiant, à quo liberis suis potiores omni avitâ paternâque hereditate esse paratas opes intelligunt? cùm omnia DEI immortalis altaria, atque templa, perpetuam se jam tibi doctorum, praeflantiumque virorum facultatem & copiam debitura fateantur? cùm denique ipsa adeò oppida atque vici videantur, si fieri posset, ejicere se sedibus suis, atque ad hoc novum patriæ decus, hanc arcem disciplinarum, hoc munimentum avitæ religionis, seminariumque reip. coram intuendum velle pervolare? In hac communi lœtitia, atque plausu nemo non intelligit, quantum flagitiis simus admissuri, si ad quos hæc præcipue tua merita pertinent, non omnibus, quibus liuerit, gratulationis officiis perfungamur. Quanquam hic omnium ardor, atque concursus non modicam ipse per se nobis præber gratulandi materiam. Est enim primus benefaciendi fructus, non indigno beneficisse: proximus non ingratu. Quos quidem immortalis tui beneficii fructus, jam nunc, Princeps Illustrissime, te ferre sentimus, & gratulamur ex animo, quandoquidem animadvertis, te, hæc primâ Westphaliae Academiâ moliendâ non in gentem aliquam intertem, atque à Musis abhorrentem, aut magnitudini beneficii æstimandæ imparem, sumptum, atque jaçturam fecisse. Hæc enim hodierna alacritas, & faustæ precationes omnium ordinum, perinde atque in communi quadam & eximia fortunæ prosperitate gratulantum, satis ostendunt & quanto vulgo sapientiæ amore teneantur, & hoc tuum beneficium quanti omnes faciendum putent: Sed cave existimes, Princeps Illustrissime, repentinum hunc esse quandam animi impetum jam primùm tantæ rei novitate commotum. Est enim quædam indoles virtutis & sapientiæ, præclaris majorum institu-

stitutis, exemplisque corroborata, quæ animos ad bonarum artium cupiditatem sponte suâ assiduò rapit, quarum se tantam modò facultatem tuo beneficio nactos esse gloriantur. Repetenti siquidem mihi memoriam præteriti temporis, atque animo recolenti, quæ adhuc fuerit in Westphalia magnitudo ingeniorum, quis ardor discendi, quæ laborum patientia, subit in mentem mirari, quo tandem fato acciderit, ut amantissima laudabilium doctrinarum natio tam diu integrum, atque perpetuum earum emporium desiderarit. Qua de re existimavi nihil me alienum ab hujus diei splendore & lætitia esse facturum, si pauca apud Celsitud. V. verba facerem: idque ut mihi bonâ tuâ veniâ liceat, etiam atque etiam rogo. Cognosces enim ex iis quæ dicam, si omnes, qui jam inde ex eo tempore, cùm primum Westphalia veritatis Christianæ lumen aspexit, has oras tenuerunt, modò à mortuis existerent, nihil ex iis, qui nunc adsunt, de studio erga te, atque officio, nihil agendis gratiis esse concessuros. Erit deinde cur præcipuam tibi quandam felicitatem gratulemur, qui D E I singulare munere id absolveris, atque perfeceris, quod antea tot viri graves, ac sapientes vel tacitis votis optarunt, vel aliquâ duntaxat parte tentaverunt. Discet denique nostra juventus quousque jam progredi in bonarum artium studiis oporteat, tam certis, & expeditis abs te discendi præsidii comparatis, sine quibus nostri majores tantâ sunt in iis ingenii, & laborum contentione versati.

C A P U T II.

Quanti VVestphaliæ ingenia fecerit D. Carolus Magnus.

Sunt enim ita ferè comparati præstantes animi: citò arripiunt, quæcunque ad veram laudem, decusque pertinent, sibique turpe ducunt semel conspectam in pura luce veritatem mediocri ardore complecti. Neque eò contenti, simul cum veritate, omnia persequuntur, atque appetunt præsidia & adjumenta veritatis. Vix Christiana veritas Westphalis

LIBER I.

4

phalis illuxerat, cùm ita non ejus mōdō, sed etiam liberalium
artium, quarum illa comitatu plurimūm gaudet, & operā uti-
tur, amore sunt capti, ut brevi Carolum Magnum non magis
bellicæ virtutis, quām politæ pacatæque doctrinæ peritum,
& acrem æstimatorem, in eam spem adducerent, nulli cēte-
rarum, quāt in ejus essent imperio, gentium, hanc sapientiæ
& eloquentiæ gloriā inferiorem futuram. Nam cùm per id
tempus inter suos, & Orientalis Imperatoris liberos nuptias
conjunctum iri consideret, optaretque religiosissimus Prin-
ceps uti hac affinitate ad utriusque Imperii Ecclesias certā ac
stabili inter se concordiā vinciendas, neque, in tanta popu-
lorum, qui ei parebant, multitudine, viri eruditi deesfēnt ac
diserti, quibus id negotium cum dignitate mandari posset,
tamen eam habuit opinionem ingenii & industriae nostro-
rum hominum, ut illos potissimum tantis rebus sustinendis,
atque tractandis idoneos esse judicaret. Neque verò unum
duntaxat sibi ex eis legatum delegit, (quod tamen in gente
præsertim admodum nuper C H R I S T O conciliata perho-
norificum fuisset) verū in Westphalia quoddam Orienta-
lium Oratorum seminarium instituendum putavit. Itaque
iis tabulis, quibus primam in Westphalia Episcopalem Ec-
clesiam Osnabrugii collocat, diligenter sanxit, ne unquam in
ea Latinarum, Græcarumque litterarum studia intermitte-
rentur, quōd inde, conciliatis aliquando nuptiis, potissimum
sibi placeret, quandocumque ex usu & dignitate Reip. fo-
ret, legatum in Orientem decernere. Quā re prudentissimus
Imperator satis ostendit, quid jam tum sibi de Westphalo-
rum ingeniis polliceretur, quos primūm efflorescentes arbit-
raretur, in luce ipsius facundiae, omnisque liberalis scientiæ
inventricis Græciæ, iis ipsis artibus, quas illa maximè vendi-
tare solet, totius Occidentalis imperii dignitatem tueri, &
illustrare posse. Neque verò Carolum fefellit opinio. quan-
quam enim illud ejus de nuptiis consilium Græcorum levi-
tate non processit, non tamen ideo destiterunt unquam no-
stri homines usque eō præstanti labore ad summam eruditio-
nis

*Krantzius
Metrop. l.1.
cap. 2.*

nis gloriam eniti, dum, quorum gratia Carolus illustre lin-
guarum gymnasium condiderat, subtiliorum quoque disci-
plinarum publicam sedem aliquando mererentur.

C A P U T III.

*Ante, & post Academias conditas è VVestphalia
egregios sapientia magistros prodijisse.*

ID quām maturē sint promeriti vel ex hoc licet intelligi,
quod cūm cæteras ferē gentes, cūm primūm ad Christiana
sacra, civilemque cultum traducuntur, complures annos
exterorum magistrorum disciplinā antē formari necesse sit
& perpoliri, quām ex iis ulli ad ceteros docendos idonei pos-
sint existere, tamen hujus tanta fuit soli benignitas, ut simul
coli cœperit, simul sapientissimos antistites proferre. Quid
enim Hatumarō, quid Badurado hujus Ecclesiæ primis Epi-
scopis earum artium defuit, quæ in laudatissimis populorum
magistris prædicari solent? At hos ex eorum numero fuisse
aceperimus, quos gente perdomitâ Carolus obsides accep-
rat. Ab his acceptam pietatis litterarumque gloriam pluri-
mi, quorum memoria Ecclesiarum coenobiorumque litteris
consecrata est, non modò propagarunt ad posteros, verū
etiam in longinquas & barbaras gentes incredibili labore
sparserunt. Neque enim ignorare potes, Princeps Illustrissi-
me, Westphaliæ primaria Collegia, ac coenobia, atque inpri-
mis finitimatam terris tuis Corbeiam, eorum propè omnium
fuisse gymnasium, qui ulteriore Saxoniam, Vandaliā,
Daniam primis Christianæ fidei præceptis & bonis artibus
imbuerunt. Hinc enim Ansgarius, Rembertus, Adalarius,
Unno, Sigebertus, aliique viri immortalitate dignissimi pro-
dierunt, qui morum sanctimoniaz, & scientiæ copiis, quic-
quid inter Visurgim, & ultimos Borealis oceanii finus terra-
rum jacet, impleverunt. Neque vetustis modò illis tempori-
bus tales Westphalia viros pariebat, verū etiam ante annos

*Adamus
Brem. Chro-
nica Cor-
beiensis*

circiter trecentos, cùm nobilissimus equester ordo dignâ suis natalibus, suâque animi magnitudine in Livoniam expeditione suscepit, populos ad eam diem à C H R I S T I sacris aversos debellare, & subjugare decrevisset, unâ cum iis multi indem pii, eruditique homines sunt profecti, qui quos illi armis vincerent, ipsi religione, & humanitate excoherent. Cujus rei, ut historiarum monumenta deessent, testes esse possunt nobiles, & locupletes Livoniae Ecclesiae, quæ se ad nostram usque memoriam Westphalis ferè præsulibus regendas dederunt. quippe visum est illis æquum esse, ut illi Ecclesiarum opibus fruerentur, quorum eas majores suo labore, doctrinâ, præclarisque exemplis instituissent. Hujusmodi hominum incredibile dictu est, quantam copiam aluerit Westphalia, cùm in Ecclesiae Collegiis, religiosisque domibus omnis Christianè vivendi, recte sentiendi, atque dicendi ratio tradetur. Sed cùm in iis domiciliis ii fere soli formarentur, qui sanctioris vitæ genus inire statuissent, perspicuum est non perinde ad multos ejus disciplinæ fructum permanasse, atque si nostrarum Academiarum more, omnibus honestarum artium amantibus adolescentibus promiscuè patuissent. Verùm hoc incommodum iis temporibus fuit Westphaliæ cum pluribus regionibus commune. At postquam Principum beneficio ea gymnasiorum publicorum forma, quæ hodie est in usu, tandem increbuit, proprium ejus malum fuit, in tanta præstantium ingeniorum ubertate Academiâ carere. Quanquam Westphaliæ Academia defuit, Academiis Westphali nunquam defuerunt. Si enim eæ quæ in Germania & antiquitate, & celebritate nominis ceteris antecellunt, eorum imagines recenseant quorum sunt ingenii, & laboribus plurimum exulta, reperient ab ipsis incunabulis plurimum sibi splendoris à Westphalis accessisse. Certè, ut alios præteream, cùm paucas etiam Academias haberet Germania, ad Concilium Constantiense, quò constat delectum eruditorum hominum florem convenisse, à duabus primariis duo Westphali viri eruditione & auctoritate præstantes publicè communi consensu

fensi missi memorantur. Aderat è Colonia Agrippinensi ^{Seff. 15.} Theodoricus de Monasterio Theologæ Doctor, qui & verba in conventu habuit ad Patres, & in eorum numerum est allelus, qui in pestilentem Joannis Husi doctrinam Concilii auctoritate, anquirerent. Aderat ex Heidelbergensi gymna-
fio Conradus de Susato & ipse Theologæ Doctor, atque ^{Seff. 16.} apud Ludovicum Comitem Palatinum gratiosus in paucis, qui voluntate totius Concilii ad Petrum cognomento de Lu-
na, qui se Benedictum XIII. ferebat, in ordinem redigen-
dum, in ultimam Hispaniam, inter alios, legatus est profe-
ctus. Erfurtum vero inter præcipua sua lumina commemo-
rat Godeschalcum Grefemundum Meschedensem, clarum in-
primis rerum divinarum scientiâ, cuius germanus eodem
tempore Moguntiaci Medicus ac Philosophus habebatur
eximus Theodoricus. Sed hujus famam in eadem Acade- *Trith. de
script. Ec-
clesi.*
mia filius obscuravit, & ipse Theodoricus, quem Erasmus
alicubi hominem appellat ab ipsa natura ad humanitatem,
ad bonas litteras, ad eloquentiam illam verè Atticam, scul-
ptum ac factum. Sed quid necesse est omnium Academia-
rum tabularia excutere, cum sat multa à Westphalis relicta
teneamus in eorum libris eximiæ litterature dōcumenta, ē
quibus cognosci liceat, quantum vivi Doctorum exedras
ornaverint, quorum tanto intervallo, defunctorum lucubra-
tiones, legentium & laudibus & profectu celebrantur? Ac
recentibus quidem Academiis cum vigeret etiam illud mi-
nus comptum, & amœnum, subtile tamen, & argutum dis-
putandi scribendique genus, Theologiam, ut de ea præcipue
loquamur, scriptis illustrarunt, præter Susatensem, & Me-
shedensem, de quibus memini, Henricus de Coesveldia,
Wernerus Rollevincius, Henricus de Hervordia, Herman-
nus de Soldis Osnabrugensis, Hermannus in Campo, Hen-
ricus de Werials, & alii complures, quorum extant plena eru-
ditionis, ut iis temporibus, ingenii monumenta.

*Annot. ad
ep. 9. S. Hie-
ronym.*

C A-



CAPUT IV.

*Humaniores litteras in Germania præcipuo
Westphalorum studio refloruisse.*

AT verò postquam NICOLAI V. PONT. MAX. auspiciis cultiora litterarum studia primùm in Italia revixerunt, cùm pleraque omnes Academiæ Germaniæ, rationibus sanè levibus retardatæ, quas alicubi persequitur ac refellit Æneas Silvius, ea admittere, & tractare cunctarentur, Westphali nostri tempus hoc demonstrandæ suæ in boenas litteras voluntatis, minimè prætermittendum rati, relietas ab aliis, atque despectas non modò sibi recipiendas, sed etiam ornandas, atque omni ope toti Germaniæ commendandas existimarunt. Princeps tam illustris facti Rodolphus à Langen, vir equestris in Westphalia ordinis, & in maxima Ecclesia Monasteriensi Canonicus fuit. Is enim cùm unà cum Mauritio Comite Spilemburgio Canonico Coloniensi, & Rodolpho Agricola, in Italia Francisco Philelpho, Theodoro Gaza, aliisque utriusque linguae instauratoribus dedit operam, tantosque haberet progressus, ut is, quem modo nominavi, Agricola ab hoc demum viro aliquando, ut ipse loquitur, *priscam insolenti Italie, & propemodum occupatam bene dicendi gloriam extorqueri posse* consideret; reversus in patriam nihil habuit antiquius, quām ut ad quarum artium quasi mercatum quandam erat profectus, carum suis popularibus copiam faceret. Ille igitur fuit, ut cecinit quidam,

Primus Melpomenen qui rura in Westphala duxit.
In Westphala autem? imo verò, si verum amamus, omnino post restitutas litteras, primus Germanorum eruditum carmen scribere cœpit. Scripsit & multa soluto sermone per quam disertè, & veteres illos elegantium artium auctores propè primus, quasi postliminiò, juventuti restituit. Etenim Conradum, è Comitibus Ritbergensibus, Monasterensem Antistitem, magni animi Principem, suâ auctoritate perputlit,

*Lib. de educ.
Liberor. ad
Ladiſlaum
regem c. 6.*

In epist.

*Alexander
Hegius in
epigramm.*



lit, ut in ludo litterario, qui erat in ea urbe ad D. Pauli, repudiatis barbaris & in cultis minimè idoneorum magistrorum præceptiunculis, exemplo, atque instituto earum scholarum, in quibus erat in Italia versatus, vetusti scriptores utriusque linguae explanarentur. Res variis, ut sit, consultationibus in id tempus extracta est, quo in ea Ecclesia Scholastici munus sustinebat vir magno natalium, & prudentiae splendore Wennemarus Horstius, ex ea ipsa familia, quæ amplissimum hujus nunc Ecclesiae Decanum tulit; is ascitis in eam rem viris litteratis è Langii ferè disciplina, atque contubernio, universum Gymnasium Timanno Camenero, cuius extant de Philosophia naturali commentationes, administrandum dedit. Neque verò hic Westphalorum ardor unius urbis finibus coerteri potuit, sed annidente eodem in primis Langio, ludis, in celeberrimis quibusque oppidis, apertis, omnibus utriusque linguae, omnisque politioris litteraturæ copiis Westphalia redundavit. Quid quòd Westphalorum studio, ac labore in alias quoque Germaniæ oras permanarunt? Siquidem Daventriæ versabatur Alexander Hegius homo Westphalus, cui Langius, quondam ejus coadūcipulus, è bibliotheca, quam secum ornatam, & locupletem ex Italia detulerat, libros à doctissimis illis Italiæ magistris nuper editos in lucem, sanè quam benignè & ultrò mittebat. His cùm ille assiduò volvendis fieret quotidie eruditior, discipulos, atque æmulos studiorum suorum habuit Desiderium Erasmus Roterodamum, Joannem Murrhellum, Ludovicum Bavingtonum, aliosque complures. In his Conradus quoque Goelenius Paderbornensis fuit, qui postea in nobilissima Academia Lovaniensi è primis fuit ejus Collegii professoribus, quod ad illustrandas linguarum præstantissimas sapienter institutum, trilingue dicitur; plurimumque suâ ætate, dicendi laude præststit. eum hujus artis præcepta tradentem, audiit inter alios Adolphus Comes Schaumburgius, qui deinde Coloniensis Antistes renunciatus, veteris fuit religionis instaurator & vindex, plurimumque, Princeps Illustrissime, jam

b

tum

tum exsplendescem in dolem in tenera tua dilexit etate. Tulit præterea Paderbornensis ager eadem tempestate Ludovicum Dringebergium, qui ad excitandas easdem mansuetiores litteras, magnis propositis præmiis Selestadium in Alsatiam evocatus, Joannem Reuchlinum, Beatum Rhenum, Jacobum Wimpelingium, aliosque erudiit, qui deinde insigni scientiæ famâ claruerunt. In Bataviam primus eadem præclara studia, eodem hortante, & adjuvante Langio, Antonius Liber Susatensis invexit, è cujus disciplina Alardus Amsterodamus, doctissimus ac politissimus Lovaniensis Theologus, aliqui clari in litteris homines prodierunt. Quo quidem tempore nihil mihi Westphaliæ videtur ad immortalem gloriam præter te unum Princeps Illustrissime, defuisse. Si enim tui similis quispiam Mæcenas fuisse exortus, qui severas illas veterum Academiarum doctrinas hâc novâ humanitatis, & eloquentiæ dulcedine temperasset, unoque utrasque domicilio collocasset, næ is facile omnibus numeris absolutam Academiæ formam primus Germaniæ demonstrasset.

CAPUT V.

VWestphali naturâ propensi, & habiles ad doctrinam.

EQuidem sic sentio: quantum inter frugiferas arbores, & eas intersit, quæ præter foliorum speciem, & umbram nihil afferunt, tantum ea gymnasia quæ sciendi studia, cum linguarum cognitione conjungunt, iis præstare, quæ soli poliendo sermoni, sunt consecrata. Neque id nostrates fugit, quorum ut quisque est ingeniosissimus, ita non contentus his minoribus artibus, ad sublimiorum rerum disciplinas nativo quodam impetu, quando domi facultas non datur, in longinquas terras rapitur. quod enim est in Germania, aut superioribus annis fuit paullò florentius gymnasium? quis doctorum hominum cœtus? quis denique discendi, ac proficiendi locus, qui non Westphalorum sit ingenii illustratus? Illi verò quos rei familiaris inopia patrios fines egredi non sinit, non fatis

fatis illâ aviditate, quâ in his litteris percipiendis sunt versati, quarum erat domi copia, declararunt, quid in iis studiis es- sent facturi, quæ continent naturale quoddam pabulum præstantium animorum? Quibus tametsi Westphalia adhuc publicas sedes nullas posuerat, tamen quâm crebri in ea sunt, & celebres ludi? qui concursus, ardorque discentium? quæ certamina æqualium? quæ cohortationes, & gratulationes parentum? quis labor, & assiduitas magistrorum? Academias profectò commemorare possum, quæ celebritate, & frequen- tiâ nullo modo sint cum puerilibus Westphaliæ ludis compa- randæ. Quem enim horum nominare possis, qui vastitatem, & solitudinem, ut illæ, metuant? quo, dilabentibus civium populariumque liberis, externos, & peregrinos auditores propè pretio conduceare necesse sit? qui fucatae libertatis ille- cebris, & indecoris immunitatibus ad pelliciendam juventu- tem indigeat? Westphalorum ea semper fuit discendi cupi- ditas, ut & suis gymnasiis complendis soli sufficient, & pluri- mū inde redundet in externa. neque verò multū prensan- di parentes, ut filios suos ad studia incumbere patientur, quippe cùm ipsis quoque ruri, atque in mapalibus nati, qui nullam doctrinæ partem attigerunt, non temerè quemquam filiorum litterarum prorsus expertem velint. Itaque diu aliis est prius studendum, quâm studia amore esse digna cognoscant: Westphalos jam inde ab ipsis incunabulis quidam ad discen- dum genius exstimulat. ut vel inde conjecturâ liceat assequi, quantus sit in Westphalia proventus illustrium ingeniorum. Est enim ingenium quidam mentis oculus, qui quô magis lu- ce gaudet, atque exire gestit è tenebris, hoc est sanior, & ad cernendum, ac perspiciendum acutior. Ejusmodi cùm tanta sit in Westphalia multitudo, quibus, Illustrissime Princeps, velut inusitatum jubar optatam hodierno die lucem affers, non est metuendum ne unquam desint, qui ad eam accipien- dam, & fruendam anhelent, seque ob immortale hoc patriæ decus æternas tibi gratias debere fateantur.

C A P U T VI.

*Quibus rebus VVestphali ad progressum in
litteris adjuventur.*

Neque verò minore contentione Westphali studia persequi solent, quām arripuerint. est enim huic genti cognata incredibilis quādam industria, quæ extero- rum quoque hominum præconium meruit. Sunt enim ab Erasmo hæc ipsa scripta in epistola ad Thomam Morum summum illius sæculi lumen. *Westphalus, inquit, populus, ut vulgo rudior habetur* (nempe à tuis Batavis, mi Erasme, politis scilicet hominibus) *ita multos nobis dedit summis ingeniis, mini- meque vulgari doctrinâ præditos.* Non aliud genus mortalium patien- tius laborum est. Rara profectò singularisque laus. Quæ enim duæ res tam agrè in uno homine, ne dicam gente, copulan- tur, quām ingenii magnitudo, & laboris contentio? ferè enim qui ingeniosi, iidem sibi præfidentes, plurimùm otio se dedunt, ne minus ingenii habere videantur, si plus laboris assumpserint. Atqui contrà fieri oportuit. Ut enim quò fœ- cundior est ager, hoc operam coloni remuneratur uberioris: ita præstantissimum quodque ingenium hoc est fructuosius, quò diligentius, instantiusque colitur. Neque verò parum affert momenti ad promovenda studia Westphalorum, cele- ritati ingeniorum adjuncta modestia, & ab effrenatis moti- bus alieni mores. Sic enim plerosque omnes natura compa- ravit, ut facilè imperare animo suo, suæque vitæ modum te- nere condiscant. quo quidem nihil est ad accipiendos sapien- tiæ fatus accommodatius. Ejus rei video ab harum rerum prudentibus duo argumenta sanè luculenta proferri. Alterum, quod cùm plures ferè è Westphalis, quām cæteris Ger- maniæ populis, quotannis propter discendi cupiditatem in alienas terras demigrent, multi item quotannis in patriam se referant, incorruptam tamen adhuc, atque integrum ab omni

omni depravato exterarum gentium more Westphaliā tueantur. Eadem semper in viētu cultuque frugalitas: idem in moribus candor: eadēm in dictis factisque constantia. Longissimē enim absunt ab eorum errore, qui tum demūm se p̄eclarē peregrinatos arbitrantur, cūm quot gentes accesserint, totidem peregrinis vitiis obsiti revertuntur. Itaque cujusmodi eum expressit Homerus, quem imaginem posterris proposuit Sapientiæ, tales plerosque Westphalorum finit natura, format educatio, confirmat industria, ut non magno negotio & Sirenum blanditias, & artes filiarum Solis prætervehantur impune. id qui norit eum demum scito certissimum ad absolutam sapientiam cursum tenere posse. Alterum quoque indicium facilis & pacatæ naturæ commemo-
rant, quod nulla Germaniæ gentium plures procrearit, qui in alienis rebus pub. honoribus, atque muneribus vel minore invidiâ sint ornati, vel majore omnium commendatione perfuncti. Nulla siquidem est non dico illustris, & splendi-
da, sed omnino paullò lautior Westphaliæ domus, quæ non aliquos è suis majoribus laudare possit, extra patriam in aliquo vel viri Principis Consilio, vel alicujus reip. Senatu, vel aliquo denique Ecclesiastico, aut civili magistratu iis quoque faventibus versatos, qui se præteritos jure queri posse vide-
bantur. Sic enim induxerunt animum plerique mortalium, cujusque commoda, atque ornamenta civitatis, civium es-
se oportere. ad ea si alienus aspiret, omnibus est invidiæ te-
lis expositus, quæ quisquis evitare desiderat, eum necesse est usque eo animo suo posse imperare, ut neque ulla improbi-
tatis significatione nudum latus calumniis p̄ebeat, & se fa-
cile in tam excuso virtutis fastigio collocet, quod nulla in-
vidia possit attingere. Quæ omnia, quid aliud significant,
quam in Westphalorum indole innata atque inclusa singula-
ris cuiusdam semina virtutis, quæ si tempestivâ culturâ tan-
tisper foveantur, atque adolescent, dum justam maturitatē
assequantur, intellexisti Princeps Sapientissime, brevi
Westphaliā universam plurimis, & maximis ornamentis,

atque præsidiis non ad suam modò, verùm ad totius Christianæ reip. utilitatem abundaturam.

CAPUT VII.

*De aliena à veteri Religione Academia in
Westphalia tentata.*

QUare nunquam tibi pro eo ac meretur hoc tamdiu optatum beneficium, gratiam Westphalia referet. Tu enim primus in media ejus luce campum aperuisti, in quo nostrorum hominum industria, in exiguum gyrum paucarum nuper disciplinarum compulsa, liberè tandem ad omnem Sapientiam excurrere, cognoscique possit. Tibi debebit omnis posteritas, quòd quæ majores nostri litterarum decora, atque præsidia peregrè petebant, ea jam domi, te auctore nascantur, atque ita patriam, quam adhuc parentem tantùm, & altricem suam vocabant, deinceps, tuo beneficio, eorum quoque bonorum procreaticem sint habituri, quæ sola, cùm semel possidere coeperimus, nunquam nostra esse desinent. Est verò aliud quoque quod divinæ providentiae gratulemur, neque enim mihi tam letandum videtur, quod aliquando hoc doctorum hominum seminarium in Westphalia sit conditum, quàm quòd eam mentem veteris, atque Orthodoxæ religionis colenti Principi potissimum injecerit. Neque enim defuerunt qui secessione ab Ecclesia Catholica factâ, Westphaliam post annos jam demum oëtingenos veritatem se docturos professi, suis novis opinionibus, Academiarum more, non modò Ecclesiarum opibus, sed etiam Ecclesiasticis Principibus administris extruere gymnasia laborarunt. Fuit in eo numero superiore seculo Arnoldus Burenus, cuius extat oratio sanè verbosa ad Franciscum Monasteriensem Episcopum, non sine præfatione Philippi Melanchthonis. In ea principio mirificè laudat Episcopum, quòd incredibili totius propè Germaniæ administratione

ratione, à Pontificia illa, ut ipse loquitur, *impietate ad puram Christi doctrinam* (Lutheri deliramenta dixisse oportuit) se translulerit. deinde persuadere conatur, ut Westphale juvenati ludum aperiat, qui non solum inferiorum artium tractatione, sed etiam Theologicarum rerum, & Jurisprudentia professione nobilitetur. Addit incredibile esse, quanta futura sit istius beneficii gloria: *Unum illum ex omnibus Episcopis, quibus unquam Westphala Ecclesia, atque Resp. fuerit commissa, extitisse, qui primus in illam Ecclesiam sacrosanctam Euangelii doctrinam, & in scholam, verè piam, & salutarem institutionem, omnibus ineptiis impensisque somniis ex illis deturbatis, intulerit.* Hæc ille. Ac sanè si quod unquam fuit tempus oblatum Westphaliae divinitus, quo merito poterant omnium animi ad Academiæ cupiditatem erigi, hoc profectò illud fuit, cùm ampliā, & validā in primis Urbe ex Anabaptistarum fanaticorum hominum, & omnis honestæ doctrinæ conjuratorum hostium dominatu, in libertatem vindicatā, omnes vehemens quoddam demen-
tissimæ illius inscientiæ, atque barbariæ, tam recenti malo, odium percepissent. Itaque post receptam urbem, eorum qui ludum in illa litterarium, de quo nuper dixi, celebrabant, duo admodum millia censa fuisse accepimus. Cùm ergo ad minorum, ut ita dicam, gentium artes, tanti concursus fierent, quid futurum fuisse putemus conditâ Academiâ, in qua sublimiorum quoque doctrinarum studia viguissent? Sed nimis
rum hujus meriti gloriam D e u s tuæ Celsitudini, Princeps optime, reservabat. Neque verò, quâ fuit in nos bonitate, commisit, ut civitas vixdum illâ turbulentissimâ tempestate perfuncta, eis cathedras, & subsellia erigeret, qui primi ejus commovendæ duces extiterant. Quis enim est rerum illo tempore gestarum tam rudis, qui nesciat Lutherianos prius in Catholicos, quam in Lutherianos Anabaptistas, coortos, his faces ad rem publ. turbandam prætulisse? Quis ignorat huic ipsi Francisco, ad quem scribit Burenus, non Anabaptistas modō, sed etiam Lutherianos rerum novarum, & seditionis poenas dedisse? Ac fuit ille quidem deinde, nescio quo illo-

*Vide Laur.
Fabricium
exam. In-
quis. Mo-
naft. c. 7.*

rum temporum fato, cō delapsus, ut haud dubiē eorum partibus faveret, quorum sceleratos impetus antē compresserat: ne tamen ei Episcopatus, Pontificis Max. sententiā, ut erat institutum, abrogaretur, supremum Canonicorum Collegium, ob magna viri in Ecclesiam merita, intercessit, deditque operam ne quid præterea res Catholica detrimenti caperet. Verūm, quæ, malum, est hujus hominis impudentia? primusne Franciscus sacrosanctam Euangelii doctrinam in Westphaliā intulit? itane? tot sanctitate & doctrinā illustres antistites, qui à fundata in his terris Christiana religione Ecclesiam gubernarunt, expertes Euangelicæ doctrinæ fuerunt? quid? antequam Petrus Werthemius ad res novas moliendas Monasterium Marpурgo mitteretur, scholæ inceptiis, & somniis refertæ erant?

C A P U T VIII.

Novum Euangeliū cum summo Academiarum odio natum.

Scio quæ ille somnia intelligat. nempe Missam, Purgatorium, Sanctorum invocationem, & similia Ecclesiæ Catholice dogmata, quæ sapientissimus quisque veterum Patrum complexus est, ut nemini possit esse dubium, quin illi potius somnient, qui ista repudiant. At ego in hoc ipso de quo agimus Academiarum negotio tam planum facio ipsos illos novi Euangelii architectos somniaffe, seu potius delirasse, ut ex eo, quod iis circa has artes contigit, in quibus erant indē ab incunte ætate versati, conjici possit, eos cū toti antiquitati in gravissimis fidei decretis somnia objiciunt, omnino de potestate mentis exisse. Quæro enim ex Burenio, num hic ille Philippus, cuius præconio suam orationem commendari voluit, non aliquando Academias, & bonarum litterarum gymnasia sit execratus, & insano odio persecutus? Quæro num meminerit anno Salutis nostræ M. D. XXI. æneis formis excusam esse orationem Didymi Faventini nomine,

mine, contra Thomam Placentinum? num ignoret hujus Ep. Lat.
tom. 2. ep.
ad Spalat. orationis ab ipso Luthero auctorem laudari eum, de quo nobis sermo est, Philippum Melanchthonem? In ea porrò oratione hæc sunt verba: *Ne nulla essent in Christianismo scholæ, Academia generalium studiorum, quas modò Universitates vocant, conditæ sunt. Atque hoc consilio mirum est, quām placeant sibi, quām salutare putent, quo non aliud repererunt neque perniciosius, neque magis impium, & quod video non Pontificibus, sed ipsi deberi Satana, qui si quo unquam, hoc certè casu, egregiè impo- posuit Christiano populo. Evidet sapientem virum fuisse judico Wi- clephum Anglum, qui omnium primus, quod ego sciam, vedit Uni- versitates esse Satanae synagogas. Et quid dici vel pium magis, vel sapientius potuit?* Hæc Philippus alludens ad illud Wi- clephi pronunciatum, quod inter alia Concilium Constan- tiense damnavit: *Academias, Collegia Academica, studia, & sess. 15. insignia magistralia vanâ gentilitate esse introducta, & tantum Ecclesiæ prodeesse quantum prodest diabolus.* Ac ne quis dubita- ret num hoc odium esset ab ipso genio novi Euangelii, ipse ejus parens Lutherus simul in Ecclesiam furere & baccha- Lib. de ab-
ri cœpit, Academias omnibus maledictis infectabatur, & rog. Missa.
exagitabat. Suntne hæc Lutheri verba? *Ex isto fumo (de quo l. de infli-
S. Joannes in Apocalypsi) prodeunt locustæ istæ, que omnes ca- tuen. pueris.*
thedras occupant, omnia gubernacula administrant, ut Academias Oper. in
ab initio mundi Satanæ nihil excogitarit presentius, ad vastan- Ps. 22. &
dam fidem, & Euangelium toto orbe. Ibidem eas comparat cum l. contra
valle Tophet, & cum fano Moloch. Alibi appellat *afino-* Cathar.
rum bipedium slabularia: alibi portas, & januam inferi. Est u- privata.
bi vocet *Antichristi lupanaria: Diaboli tabernas: Synagogas sy-* In conc. ha-
nagogarum Satanae. Adjunxit ad hæc & alia convitia, magna bita Kal.
& impudentia mendacia. An non est mendacium, Academias *Aristotelem Christo aquavisse, quantum ad auctoritatem, &* Jan. 1522.
fidem? Verbo & ratione docendi solvere mandata Dei? Christum Colmaria
& novum Testamentum longius ex mundo exterminasse, quām Ju- edita.
deos, & Turcas? denique in Academias sub titulo doctrina Chri- L. contra
stiane non nisi pugnantissima Christianæ fidei doceri? Videntur- Latomum.
ne L. de ab-
rog. Missa.
Conc. Kal.
Jan. Col.

ne Tibi, Princeps Illustrissime, hæ vigilantium, an somniantum? prudentium, an insanorum voces? Sed audi facta. haud paullò dictis stultiora. Anno M. D. XXII. cùm Lutherus metu Caroli V. Cæsar is in Pathmum, ut ipse insolentissimè appellabat, fecellisset, interea Wittembergæ Andreas Carolstadius, & Philippus Melanchthon, Lutheriano œstro perciti, cogitarunt quemadmodum doctrinam, quam Lutherus, si diis placet, devocasset de cœlo, factis persequerentur. Ergò, cùm inter alia tam insigne ejus in Academias odium haud dubiis argumentis perspexissent, juventuti quæ in Academia Wittembergensi studia litterarum æmulabatur, auctores fuerunt, ut combustis libris, spredoque gymnasio in opifi-

Colloquium Altenburg. Surius. Staph. apologetic. p. 3. de confess. Euangelic. §. Biblioth. Lib. 2. cum se disciplinam darent. Neque dubitarunt, cuius suasores fuerant, ejusdem consilii duces esse. nam Carolstadius in villa haud longè ab urbe ex Doctore Theologiae de improviso a gricola, ac rusticus evasit: Philippus qui Philosophiae magister erat, pistori suam operam navare coepit. *Hoc tantorum Theologorum decretum,* inquit Staphylus, fusè longèque dimanavit in plerasque urbes Germania. Et, ut reliquias taceam, scimus Vratislavie, & Suidnicia in Silesia biennium ludos litterarios oclusos fuisse, & planè extintos: nec quicquam ab istorum sectariorum disciplinis lectum, præter textum sacra Scripturæ. At, inquiet, Lutherus, & Philippus, mutata postea voluntate, auctores ubique fuerunt per Germaniam instituendarum scholarum, neque obscurum est, eos qui eorum instituta sectantur, passim gymnasia habere publicè informandas juventuti. Principiò non ideo non somniarunt, quod aliquando suo illo somno excussi alter, ac prius censuerunt. Imò verò vel indè liquidò constat somnia fuisse, quod tunc ab iis damnata & explosa sunt, cùm eos isti sapientiores fuisse confitentur. Deinde est quod gratias Principibus agamus, qui cùm Anabaptistarum exemplo didicissent, quantum ad perturbandam rem. virium haberet novo Euangelio armata barbaria, maturè ne id malum latius serperet providerunt. Qua in re videntur mihi fecisse, quod, ut ex Timæo narrat Athenæus, Prætores olim Agrigentini

tini ebriosis quibusdam juvenibus. Cùm enim hi vino madi-
di in eam devenissent amentiam, ut cùm in taberna federent,
tremi sibi per mare vehi, & tempestate jaclari viderentur,
cāque persuasione supellectilem omnem, atque adeò lectos
ipsos, velut allevandæ navis caussâ, projicerent foras, exciti
tali insolentiâ magistratus, insanentes objurgarunt, ac ne am-
plius ad eum modum se vino replerent severè monuerunt. Il-
li admoniti projicere quicquam desierunt, sed ita ut hærerent
etiam nonnullæ reliquiæ delirationis. Nam & Tritones præ-
tores appellabant, & se ingenti tempestate perfundos quere-
bantur, & iis se in patria, velut suis liberatoribus statuas pos-
turos esse promittebant. Nimirum necdum vini, à quo illa
væfania proficisebatur, vis tota remiserat. Neque vero fuisse
quisquam tam væcors, qui his hominibus, quicquam supelle-
ctilis, quod non projectum, & perditum veller, custodiendum
prius daret, quām essent omni pristinæ aberrationis periculo
liberati. Atque spectavimus quidem Lutherum, & Philip-
pum novo Euangeliō ebrios, non lances, & lectos, sed optima
nostrorum instituta majorum, & pulcherrima reipubl. vel or-
namenta vel subsidia abjicientes. num illi admoniti penitus
se ab illa insanìa removerunt? an non quasdam ejus notas est
intueri? denique an non illa è novo Euangeliō profluxit?
num igitur illa potest, nisi eo prorsus sopito, atque extincto,
omnino conquiescere? Certè Erasmi, quem credo isti recte
de litteris existimare posse non diffitentur, hæc fuit sententia:
Ubi regnat Lutheranismus, ibi litterarum est interitus.

*Lib. 19.
epist. ad
Pyrekhem-
rum.*

C A P U T I X .

Philosophia in Academiis non responda.

Verum id jam non ago. satis mihi fuerit ostendisse eos
manifestò suā confessione somniasse, qui Catholicis
Academiis somnia objectare non sunt veriti. Deinde
non satis tutò iis hominibus Academiarum curam committi
posse, qui tam flagitiosè delirarunt ut tanquam exitiosas rei-

c 2

pub.

pub. damnarent, præsertim si nonnulla etiam in iis tantæ dementiæ usquam vestigia appareant. Dixi enim horum furorem perinde ut illorum Agrigentinorum non simul totum esse compressum. Id vel ex eo constare potest, quod etiam postquam Philippus à furno ad scholas rediit, tantiisper honores Academicci nemini more majorum mandati sunt, donec Electoris imperio intermissus pluribus annis mos aliquando referretur. Sed videor mihi in Burenii quoque verbis quædam observare relicta stultitiae argumenta. Quid enim caussæ censes esse, Princeps Illustrissime, cur Burenius nullam suâ oratione Philosophiæ mentionem faciat? cur ante Theologiæ studium solas inferiores artes requirat? Nimirum talem Academiam moliebatur in Westphalia, cuiusmodi ex Lutheri præceptis tunc institui poterat, cum tamen et si de infinito illo Academiarum odio nonnihil remisisse videbatur, tamen Philosophiam, præsertim Aristotelis, necdum concoquere ullo modo poterat. Ita enim ille scripserat anno M. D. xx. in libro de reform. Reipub. Christianæ ad nobilitatem Germanicam: *Suadeo, inquit, ut libri Aristotelis, Physicorum, Metaphysicæ, de Anima, Ethicorum, qui haecenom omnium optimi habiti fuere, penitus aboleantur & exterminentur; cum omnibus illis, qui rerum naturalium explicationem & cognitionem se tradere profissentur: cum ex illis nihil vel naturalium, vel spiritualium rerum disci, vel doceri queat.* Neque verò id postea mutavit. quamvis enim libellum composuit de instituendis scholis, tamen cum earum formam describit, multus ille quidem est in prædicando linguarum studio; de Philosophia restituenda nihil præcipit; ut satis appareat, nunquam cum eo in gratiam rediisse. Talis igitur, ut opinor, Academicæ speciem cum animo conceperet Burenius, quæ lustrum esset inscientiæ, non sapientiæ domicilium, præclarè se meriturum de Westphalia speravit, si eam huic genti cupidissimæ omnis liberalis eruditionis obtruderet. Num verò existimavit illam Westphalorum insignem discendi aviditatem, propter quam eorum majores sape remotissimas nationes adierunt, modicā cogni-

cognitione linguarum, & paucis in aliquot Scripturæ sacræ capita, non è veterum auctoritate, sed è nuper exorta disciplina petitis glossematis, expleri posse? Quid? nullumne unquam crediderunt Westphalorum in sublimiores de divinis hypostasibus, de præsentia C H R I S T I in Eucharistia, de procreatione rerum è nihilo, aliisque ejusdem generis locis esse venturum? aut omnes tam hebeti futuros ingenio, ut non sentirent, hæc sine accurata Philosophiæ cognitione, neque satis liquido explicari, neque adversus hostes Christiani nominis satis pro dignitate propugnari posse? Nam quòd eorum nonnulli respondent, Philosophiæ disciplinas ad liberalem quandam oblectionem animi percipi posse: ut in sacris rebus ullus eis sit locus, id verò minimè ferendum esse; hæc inquam oratio risum profectò prudentibus movet. Quotidianæ enim inter eorum Theologos concertationes, turpissimis, ob rerum Philosophicarum ignorationem, hallucinationibus refertæ satis ostendunt, ebriis hominibus eos esse persimiles, qui cùm se per dementiam negent duce, vel adminiculo ad ingrediendum indigere, ubique tamen titubant, atque offendunt. Quantò tandem abs te sapientiùs factum est, Princeps Illustrissime, cui cùm persuasum esset, illas quoque à profanis licet hominibus excutas doctrinas, D E I ad nos munere pervenisse: C H R I S T U M , qui sit æterna veritas, ad illa quoque omnia, quæcumque illis rectè tradita sint, suâ auctoritate comprobanda ad nos de cœlo de-
S. Augu-
stin. ep. 3.
ad Voluf.
lapsum: esse denique eas disciplinas ad res divinas explanandas uberiori, & validiori muniendas per quam appositas, iccirco Academiam tuam, more majorum, iis omnibus artibus, quæ omnibus numeris absolutum Theogum decent, instruētam esse voluisti? Ita enim retinetur admirabilis ille inter disciplinas concentus, atque consensio, ut cùm aliæ sint diviniori fidei lumine patefactæ, atque è cœlo ascitæ, aliæ nativis ingenii viribus, & assiduo mortalium studio peruestigate, hæ illis pareant, atque ancillentur, & si qua in re lapsæ fuerint, ab illis corrigantur: illæ verò earum cùm præsidiis ad



compescendos hostes, tum ornamentiſ ad ſua illuſtranda, atque conſirmando utantur.

CAPUT X.

De retinenda Academiarum interſe concordia.

Neque ſolū diuſlæ ſunt, atque diſtractæ iplæ diſciplinæ illorum ſomniantium importunitate & demen-
tiā, ſed etiam, quod quidem malum multò latius pa-
tet, iplæ Academiarum, poſtquam hoc novum Euangeliū ab
inferis extitit, omnem funditus ſpem muſuæ concordiæ &
conſefionis amiferunt. Atqui hæc fuit majoribus noſtris
præcipua Academiarum condendarum cauſa, ut veritas mul-
torum ſapientum ſtudiis facilius reperiretur, & auſtoritate
certius muniretur. Sic enim homines ſapientiſſimi judica-
bant, cum in omni diſceptatione, tum præcipue, quæ de di-
vinis rebus iſtituitur, eruditorum hominum conſentientes,
conſpirantesque ſententias magni apud omnes ponderis eſſe
oportere, præſertim ſi quod verſatur in quaſtione, diu fue-
rit antea magnis ingeniorum contentionibus agitatum. Id ſi
in uno aliquo eruditorum hominum cœtu locum habet, quid
in compluribus, non modò mcenibus, ſed terrâ quoque ma-
riique diſjunctis? Jam verò ante Lutheri ab Eccleſia diſceſ-
ſum, quanta erat omnium Academiarum in iis quaſi fide Ca-
tholicā traduntur tuendis, propugnandisque concordia?
quaṁ multa, de quibus nihil dum certi Eccleſia decreverat,
jam quodam Academiarum præjudicio explorata teneban-
tur? quaṁ multa in iis, quæ ex doctri næ Christianæ capiti-
bus, adhibita aliarum quoque cognitione doctrinarum, a-
ptè concludi viſa ſunt, jam pridem tam erant in Academias
recepta, ut iis non aſſentiri ſummæ impudentiæ ac temerita-
tis eſſe judicaretur? Hoc quaſi commune quoddam veritatis
patrimonium pro ſe quaſilibet fideliflīmē cuſtodiebat, &
quantum studio ac labore conniti poterat, augebat. At verò
ſimilatque exortus eſt Lutheruſ, qui apud imperitos hæc o-
mnia



minia tantà gentium ac sæculorum consensione comprobata
atque firmata convelleret, tum verò simul excoxitatum est a-
liud Academiarum genus, cui quoniam æternum est bellum
cum veritate suscepit, omnia drepentè litibus dissidiis-
que permisit. Hujus generis Academiam Burenius popu-
laribus suis optabat, quæ non modò à Catholicis omnibus
dissideret, sed ne spem quidem ullam haberet constantis cum
suis gratiæ ac pacis ineundæ. Ad quam enim illa tandem fa-
ctionem, cùm inter illos sint plurimæ, fese applicaret? Ad
Flaccianam, an Eberianam? ad Osiandrinam, an Ubique-
tariam? An, quod nonnullas fecisse videmus, à Luthero ad
Calvinum, id est de calcaria ad carbonariam repente trans-
iret? Hunc verò ipsum, qui se sequi profitentur, quot jam
sunt partium? Cujus verò tandem rationis fuisset, cùm in
Westphalia tot jam sæculis Academia desideraretur, quæ es-
set veritatis officina, falsarum in ea opinionum, & litium se-
dem constituere? Est enim omnino, quod aiebat S. Augusti-
In Ps. 57.
nus: *In ventre Ecclesiæ veritas manet. Quisquis ab hoc ventre se-
paratus fuerit, necesse est ut falsa loquatur. Quocirca præclarè
comparatum erat more institutoque majorum, ne cuiquam
dynastæ fas esset Academiam condere, nisi non modò Imperator,
verùm etiam Pont. Max. auctor fieret. Existima-
bant enim nihil esse præsentius ad sedandas opinionum dis-
cordias & dissidia doctrinarum, quām ut honores, qui vi-
ris doctis tribuuntur, non modò ab ejus qui toti Imperio,
sed etiam qui totius orbis Ecclesiis præest, auctoritate pen-
deant: ut quoniam, ut est in solenni formula, *hic, & ubi-
que locorum*, eos valere cupiunt, dent quoque operam, ne
eorum doctrina cum totius orbis sensu, judicioque ulla in-
re discrepet.*

C. A-



CAPUT XI.

De Pontificis Maximi in approbandis Academias auctoritate.

In consil.
Theolog.
2 part. pag.
165.

Non placet hoc Philippo. Quid ita? Nolunt, inquit, Pontifex, & Imperator propagari veram, & puram Euangelii doctrinam, qualem constat esse harum Ecclesiarum. Ideo his Principibus, & Scholis sunt inimici. E contrà tamen hi Principes verè invocantes DEUM, debent facere officium suum, & constituere honesta collegia docentium, & dissentientium litteras. Id præcipit DEUS. At quis non videt ea non posse honesta esse docentium collegia, quæ ideo absque summorum Principum auctoritate constituantur, quòd doctrina in iis tradatur ab illorum sententia, & quod consequens est, à confessione orbis terrarum abhorrens? Sed premit nos Philippus veteris Ecclesiæ consuetudine. Non est dubium, inquit, Ecclesiam Dei habentem scholas, & auditores, seu collegia docentium, & dissentientium posse, & debere dare testimonia auditoribus, sicut testantur litteræ, quæ vocantur formatæ. Vult inde confici, quemvis suorum cœtum, honores Academicos, sine Pontificis, vel Cæsaris auctoritate mandare posse. quia gradus nihil aliud sunt, nisi hæc testimonia. Non disputo, quām imperitè gradus Academicici formatiis veterum litteris comparentur, cùm hæ fuerint fidei, & communionis Catholice, illi egregiae cuiusdam sint, & præstantis eruditioñis testimonia. Sed faciamus inter hæc nullum esse discrimen. Nego valuisse formatas litteras à quocumque cœtu datas: contendo earum vim non solùm scribentis judicio, sed etiam recipientis approbatione niti oportuisse. Itaque S. Augustinus, cùm Fortunius Donatistarum Episcopus, Ecclesiam suam Catholicam esse contenderet:

Epiſt. 163. Quarebam, inquit, utrūm epistolæ communicatorias, quas formatas dicimus, posset quòd vellem dare? atque addit: Parabam autem, ut si consentiret, ad illas Ecclesias à nobis tales litteræ mitterentur,

quas

quas in Apostolicis auctoritatibus pariter legeremus illo jam tempore fuisse fundatas. Falsum igitur est quemvis cœtum, qui sibi Ecclesiae DEI nomen arrogaret, formatas litteras, id est, ut Philippus interpretatur, doctrinæ testimonia, suis auditoribus dare potuisse, quæ apud rectè sentientes pondus habarent, nisi essent Apostolicæ Ecclesiae sententiâ comprobatae. Quæro igitur ex Philippo, num Ecclesia Romana, in qua, ut loquitur idem S. Augustinus, *semper Apostolicæ Cathedra viguit Principatus*, testimonia, quæ ab eorum cœtibus doctrinæ auditorum tribuuntur, admittat, & probet? Negabit, sat scio. Quid ergo formatas nobis objicit, cum ex solæ veterum testimonio formatæ Catholicam, veram, puramque doctrinam ostenderent, quæ non essent à societate Romani Pontificis alienæ? Ita enim Optatus Milevitanus, Augustino vetustior, ut ostenderet suam Ecclesiam esse Catholicam, non Donatistarum; recensitis ordine inde à S. Petro omnibus Romanis Pontificibus, usque ad eum, qui suâ vivebat ætate, cum quo, inquit, *nobis totus orbis, commercio formatarum, in una communionis societate concordat.* Errat verò Philippus, cùm sperni, & repudiari Pontificis auctoritatem posse credit, eò quòd Christiani, Juliani temporibus proprias scholas, & proprios cœtus dissentium instituerint, tametsi ille edicto prohiberet admitti Christianorum liberos in scholis publicis. Christianorum enim scholæ, Juliani imperio, civilibus duntaxat immunitatibus, & commodis carebant, quæ sola ab Imperatoribus proficiisci possunt: laudem verò certæ, & constantis de religione sententia earum nulla amiserat, quæ quidem Romani Pontificis auctoritatem sequeretur. Neque enim minus Juliani, ac postea Valentini, & Valentis principatu, Catholici, ut probarent, sibi pro veritate, Donatistis pro mendacio dimicationem esse suscepit, illa Optati oratione utebantur. *Quæ, inquit, apud vos veritas inveniri potest, cui Catholica videtur obſistere? aut quod apud nos esse mendacium poteris approbare, in una communione esse cum toto orbe terrarum?* Nunquid poteris approbare mendacium, symbolum verum,

*Ep. 162.
Lib. 2. ad
Parmen.*

Ibid.

Lib. 7.

d

& uni-



& unicum retinere & defendere? Nunquid poteris approbare mendacium Cathedram Petri, & claves regni calorum à Christo concessas, ubi est nostra societas? Fateatur ergo Philippus, aut in veterum Formatibus litteris nihil ad tuendas Academias positum esse præsidii, quæ sine Pontificis auctoritate, nutuque fundantur, aut certè, si, ut pars est, nefas esse putat à sententia ejus ætatis discedere, quâ integrum, puramque Ecclesiam fuisse confitetur; Burenianam certè orationem, quam suâ præfatione sibi laudandam putavit, & totum ejus consilium damnet necesse est. Quid enim stolidius, quâm eam Academiam in cœlos ferri, cui Pontificis auctoritas ludibrio sit atque despectui, cum gravissimi & vetustissimi Patres, totius orbis consensu, testentur, absque ea veritatem retineri nullo modo posse? Num verò magis Academia sine veritate, quâ mundus sine sole constare potest? Merito igitur te, Princeps Illustrissime, posteri omnes amabunt, atque in oculis ferent, qui cum, hâc Academiâ fundandâ, viam aperire, & munire velles ad veritatem, eam unam tibi sequendam putasti, quâ tot innocentissimos, sapientissimosque homines ad illam pervenisse, nemo, qui se modò sapere profiteatur, ausit diffiteri.

CAPUT XII.

*Contra Jordanem Canonicum Osnaburgensem, qui unam
in orbe terrarum Parisensem Academiam volebat.*

Verum exorietur fortasse nonnemo, Princeps Illustrissime, qui cum in magni beneficij loco ponat, nullam adhuc in Westphalia pravis infectam opinionibus Academiam extitisse, neget tamen etiam recte sentientium numerum augeri oportere. Sunt enim quidam homines ita tetrici ac morosi, ut qua in re ipsi commodo aliquo sint affecti, in ea cæteros absque codem versari, ferre nullo modo possint. Atqui ii, si qui tamen erunt, fortasse Jordanis Canonici

nonici Osnaburgensis, qui Rudolpho Habisburgio Cæsare floruit, se auctoritate tuebuntur. Is in libro de translatione Imperii ad Germanos, censuit, quemadmodum una esset Ecclesia Romana, quæ cæterarum mater esset ac magistra, ita satis orbi terrarum esse unam Academiam Parisiensem, à qua bona omnes artes, quæ ad orthodoxam doctrinam tuerandam & ornandam sint opus, ab omnibus gentibus peti possint. Quæ opinio totius jam propè orbis consensu, & institutis, tot jam exortis novis gymnasiis pridem est confuta. Ac Parisiensem quidem Academiam, propterea quod antiquitate facile cæteras omnes antecellat, semperque viris eruditissimis & gravissimis abundarit, equidem omni veneratione complectendam esse judico; præsertim, quod eam idem ille Carolus, eodem quo hanc nostram, & finitimas Westphaliæ, Saxoniamque Cathedrales Ecclesiæ, animo illo suo verè magno, & incenso de humano genere bene merendi studio fundaverit. Sed vereor ne parum intelligent, qui hæc disputant, in quo sita sit vera Academiæ nobilitas, qui totam ejus gloriam angustis unius urbis finibus terminari volunt: cum hominibus eruditione præstantibus, ex ea, velut equo Trojano, depromptis, atque in alias velut colonias dimissis ac distributis, latius multò & fructum ejus, & famam amplificatam ac diffusam esse videamus. Certè hæc ipsa J E S U Societas, quæ ut alia complura, toto orbe Christiano, ita hoc Paderbornense gymnasium tuâ, Princeps Illustrissime, voluntate moderatur ac temperat, in Academia Parisiensi primùm est exorta, & decem illi Patres, qui eam primùm certis legibus institutisque devinxerunt, in literis Apostolicis, in Universitate Parisiensi graduati, & in Theologicis studiis per plures annos exercitati sive memorantur. Quod si, è Jordanis præcepto, Lutetiae in aliquo gymnasio delitescentes, iis duntaxat doctrinæ suæ lucem impertivissent, quibus fuisset ad eos audiendos conveniendi facultas, nulla propè jam esset Christiana natio, quæ non aliquot eruditorum hominum millia, quæ postea ex hujus Societatis disciplina

Pauli III.
ann. 1540.
Julii 3.
ann. 1550.

d 2

pro-



Lib. 2. prodierunt, desideraret. Neque verò, propterea quòd Romana Cathedra à C H R I S T O sit constituta, in qua una Cathedra, ut loquitur Optatus, unitas ab omnibus servaretur, ne ceteri Apostoli singulas sibi quisque defendenserent: ut jam schismaticus, & peccator esset, qui contra singularem Cathedram alteram collocaret: non, inquam, consequens est unam duntaxat Academiam esse debere. Quoniam enim fieri non posset, ut omnes Ecclesiæ partes, instar unius corporis, inter se cohaererent, nisi C H R I S T I instituto, unius, quod sub aspectum caderet, capitis auctoritate tenerentur, ideo non du-
Epist. 8. ad plebem. bitamus pronunciare cum D. Cypriano Martyre: *Deus unus est, & Christus unus, & una Ecclesia, & Cathedra una super Petrum Domini voce fundata.* Quòd si ad idem exemplum formandæ essent Academiæ, concluderetur non unam omnino solam, ut argumentabatur Jordanes, sed unam quæ auctoritate, & imperio quodam ceteras contineret, & gubernaret esse oportere. Sed ne id quidem necesse est. Dum enim Academiæ inter partes Ecclesiæ, ut verè sunt, censemuntur, licebit quidem opinionibus, de quibus in utramque partem integra religione certatur, inter se dissentiant: in iis verò quæ capita sunt ac firmamenta salutaris doctrinæ, ne distrahanter in factiones, eadem eas, quæ universam Ecclesiæ, auctoritas colligabit.

C A P U T XIII.

Cur expediatur plures Catholicas Academias institui.

Est nihilominus hodie quoque nonnullis, quibus est pri-
 vatus quæstus reipubl. commodis potior, permolesta
 Academiarum novarum omnis institutio. queruntur
 enim nescio quid de splendore & celebritate veterum gy-
 mnasiorum, novis fundandis, quotidie detrahi. Quæ ratio si
 maiores nostros movisset, ne ea quidem extarent, pro quorum
 isti honore decertant. Etenim ante annum à C H R I S T O na-
 to

to M. ccc. una, & fortasse altera erat in Germania Viennæ, & Augustæ Trevirorum Academia. Nihil tamen illæ caussæ dicere potuerunt, quin proximo consequenti seculo Heidelbergensis, Pragensis, Coloniensis, atque Erfurtensis fundarentur. Aucto, ut sit, numero, illustrior quoque cœpit esse earum utilitas. ergò post annum M. cccc. Lipsiensis, Ingolstadiensis, Lovaniensis, Rostochiensis, Gripswaldensis, Friburgensis, Tubingensis, Mōguntina ad veteres illas accesserunt. Num hæ tamen majoribus nostris multæ visæ sunt? num à novarum studio hâc veterum multitudine sunt retardati? Nonne post annum M.D. Wittembergæ? nonne Francofurti ad Oderam? nonne Dilingæ, Heriboli, Græcii, & aliis Germaniæ locis novæ Academiæ extiterunt? Nimirum si, ut ait Sapiens, *Multitudo sapientum sanitas est orbis sap. 6.* terrarum, poterantne dubitare, quin è salute esset Reipub. quamplurimis locis accendi studia sapientiæ? Veniebat verò nonnumquam usu, ut exorto bello, aut simili publicâ calamitate aditus ad longinquæ gymnasia adolescentibus intercluderetur, quibus multos sæpe annos tam necessario frumentu carendum fuisset, nisi provisum esset à Principibus, ut uno obsepto, alia litterarum studiosis paterent loca. Quid privatorum inopiam commemorem, quibus nisi oblata essent adjumenta discendi, quantas hodie respub. utilitates, & ornamenta requireret? Quid? quòd Ecclesiæ rationes ita flagitare videntur. Quâ enim illi re tam opus est, quâm eruditis Parochis? nam quod oppidum, aut quis vicus paullò frequentior tali non eget? præfertim hâc nostrâ tempestate, qua nisi hominum animi doctorum præsidii tegantur, vix est ut planorum, & impostorum manus evitent. Jam verò Parochi munus non valdè ab iis expetitur, qui complures annos studia litterarum peregrè suis impensis coluerunt. De publico verò, si quot satis essent, in hanc spem, procul patriâ alerentur, propè in immensum prodirent sumptus, cùm opportunitates decessè non possint, quibus minus difficuler sustineantur domi. Adolescentibus verò ipsis u-

d 3

trum



LIBER I.

30

trum tandem ad disciplinam est conducibilius, in suorum conspectu arctè attenteque haberi, an inter alienos in summa impunitate versari? præsertim cùm jam multiplicatis ubique scholis, & breviori repertâ ad eruditionem viâ; iis doctrinis hodie pueri imbuantur, quas vix olim viri degustabant. At illa ætas mollis ac tenera, non certè est ad peregrinandum apposita. quippe facilè remotis custodibus, alienos minusque commodos mores induit. Id quod esset valde proclive, si ad paucas urbes immensi adolescentium greges confluenter, qui neque propter imprudentiam sibiipsis imperare, neque propter multitudinem à moderatoribus cognosci, nedum regi possent. *Quod enim sapienter dictum est ab Aristotele, multitudinis, ut rectè gubernari possit, modum quendam esse oportere, id maximè in moderanda teneriore ætate valet, quæ sine intenta observatione, assiduaque custodia difflit atque corruptitur.* *Quod utinam hujusc rei pauciora exempla haberemus, neque liceret Academias florentes olim, nunc rectorum socordiâ eò prolapsas commemorare, ut adolescentes, qui ad eas mittuntur, vix pluribus annis doctiores, at paucis mensibus certò flagitiosiores evadant.* Nam quid attinet earum meminisse, quæ à majorum religione desciverunt? videntur ne vel hæ solæ satis justam novis instituendis caussam dedisse? Certè cùm Joannes Hussus perversis Wiclephi opinionibus imbutus Academiam Pragensem perturbaret, novamque ejus gubernandæ formam suis conseeleratis consiliis opportunam moliretur inducere, in paucis diebus tria admodum Germanorum millia cum suis professoribus, viris Catholici, Lipsiam commigrarunt, ibique novæ Academiæ, in qua sine religionis labore studia litterarum tractarent, fundamenta jecerunt. Ita enim verum esse censebant, ut simul aliqua Academia fese abruperit à societate rectè sentientium, evestigio exoriantur alia, quæ illius damnum novo ardore & industriâ dissolvat atque compenset. Et tamen postquam non modò in plurimis Academiis jactura est facta, verùm etiam tot populosissimæ gentes à nobis avulsaæ, novis quotidie de reli-

*7. de rep.
cap. 4.*

*Aeneas Syl-
vius hisp.
Bohem. cap.
35.
Nauclerus.
Bonfin.*

religione doctrinis ludos aperiunt, erit quispiam Catholius tam à studio avitæ religionis aversus, ut molestiam capiat animo, cùm à viris Principibus tot mortalium errorem miserantibus, opportunis locis gymnasia salubribus, nullaque peste contaminatis litteris excitantur? At enim, inquiunt, Academiarum nostrarum honorem, & antiquissimum decus tot novarum accessione infuscari nolumus. Itane? tot populorum salus vestro isto fumoso nomine vobis est vilior? Quid enim? quacumque circumtulerimus oculos, plena sunt omnia naufragiis misérorum. hic si quis unde unde licuerit, validas, novas, omnibus rebus instructas naves contrahat, è propinquo pereuntibus signum ostentet, adnatantes accipiat, omnique ope reficiat, vos scilicet, Viri Sapientes, indignum facinus exclamabitis: obscurari illius navis gloriam, quâ recti Argivi delecti viri!

Petebant illam pellem inauratam arietis. illam unam toto mari requiri, illam concendi debuisse. illam qui nancisci nequiverit, eum scilicet fluetibus, diisque marinis esse permittendum. Quantò Academiis veteribus esset glorioius, prognatis novis, acuere studia litterarum, intendere professorum assiduitatem, juvenum animos laudabili æmulatione inflammare, denique partam à majoribus gloriam non socios laborum refugiendo, sed industriâ omni vincendo, tucrì ac propagare? Jam verò languentibus studiis, laxatâ disciplinâ, jacentibus bonis moribus, inscitum est profectò bonas artes accusare, si tam malis modis acceptæ, nova sibi domicilia circumspexerint.

C A P U T XIV.

Gratiæ totius VWestphaliae nomine.

DE hac tamen, Princeps Illustrissime, abs te constituta Academia, locorum intervalla, quibus sane non modicis hæc urbs abest à veteribus gymnasiis, omnem eripient querendi & indignandi locum. Quàm verò omnibus

bus Westphaliæ Ordinibus jucundum acciderit hoc beneficium tuum, satis hæc Academix tuæ natalem celebrantium, gratulantium, gestientium frequentia, & inusitati plausus ostendunt. Quis enim est omnino summorum, mediorum, infimorum, cuius non os ipsum, atque vultus exultantes tibi gratias agere videantur? Tu enim, Princeps Illustrissime, unus post hominum memoriam, ita de Westphalia universa es promeritus, ut cùm ad te una duntaxat Episcopalis Ecclesiæ administranda delata sit divinitus, tamen eas quoque in quibus Episcopale munus non sustines, Episcopibus jam tibi meritis, iisque immortalibus obstrinxeris. Quid enim tam dignum Episcopo, quâm in omnem retrò ætatem providere, ut omnibus scientiæ, & integritatis artibus erudiantur, qui sunt aliquando in Ecclesiasticorum hominum numerum allegendi? quâm divinarum humanarumque rerum cognitione præstantes cùm inferioris loci Clericos, tum Scholasticos, Decanos, Præpositos, aliosque magnates tanto antè fingere, & formare? Atqui hoc abs te commodum, Princeps Illustrissime, non minùs ceteris Westphaliæ Ecclesiis, quâm huic tuæ, promptum est ac paratum. De quo quidem adsunt viri natalibus, virtute, dignitate spectatissimi, qui suarum tibi Ecclesiæ nomine gratulentur, & quod jucundissimum tibi gratiarum genus esse solet, hoc se tuo beneficio quamprimum, ac deinceps perpetuò usuros profiteantur. Quid? nobilissimus equester ordo, qui, jam inde à primis harum Ecclesiæ primordiis, suos in iis liberos D E O, Ecclesiæque commodis, & dignitati omnibus seculis consecravit, quantas tibi gratias, & laudes habet, ac dicit, quòd illos in ipsis modò patriæ ulnis, ad omne Ecclesiastici hominis officium, & decus affuefacere, omnibusque necessariis litteris perpolire tuo beneficio liceat, cuius antè gratiâ, magnâ patrimonii jacturâ, exiguo sâpe profectu, longinquis gymnaſiis committebantur? Nam quid ego singulorum studia atque gratulationes exequar? Quantas enim spes omnium mentibus hâc tuâ munificentâ attulisti? Quis nunc

est

est tam humilis, atque inops, qui in hac tam prompta atque expedita ad eximiam quandam eruditionis laudem perveniendi facultate, non aliquos suorum posteriorum omni genere litterarum ornatos? non aliquod familiae præsidium? non aliquod Reip. lumen jannunc animo præcipiat, atque expe&ctet? Jam verò, Princeps Illustrissime, noli putare non eos quoque qui aliter atque nos de Religione sentiunt, hujus gratulationis esse participes. Abjecerunt illi jampridem, atque detestati sunt (præter Anabaptistas) veterem illam Lutheri sui Academiis, & honestis disciplinis maledicentis insaniam. Vetant nos spem despondere salutis suæ, qui tametsi ab Ecclesia se removerunt, non tamen passi sunt densis illis ignorantia, ac barbariae tenebris, quas ille, ne quando claram lucem aspicerent, eis offundere moliebatur, sibi ad eam aditum intercludi. Quod si quis erit omnino in Westphalia, cui stomachum moveat hæc arx omnis salutaris doctrinæ, adversus eorum errores abs te collocata, is reputet hoc eodem loco posita quondam à Carolo Magno Augusto castra, quibus universam Westphaliam sibi, & C H R I S T O subegit. Quis verò post illam victoriam fuit in Westphalia tam demens, qui negaret illa Caroli arma salutem Westphaliæ peperisse? quis ab eo vietus est, quin gratias se debere vitori fateretur? Ne dubita, Princeps Illustrissime: D E U S castris non jam armorum, & militum, sed salubrium doctrinarum in hac Urbe positis, indè ei salutem instaurare meditatur, unde primùm olim oblata est. Oppugnantur nunc hæc castra, ut quondam illa adversariorum odiis, sed ubi semel manus dediderint, agnoscent contra suam se salutem dimicasse. Erunt etiam quibus quæ illis modò terrori sunt, & molestia, in delicias quondam & mella vertantur. Jam enim prospicio compluribus eventurum, quod de se, postquam à Manichæis ad Ecclesiam se retulerat, narrat D. Augustinus: *Nunc, inquit, ubera Ecclesiæ, post longissimam fitim penè exhaustus, atque aridus tota aviditate repetivi, eaque altius flens, & gemens concussi, & expressi, ut id manaret, quod mihi sic affecto ad*

*Lib. de util.
cred. cap. 1.*

e recrea-



recreationem satis esse posset, & ad spem reducendam vite, ac salutis. Neque enim abesse potest, in tanta multitudine honestissimorum hominum, qui magnis ingenii, integrisque moribus prædicti, nullâ animi perversitate, sed solâ ignoratione veri, nobis se morantur adjungere, quin complures sint futuri, quibus gravis illa, solida, constans Catholicæ Ecclesiæ doctrina, tot bonarum artium fulta præsidiiis, inimicas veritati sit opiniones detractura. Quibus detractis, ut nihil est veritatis cognitione dulcius, exardescit nimirum dolore, quod vanislimarum rerum specie tamdiu fuerint ab ea percipienda, fruendaque retardati. itaque inflammati amore ejusdamni compensandi, toti ad illam penitus intuendam & complectendam incumbent. Qui quidem æternum tibi, Princeps Illustrissime, gratias agent, quod perfecto hoc Gymnasio & aditum facilem aperueris reperiendæ veritatis: & eâ repertâ fontem purissimæ & liquidissimæ voluptatis.

FINIS LIBRI PRIMI.



P A.

P A N E G Y R I C I ,
 D I E N A T A L I
 A C A D E M I A E T H E O D O R I A N A E
 P A D E R B O R N E N S I S ,
Ejus Illustrissimo Principi Fundatori oblati,

L I B E R . II.

De Academia Paderbornæ constituta.

C A P U T I .

Proœmium.

Mirificus ille, Princeps Illustrissime, Westphalorum in omnem humanitatem, & scientiam liberalem amor, qui tam uberem hodie omnibus lætitiae, & gratulationis afferre segetem videbatur, idem nescio quid objecit quorundam mentibus, quod eas angat, neque sinat penitus acquiescere. Prædicant illi quidem tuum istum excelsum, totamque, quoad licet, Remp. bene promeritis comprehendere gestientem animum, meritòque hanc Academiam tuam inter præcipua Westphaliæ decora numerant. Verum ut quisque quod valde diligit, id maximi æstimat, ita sunt nonnulli, qui verentur, ne Academiæ dignitati, quam ipsi omni sibi ope ornandam esse ducunt, hic delectus abs Te locus non ex omni parte respondeat. Negant enim Paderbornam tam magnifico Academiæ nomini parem esse. Quibus principio promptum esset respondere, quandoquidem DEI voluntas ita tulit, ut Tuæ potissimum Celsitudini condendæ

c 2

Aca-

Academiae animus esset, ac facultas, mirum nemini videri debere, si principem Imperii auctoritatis tuæ Urbem, præ aliis hoc ornamento decorandam putaris. Cui enim prudenti venire posset in mentem alienam te potius Spartam ornaturum esse, quam tuam? Ad hoc possem istorum orationem refellere, qui Academiam, nisi in ampla urbe, collocari vetant, cum in vicis quoque omni moenium, ac portarum præsidio nudatis nobilia gymnasia sita fuisse prodantur. Atque haec adeò ex Academiis in Remp. non raro fluxit utilitas, ut quæ loca humilia, atque abjecta colere coepissent, brevi in visendam magnitudinem, celebritatemque crescerent. Verum hæc nunc quidem oratione non utar. Quanquam enim confidam ex hac institutione Academiae, insignem cumulum ad Paderbornæ pristinam dignitatem accessurum, me tamen dies hodiernus admonet, ne in animo cuiusquam hanc patiar opinionem residere, eorum ornamentorum, quibus opus est ad idoneam sedem nobilium artium, ullum ei defuisse. Id quod ego tam firmis, illustribusque argumentis me confirmaturum esse confido, ut tametsi in manu tua fuisset ac potestate, in qua Westphaliae urbe Academiam poneres, ceterisque omnibus consulto Paderbornam antetulisses, nemo id injuriæ factum esse, jure queri posset.

CAPUT II.

*Academie fundatio Episcopum maximè decet. Paderborna
Episcopalium VWestphaliae urbium dignitate prima.*

ATque illud quidem nemo non rectè, & ordine factum fatetur, quod ab Episcopo, & sacro Principe hoc tam salubre consilium, & cura suscepta sit. est enim finitima procuracyi sacrorum, litterarum & doctrinæ cura. Nam cum Episcopi proprium sit salutaris doctrinæ tradendæ munus, sitque ei, si quid minus sanum vulgo seratur, omnis culpa præstanta; præclarè ex eo ratiocinatur Alexius Connexus,

In Novell.
capit. 6.

nus, eum cui publicè fit docendi potestas, ad levandum onere Episcopum accedere. Non quod, ut imperitè quandoque docuit Lutherus, renunciatio Doctorum in Academiis nihil distet ab ordinatione, & initiatione legitimorum Ecclesiæ Ministrorum & Pastorum: Sed velut de Rege sapienter scriptum fecit Xenophon, ei multis auribus, multis oculis Lib. 8. de
Instit. Cyri. opus esse, qui sunt viri rerum usu & prudentiâ excellentes, ita de Episcopo scitè dici potest, ei plura quoque ora esse oportere, quæ populum erudiant. Quocirca decernit ibidem Imperator, ut tametsi Constantinopoli vœtigalia doctoribus ab Imperatore sint constituta, ipsi tamen nonnisi ejus urbis Archiepiscopi auctoritate ad docendi munus deligantur. Ex quo observat vir juris consultissimus Petrus Tolosas, ita re- De rep. I. 18.
c. 3. §. 8. Etiam rationem flagitare, ut qui in publicis Scholis juventutem erudiunt, ii ab Ecclesiæ Præsulibus potestatem, vœtigalia à civili Principe consequantur. In Westphalia autem cùm Imperator Carolus Magnus Episcopis jure suo cesserit, atque ita hos populos, ut ipse loquitur, *pro amore illius, qui ei victoriā contulit, ipsi tributarios & subjugales devotē addixerit*, næ is Episcopus omnes penitus officii sui partes intelligit ac perspicit, qui turpe existimat ex opibus, quas civilis Princeps bello partas sponte Ecclesiæ commodis consecravit, non quantum Resp. flagitat, in doctrinarum cultum derivari, quem ille, si eas retinuisse, omni ope alere, & ornare sui munieris esse duxisset. Ac licet omnes Westphaliæ Episcopi in eadem esse caussâ videantur, tamen quoniam non videbuntur rationes Ecclesiarum exposcere, ut in singulis Academiæ sint: ubi id in quæstionem vertitur, ad quem ex omnibus hæ partes sint deferendæ, equidem censem eum, cuius Ecclesia dignitate cæteris antecellat, præclarè facturum, si, cùm ita tempora Recip. postulabunt, ultrò eas ipse sibi deposcat. Ferre enim, cui excelsiore locum majores nostri tribuendum putarunt, ea Ecclesia opportunitate regionis, splendore, aliisque rebus est ornata, ut cùm amplitudinem quandam suo Antistiti possit ejus nomen afferre, verendum non sit, ne fa-

pientiae cultoribus non sit ornamento. Jam verò inter Westphaliæ Antistites Paderbornensem obtainere longè principem dignitatis gradum, nemo est qui ignoret, nisi qui in ratione Conciliorum Ecclesiasticorum, Conventuumque Imperialium, & omnis memoria vetustatis ruditis sit, atque peregrinus. Et erit quispiam qui miretur, in ea Urbe constitui primam Westphaliæ Academiam, in qua tot sœculis sit Ecclesia Cathedralis, cui cæteræ & antiquitate, & opibus, & provinciarum amplitudine, clientelisque florentes non dubitent de honore concedere?

CAPUT III.

*Religio Christiana Paderbornâ manavit in universam
VVestphaliam. Bonæ litteræ in VVestphalia ab
initio comitatæ religionem Christianam.*

DEINDE cui dubium est, quin Christiana religio Paderbornâ, velut à capite, in universam Westphaliam permanarit? Etenim gente universâ à Carolo Magno perdomitâ hic prima Synodus est habita, in qua primoribus, magnâque populi multitudine baptismo lustratâ, salutares primum rogatæ leges, & jura sancta sunt. Itaque vir eruditus, & pius, qui Arnulfi Cæsaris ætate studiis litterarum, & sanctimoniarum florebat, pulchrâ sanè imagine, Paderbornam apud Gobelin. in Cofnod. et. 6. c. 38. eum locum esse scripsit, ubi duri ad eam diem, atque instar silicis indomiti Saxonum animi, ferro D. Caroli ieci, tandem in scintillam Christianæ fidei emicuerint. quæ scintilla in immensum postea crescens incendium, non Saxones modò omnes, sed Vandalo quoque, aliasque remotissimas gentes corripuerit. Unde idem existimavit Paderbornensi Ecclesiæ rubram crucem pro insigni reliqtam esse, quod in ea primùm Saxones, & Westphali cruentis Caroli præliis compulsi, sub hoc C H R I S T I signo militare coepissent. Quid tum postea? dicet quispiam, sit sanè Westphaliæ Religio primùm natâ Pa-

ra Paderbornæ. num ideo Academiæ insignibus una digna est? non equidem id nunc pugno: sed tamen æquum esse censeo, ut qua ex Urbe tota olim Westphalia haufit Religio-nis initia, in ea ne ægrè ferat domicilium construi, unde o-minum, quæ quidem religioni ancillentur, artium ratio pe-tatur. Equidem ipsas artes existimo, si rogarentur qua in Ur-be Westphaliæ certam sibi sedem figi vellent, non aliam de-lecturas, atque eam, quam Religio, unde in omnes plagas se latè diffunderet, primam optaslet. Etenim illæ postquam u-nâ cum Religione indè ab ultima Britannia in has oras navi-garunt, omniumque fuerunt ejus periculorum participes, tandem in hac Urbe unâ cum illa primum stabile domicilium collocarunt. Constat enim sanctissimos illos viros, qui ex ea-dem prognati Saxonum gente, in Britannia, missam sibi Ro-mâ & fidei, & doctrinarum lucem hauserant, neutiquam commisisse, ut cognati Saxoniæ & Westphaliæ populi alter-utram ad se non importatam esse jure queri possent. Sic e-nim viderant à suis illis in Britannia præstantissimis magistris usurpari, ut arctissima semper retineretur inter Religionem, Doctrinamque concordia. Cujus instituti præcipuam sibi laudem vendicat Theodorus Archiepiscopus Dorovernen-sis, qui natus Tharsi urbe Ciliciæ, à Vitaliano Papa initiatu-s, in Britanniam venit anno C H R I S T I D C L X V I I I . Is cùm sacris profanisque litteris esset insigniter eruditus, ha-beretque suorum laborum socium, atque comitem Adria-num Abbatem natione Afrum, virum item doctissimum, mi-rificum studiorum ardorem in Britannia omnium animis in-jecit. Audi enim quid de utroque narret venerabilis Beda.

Quia, inquit, *litteris sacrī, simul & secularibus, ut diximus, lib. 4. his
abundanter ambo erant instructi, congregatā discipolorum catervā,
scientiæ salutaris quotidie flumina, irriganda eorum cordibus ema-nabant, ita ut etiam metricæ artis, Astronomicae, & Arithmeticæ
Ecclæsticæ disciplinam, inter sacrorum apicum volumina suis au-ditoribus contraderent. Indicio est, quòd usque hodie supersunt de eo-rum discipulis, qui Latinam Graciamque linguam æquè ac propriam,
Lib. 4. his
Eccl. Angl.
cap. 2.*

in.

in qua nati sunt, norunt. Neque unquam prorsus ex quo Britanniam petierunt Angli, feliciora fuere tempora, dum & fortissimos Christianosque habentes Reges, cunctis barbaris nationibus essent terrori, & omnium vota ad nuper audita cœlestis regni gaudia penderent, & quicumque lectionibus sacris cuperent erudiri, haberent in promptu magistros qui docerent. Delectat me, fateor, Princeps Illustrissime, hæc sanctissimi, & eruditissimi Theodori memoria, vel eò, quod te ejusdem auspiciatissimi nominis Praesulem, sentiam eandem temporum felicitatem Westphaliae conciliare conari. Quid enim aliud agis, quid moliris, nisi ut Respub. pacis otio, & tranquillitate aliquando reddita, omni divinæ humanæque sapientiae ubertate perfruatur? Hujus è Theodori ludo prodierunt viri illi sanctissimi Bonifacius, Suibertus, Ewaldi & alii, qui paullò post ejus excessum, ut hanc, vicinasque terras C H R I S T O subjungerent, inde sunt profecti. Non enim illi solam religionis, verùm etiam omnis liberalis doctrinæ lucem se afferre profitebantur. Sed nimurum diu nimium nostrates utramque sunt aspernati: diu frustra stabilem in Westphalia sedem, & domicilium quæsierunt. Siquidem inter assiduos fremitus armorum, & rebellium bacchationes nusquam tutò tempula, nusquam Scholæ ponebantur. Interea extra Westphaliam, qui è media patriæ jacketione eripi poterant, sub idoneis magistris Westphali adolescentes Christianis moribus, & doctrinis utcumque tinebantur. Nam Trajecti ludus erat, quem D. Gregorius regebat, D. Bonifacii Martyris auditor. In eo S. Ludgerus, qui deinde primus Monasterii Antiftes fuit, erudiebatur, & una

*S. Ludgerus
in commem.
de SS. Boni-
facio, &
Gregorio.
Vide Baron.
in Mart, ad
10. Nov.*

cum eo, ut ipse loquitur, quidam de novella Dei plantatione diebus nostris inchoata Fresonum & Saxonum. Wirceburgi quoque D. Caroli voluntate duodecim nobilissimi adolescentes, D. Burckardi praceptis imbuebantur, è quibus duo primi Paderbornensis Ecclesiæ Praesules sunt delecti. Quid quod ejusdem Imperatoris instituto Romæ ejusdem gentis quasi quoddam seminarium fuit, quod Schola Saxonum dicebatur, non longè ab æde S. Petri, ut in ipsa quasi Catholicæ Religio.

ligionis arce unà pietatem litterasque condiscerent? At verò postquam Magni Caroli invictâ virtute in Paderbornensi Synodo totius Westphaliæ consensu C H R I S T I fides suscepta est, noluit illa sine comitatu bonarum artium ac disciplinarum, quas constantissimas adversis suis rebus comites habuerat, patefactos jam sibi Westphaliæ fines ingredi. Idem igitur dies, eadem Synodus, eadem Paderborna omnium quæ deinde in Westphalia extiterunt, & templorum & Scholarum, uno eodemque decreto fundamenta posuit. Parne erat eam ejus boni expertem remanere, cuius ipsa cæteris uribus ac terris tamdiu frustra expetitam facultatem obtulerat? Potestne illa indigna videri, quæ omnium disciplinarum honestarum vocibus personet, in qua primum illa vox audita est consentientis conspirantisque Westphaliæ, ut armis positis, abjectâ impietate, exturbatâ barbariâ, pax, religio, humanitas, & humanitatis parentes bonæ litteræ colerentur?

C A P U T IV.

*Olim quoque & inferiores & sublimiores doctrinæ
Paderbornæ floruerunt.*

V Ide, Princeps Illustrissime, quæ mens fuerit majorum tuorum, gravissimorum hujus Urbis Antifitum, quibus non mediocri studio fuit, in ea omnium artium studia nutrire, quibus salutaris fides propagatur atque defenditur. Intelligebant enim Westphalis usuvenisse, quod alicubi confirmat Augustinus: *Multis, inquit, profuit (quod experimentis probavimus, & probamus) prius timore vel dolore cogi, ut postea possint doceri.* Igitur quo in loco, terrore armorum fortissimi Imperatoris compulsa Westphalia, Christiana sacra suscepserat, in eo providendum sibi putarunt, ne unquam decessent magistri exercitationesque doctrinarum. Quæ tametsi nullo fere tempore omnino jacuerunt, fuit tamen cùm eo ardore celebrarentur, ut, præter hodiernum Academiarum f nomen,

Ep. 20. ad Bonif.



LIBER II.

42

Vita B.
Meinwerci.
c. 52.

nomen, nihil admodum desiderares. Quā enim tempestate, ut alios præteream, Meinwercus ille Paderbornæ nobilissimum decus, ad clavum hujus Ecclesiæ sedebat, non modò optimi Latinitatis auctores Sallustius, Virgilius, Statius explicabantur, verum etiam florentissimi adolescentes, Rheticis, Dialetticis, Arithmeticis, Geometricis, Physicis, omni denique genere liberalis eruditionis informabantur. Ejus vestigiis cùm alii deinceps Antistites, tum præcipueis qui duodecimo loco huic Urbi præsedidit, Imadus, ipsius Meinwerci è sorore nepos, institit; qui severissimā avunculi disciplinā, à pauxillo puerō, ad omnem sanctimoniaz sapientiaeque laudem institutus, non commisit, ut tanto viri sanctissimi labore accensa rerum pulcherrimarum studia, suo tempore restinguenterunt. Atque utinam vetustatis injuria, atque crebræ hujus Urbis & primariæ Ecclesiæ deflagrations paullò plura nobis hujus tam præclaræ voluntatis reliqua monumenta fecissent! esset profectò unde liquidò disceremus sapientissimas tuas, Princeps Optime, curas & cogitationes, cum præstantissimis majorum tuorum consiliis ita congruere, ut non tam eorum virtutem æmulando expressisse, quām ipfos tanto intervallo vivos in Te, spirantesque retulisse videaris. Nunc autem, tuarum quidem virtutum formam integram, & undequaque emicantem splendorem intuemur: illorum autem quæ fuerit species, velut è reliquis nobilium statuarum frustis conjecturā assequimur. Cujusmodi sunt versus, quos hic ipse Imadus, de quo nobis est sermo, inscripsit vestibulo voluminis perpetuisti, in quo sunt Philonis Judæi nonnulla monumenta. Id volumen è miserabili naufragio ornatissima bibliotheca, quam ille bonis artibus adjuvandis extruxerat, tuo Princeps Illustrissime munere, unā cum aliis præstantissimis libris, in Collegio nostro visitur. Versus porrò Imadi sunt hi:

Ecclesia Christi, sanctæque Dei Genetrici,

Offert hunc librum devotus Preful Imadus.

Quibus verbis ostendit sapiens Antistes, non sibi modò cu-

12



ræ fuisse, ut perpetuò Religionem honestis artibus copularet, sed etiam cùm immortalium ingeniorum partus ad locupletandam his talibus Ecclesiam perquireret, id perinde D e o gratum existimasse, atque si aras & templa poneret. Qui ita de codicibus, mutisque membranis sentiebat, quid is se facere credebat, cùm ipsos adolescentum animos, quorum paullò post innocentia atque doctrinā Ecclesiæ dignitas niteretur, optimis disciplinis imbueret? Si enim qui rudes hominum animos C H R I S T O conciliant, ii quoddam sacrificii genus, ut est apud Apostolum, D e o faciunt, nihilne Rom. 15.
v. 16. operantur, qui ipsos plurimorum magistros mox futuros omni eā litteraturā expoliendos curant, quā sit opus ad tam augustum, & humano generi salutare munus pro dignitate sustinendum? Evidem nihil dubitem negare ullam hecatomben D e o perinde decoram gratamque esse potuisse, atque ornatusissimus ille nobilium adolescentum cœtus, qui illis temporibus in Paderbornensi Ecclesia, cùm omnium præstantium artium scientiam percepissent, alii ad alias Ecclesiæ regendas vocati, illustribus suam quisque promeritis oraverunt.

C A P U T V.

Viri sanctitate & doctrinâ illustres, qui è Paderbornensi Gymnasio prodierunt.

IN iis fuisset legimus Unwanum Meinwerci, atque Imadi Adam.Bre-
menf.c.86. propinquum, qui è Choro Paderbornensi, ut loquitur Adamus, assūptus, atque à S. Henrico Archiepiscopus Bremensis renunciatus, satis ostendit, præclara se quædam Paderbornæ sapientiae & virtutis rudimenta posuisse. Hic est enim ille Unwanus, qui Bernardum Saxoniæ ducem res novas adversus Henricum sanctissimum Cæsarem molientem, omnes Saxoniæ Ecclesiæ inaudito scelere vexantem, &, quod nefas est dictu, Vandolorum gentem per summam

f 2 im-



LIBER II.

44

impietatem à Christianis sacrī ad Ethnicam superstitionem
minis armisque cogentem fregit, ac domuit. Ille perpetuā
necessitudine doctissimis viris jungebatur, quos partim nus-
quam ab latere suo dimittens, omnibus in negotiis adhibe-
bat: partim ad traducendos ad CHRISTUM populos in
Daniam, ac Norwegiam amandabat. In illo tanta erat flu-
xarum opum despiciētia, ut non dubitaret, ingentibus Ec-
clesiæ suæ sumptibus atque jaētūris, Aquilonares Reges po-
pulosque prenſare, & dum eorum animos CHRISTO con-
ciliaret, fuarum fortunārū detrimēta in lucro ponere. E-
ducatus est deinde Paderbornæ cum Imado S. Anno Archie-
piscopus Coloniensis, ut refert auctōr vitæ B. Meinwerci.
neque refert, quod ejus institutio à Lamberto Schafnaburg-
ensi, & aliis, Ecclesiæ Bambergensi attribuatur. Id enim
cō factum esse suspicor, quod idem deinde Bambergensis Ec-
clesiæ Scholasticus fuit, atque ita cūm in utraque litteras di-
dicisset, potius habita est ratio ejus, in qua præterea docuiſ-
set. Facilè quoque induxerim animum, propter incredibili-
tēm D. Henrici in utramque Ecclesiam amorem & pietatem,
tantis munificentiæ documentis testatam, eā tempestate singu-
larem quandam Paderbornensi, cum Bambergensi Eccle-
sia amicitiam ac societatem intercessisse. nam post mortem
quoque D. Henrici, Poppo Paderbornensis Episcopus, qui
Imado successit, Bambergensis Ecclesiæ Præpositus fuerat:
ut jam non sit necesse pervestigare, quemadmodum fieri po-
tuerit, ut idem S. Anno & Bambergæ, & Paderbornæ sit
eruditus. Porrò de S. Annis laudibus dicere quid attinet?
Cui enim ignota est illius viri prudentia, qui Henrico III.
Cæſare necdum ad regnandum maturo, cūm ejus esset tutor
designatus, universum imperium aliquot annos suis humeris
fusſinuit? quis de ejus facundia nihil legit, quo dicente com-
plorantium gemitu templa personabant? Nam morum san-
ctitas tot miraculis confirmata divinitus, & publicis Eccle-
siæ fastis consecrata latēre neminem potest. Annoni jungi-
tur ab auctōre vitæ B. Meinwerci, in Gymnasio Paderbor-
nenſi

Cap. 52.

Actis IV.

Ibid.



nensi condiscipulus, Fridericus Monasteriensis Episcopus, nempe is qui sextusdecimus est ordine, si Krantzio credimus, Marchionis Misniæ filius. Hic quantum ex Annonis & Imadi contubernio ac condiscipulatu profecerit, perpetuâ in viros doctos voluntate, & singulari quâdam excelsitate mentis ostendit. Fortè cùm Monasterium venisset, repperit viros Ecclesiasticos non paucos, doctos juxta ac pios, laudabilem inter se quandam Religionis & litterarum societatem coisse. Ad hunc coetum, ut est in excellentibus ingeniiis insatiabilis proficiendi cupiditas, sese evestigio aggregavit. Faetus deinde Episcopus ædem Sacram D. Mauritiæ in suburbano extruxit, fundatoque ad eam honestissimo Canonorum Collegio, quantum in se fuit, providit, ne unquam Ecclesiae suæ eorum hominum copia deesset, quorum institutis ac moribus plurimum ducebatur. Et quanquam, cùm infulâ Magdeburgensi à plurimis dignissimus judicaretur, Wenziloni D. Annonis germano posthabitum est, tamen nihil animo fractus, aut dejectus, illustre de se documentum dedit, non esse quod, qui jam indè ab adolescentia virtutum sibi & sapientiæ ornamenta pararunt, altiorem aliis dignitatis gradum invideant, cùm in eorum sit manu, in quo cum fuerint collocati, proprium ei quoddam decus ac splendorem impertiri. Hos consecutus est S. Altmannus, qui, ut loquitur ejus vitæ scriptor, Paderbornæ ad regimen scholarum delectus, multosque annos eo munere præclarè functus, primùm Præpositus Aquisgranensis, ac deinde Episcopus Pataviensis est renunciatus. Is in conventu Triburienſi, ubi Henrico Tertio Imperatore gravissimorum criminum à Principibus reo factò, atque à Gregorio VII. Pont. Max. sacris interdicto, de summa Reipub. agebatur, unà cum Sigehardo Patriarcha Aquileiensi, ejusdem Pontificis vicem egit, vir, ut ait Lambertus, *Apostolicae conversationis, & magnaram in Christo virtutum.* Neque verò præteriri debet Vincelinus, vir longè sanctissimus, quem Holsatiorum, plurimorumque ad Aquilonem populorum Apostolum rectè dixeris.

f 3

*Metrop. l. 5.
c. 8.**Chron. Mo-
nast. MS.*

*Edita à V.
Cl. Sebäst.
Tengnagel
Bibliotheca
Casarea.
Lamb.
Schafn.
an. 1076.*

*Helmoldus
histor.
Slav. l. 1.
cap. 43.
Krantz. l. 6.
Metrop.
cap. 2. Sa-
xon. l. 5.
c. 29.*

xeris. Ad eorum salutem procurandam cùm esset designatus à D E O , essetque insigni vitæ integritate, sed minimè pari doctrinâ præditus, hujus ei quoque comparandæ causum obtulisse dicitur. Versabatur Vicelinus in ulteriori Saxonie, in familia feminæ illuistris, cuius teneros liberos erudiebat. fortè, ut inter potentium asseclas & familiares fieri solet, fuit qui herilem illi gratiam, felicesque successus invideret. Is cum summa viri innocentia nullam obrectandi materiam daret, inscientiam exagitare aggreditur. Promit versum ex Achilleide Statii Papinii, cuius explicatio aliquid supra vulgus eruditio[n]is exposceret. Eum locum sibi explanari convitio flagitat. hic, cùm bono Vicelino hæreret aqua, ille scilicet illudere, & reprobrare, quòd ipse rudis & imperitus alios se docere posse consideret. Pupugit hæc oratio, ut minimè malum, ita neque vilem abjectumque animum. Ergò dolore dissimulato, atque in discendi studium converso, Paderbornam advolat, ubi sub Hermanno viro doctissimo, de omni propè genere doctrinarum scholas celebrari cognorat. Ibi tantum progressionis brevi habuit, ut magistrum subinde in docendo sublevaret, & secundas partes ageret, mox etiam Bremæ Ludum ipse administraret. Aliquot post annis, cùm ferre non posset in Slavorum, sive Vandolorum gente, quorundam scelere, fidem Christianam vulgo abjici, atque prodi, sanctius quoddam docendi munus est exorsus. Trajecto siquidem, cum aliquot ejusdem propositi sociis, Albi, & facta ab Henrico Vandolorum Principe potestate, vigintiquinque ip[er]os annos per incredibiles ærumnas, summamque vitæ sanctitatem, toto animo ad revocandos ab Idolis ad C H R I S T U M populos incubuit. Ad exterritum ab Hartwico Hamburgensi Archiepiscopo, Aldenburi, quæ Ecclesia complures annos Slavorum furore deserta squallebat, jam grandis natu Episcopus est constitutus. In quo dignitatis gradu nihil de illa pristina docendi, miserosque ad frugem reducendi contentione remisit, neque unquam remisisset, nisi plura quotidie pro D E I gloria sancte

sanc*tè* facere, & fortiter pati meditantem mors oppressisset, atque ad partam tot laboribus in cœlo palmam aliquando vocavisset. Hos tales ac tantos viros, cuiusmodi vix singulos singulæ ætates ferunt, uno fermè seculo omnes Paderborna formavit, vel perfecit, quo tempore non in ea modò à civibus, sed etiam ab exteris simul de Christianæ virtutis, simul de ingenuarum artium gloria certabatur. Tunc omnibus persuasum erat, flagitium esse, si, cùm parens liberis patrimonium augere laboraret, animi bona, quibus Reip. profint, habeant necne, flocci non faceret. Tunc majorum insignia, & natalium splendor ei probro censebantur esse, qui, dum per ætatem liceret, propria sibi decora non quæfisi*set*, quibus relictam à progenitoribus claritudinem tueretur, & augeret. Tunc seriò sentiebant viri Ecclesiastici dignitatem illam sui ordinis, quam majores nostri, præ cæteris gentibus, opibus, clientelis, ditione florentissimam esse voluerunt, sine Christianæ sanctitatis, & rectæ scientiæ studiis, in quibus omnis eorum vera gloria vertitur, retineri nullo modo posse. Tunc denique Antistites perinde erant animati, atque Te, Princeps Illustrissime, nunc videmus: ut me hæc ipsa reputantem spes oblectet fore, ut, cùm Tu nobis Meinwerci atque Imadi felicia tempora restituas, si hæc juventus ad omne decus nata, tuis sapientissimis consiliis, optatisque respondeat, ex ea Annones, Altmannos, Vicelinos aliquando videamus.

C A P U T V I .

*Paderborna Imperatorum in VVestphalia
proprium domicilium.*

SPerò equidem neminem fore tam duri oris, qui, cùm tot Reip. lumina se Paderbornæ exortum lucemque suam acceptam ferre testentur, etiam ambigat, sitne Paderborna præstantibus ingenii percolendis idonea. Potest tamen

tamen horum sententia sapientissimorum Principum auctoritate confirmari. Sic enim adhuc in deligendo constitutis Academiis loco observatum est à prudentibus: quibus in Urbibus Principes commorantur, cùdem opera gymnasii celebritate dignas judicari. Primum enim hoc amore Principem in bonas litteras esse oportere, ut eas, quantum fieri potest, assiduo in oculis atque in sinu ferre desideret. Deinde magni referre ad integratatem doctrinæ conservandam, juvenumque licentiam refrenandam, ipso Principe, gravissimisque viris, quorum consiliis in Rep. utitur, arbitris, tractari studia litterarum. Denique, quæ in eligenda sibi sede Principes sequi solent, cali salubritas, soli ubertas, atque amoenitas, eorum quæ ad vietum cultumque pertinent vilitas & copia, secura pax, & tranquillitas, aliæque ejusdem generis commoditates sunt ex ipsæ, quas spectare Academicarum institutores jubentur. Tameris vero quibus locis ii quoque Principes se tenent, qui non in summo sunt totius Reip. gradu, pleraque minimè abhorrent à rationibus hominum litteratorum, tamen quoniam neque illi provincias habent amplissimis regionibus terminatas, neque omnes provinciæ pares rerum omnium honestarum commoditates, perspicuum est, eas demum urbes, ante alias, bonarum artium gymnasii accommodatas esse, quas supremi Reipubl. Principes suo domicilio cohonestant. Porro quamvis in Westphalia nunquam Imperatores nostri stabilem ac perpetuam sedem constituerint, tamen quotquot adhuc in ea versati sunt, non obscurè præ se ferre visi sunt, si quæ eos Reipubl. utilitas in Westphaliæ accerseret, non alibi libenterius, quām Paderbornæ habitatores esse. Atque ut à D. Carolo Magno Augusto exordiar, qui primus hanc terram non tam vestigiis, quām victoriis peragravit, ubi ille crebrius, ubi diutius morabatur? Ubi contrahebat copias? ubi fessas vires recreabat à prælio? ubi audiebat supplices? ubi jus dicebat populis? ubi respondebat legatis? ubi habebat consilium? ubi leges ferebat? Nonne Paderbornæ? Huc ille anno

C H R I-



CHRISTI DCCLXXVII. omnes fermè Saxonie primores congregatos Christiana sacra suscipere, & sacramentum dicere coegerit, nunquam se à JESU CHRISTI fide, nunquam à suo posterorumque imperio descituros. Si fallerent, nihil caussæ dicturos, quin capite deminuti, libertate, fortunisque omnibus multarentur. Hic eodem conventu tres Saracenorum Principes indè ab Hispania profecti, sunt auditæ. Huc anno DCCLXXXIII. ante illustrem illam victoriam, cùm ingenti ad Hasam amnem proelio propè est debellatum, suos conduxit exercitus. Hic biennio post, iterum Concilium habuit, cùm à Carolo Juniore ipsius Magni filio Westphali ad Lupiam fusi fugatique essent, unaque jam illa deliberatio perfectam, constantemque Reip. quietem moraretur, quemadmodum Viticindus, & Abbio perduellum duces, in Regis potestatem venire possent. id quod haud multò post est adeptus. Denique qui tandem potuit luculentius demonstrare, quanti ex omnibus Westphaliae urbibus unam faceret Paderbornam, quam cum anno DCCXCIX. Leonem III. Pont. Max. inauditâ crudelitate conseleratis Quiritibus lingua oculisque captum, & urbe profugum accepit? Erat in Carolo singularis adversus excelsissimum illud Apostolicæ dignitatis fastigium pietas, & observantia. Erat Leonis ea virtus & innocentia, quæ ob admirabilem exercitâ linguâ, erutisque oculis videndi ac loquendi facultatem conservatam divinitus, vel in privato colî mereretur. Ipsa denique tanti viri calamitas omnibus se officiis, atque honoribus leniri, & compensari postulabat. Ad hæc omnia de legit Rex sapientissimus Paderbornam, quæ una tam augusta illi visa est; ut non modò duos simul summos orbis Christiani Principes capere, & complecti posset: sed etiam cum alterius, qui hospitio invitabat magnitudine animi paria facere, alterius qui accipiebat ita diuturnum, & acerbum dolorem, luctumque demere, ut honori non deesset. Neque verò hoc Imperatoris omnium maximi de Paderborna judicium, unà cum ipso extinctum, sepultumque est; sed pervasit, ac permanavit

Anastasius
Bibliothec.
in vita Leo-
nis.

LIBER II.

50

*Annales
Ludovici,
qui Astro-
nomo tri-
bununtur.*

vit ad posterum. Siquidem Ludovicus Imperator cognomen-
to Pius Caroli M. filius, anno CHRISTI DCCCXV. cum
Haraldus Danorum Rex ab armis regno pulsus in ejus fi-
dem atque clientelam se contulisset, opemque posceret, non
solum Saxoniae, sed etiam Vandaliæ proceres huc coegerit ad
commune consilium, cum de his auxiliis Dano ferendis, tum
de ceteris Reipubl. commodis. Hujus quoque filius item
Ludovicus, cui in partitione aviti regni ulterior Germania
obtigerat, postquam Obotritos defectionem molientes, cafo-

Ann. Fran. eorum rege Gozzomvile, bello domuerat, anno proximo se-
quenti, qui fuit à CHRISTO nato DCCCLXV. Paderbornæ
generalem conventum habuit, cui & fratribus ejus Lotharii
Cæfaris, & Caroli Galliarum Regis, atque etiam Norman-
norum, Slavorum, Bulgarorum legati interfuerunt. D. ve-
rò Henrici Imperatoris, ut sanctitate, ita rebus domi, atque
militiae sapienter & fortiter gestis longè clarissimi, egregiam
in hanc urbem voluntatem, quā tandem oratione conse-
quar? Num dies ullus Paderbornæ illuxit gloriosior quarto
Idus Sextiles (qui D. Laurentio Martyri ficer est) A N N I

*Adelboldus
in vita s.
Henrici.* M I I . quo die D. Kunegundis Augusta, D. Henrici non
tam Imperii, quām cœlestis cuiusdam castimonie consors,
in oculis ipsius Cæfaris, atque omnium propè Germanie
Principum, à Willigiso Archiepiscopo Moguntino in æde
sacrarum principe, imposito diademate ritè est inaugurata?

*Ditmarus
Chron. 6.
Idem l. 7.* Quando verò Henricus deinde pedem unquam in Westpha-
liam attulit, quin Paderbornam reviseret? Non anno MXIIII,
cum Paschales ferias; non altero post anno, cum Natalem
Christi hic egit. Non anno MXVII. cum bellum moturus ma-
gnis copiis adversus Boleslaum Poloniæ Ducem Kunegun-
dem Augustam huc accersit. Non propinquâ jam morte, cum
diutius Paderbornæ apud Meinwercum diversatus, incertum
reliquit, plusne amplissimis largitionibus hujus Ecclesiæ
opes auxerit, an virtutem illustribus sanctitatis documen-
tis inflamarit. Quid ejus successor Conradus cognomen-
to Salicus? non ille anno MXV. id est ipso principatus

exor-

*Vita Beati
Meinwerci.
c. 78.*



exordio, *Epiphaniam Domini in Patherbornensi civitate*, ut lo-
quuntur annales, *more regio peregit?* Nonne anno ejusdem
seculi xxx. idem Imperator die **C H R I S T I** natali erat in
Ecclesia Paderbornensi, cùm Aribō gravissimus & integer-
rimus Archiepiscopus Moguntinus, pro concione, iplum
Cæsarem & Episcopos, qui frequentes convenerant, ut si-
bi bonā eorum veniā Romam pietatis causā profici sci lice-
ret, Clerum verò omnem, ac populum, ut remissionem pec-
catorum sibi à Domino exposcerent oravit? Cui affine est,
quod de D. Bardone item Moguntino Antifsite, qui proximè
Aribonem consecutus est, Lambertus commemorat. Is
tam admirabili fuit sanctitate, ut eam **D E U S** luculentis pro-
digiis illustrarit; tam inusitatâ dicendi vi, ut Chrysoftomi
nomen invenerit. Utriusque illustre specimen dedit Pader-
bornæ, coram Henrico Cæsare ejus nominis secundo, vel,
ut alii malunt, tertio. Ibi enim cùm, ut solebat, verba piè
& disertè fecisset in ornatissimo Cæsaris & Principum con-
fessu, ipso die Pentecostes, denunciavit propediem se mo-
riturum, atque eodem mense decepsit. Denique hodie quo-
que visuntur Paderbornæ ædes, quas vetus fama est Henri-
ci IV. Imperatoris fuisse, esseque eas, quibus Leo Ponti-
fex, cùm apud Carolum divertisset, est receptus. Neque
verò nunc attinet aliorum Regum ad hanc urbem accessu,
ludis equestribus, cæterisque celebritatibus commemo-
randis immorari, cùm hæc pauca satis ostendant, quo in nu-
mero ab iis, quos adhuc recensuimus, sit habita, in eodem
Paderbornam superioribus seculis apud omnes prudentes
fuisse, & porrò esse oportere. Verè enim ante annos septin-
gentos ad Bisonem quartum hujus Urbis Episcopum scri-
ptum est ab erudito scriptore de Translatione Reliquiarum
S. Liborii: Inter omnia loca principalibus Ecclesiis consti-
tuendis destinata *speciali quādam dignitate Patherbornensis sedes*
præcellit. Neque immerito ab Erinhero, qui vitam S. Heime-
radi Presbyteri Tutelaris Hasungensis versibus descripta,
appellatur Sedes Regalis. Quid ni enim Regalis, quæ tot

In proemio.

Regum studiis est cohonestata? Referam versus expertes illos quidem artis, sed tamen qui veteris memoriae de Paderborna sententiam sine fuso nobis exponunt. Sic enim ille ingressus sermonem de B. Heimeradi cum Meinwerco Antistite congressu:

Est locus egregius Patherbrunnon vocatus:

Is quoque Regalis Sedes & Pontificalis.

Quod si quis ergo praeterea percunctabitur, quid ita, tot aliis postpositis urbibus, Paderborna publico in Westphalia gymnasio decoretur? is cognoscat Westphalis, qui præ cæteris populis sint appetentes humanitatis & sapientiae, ejus possessionem rem prorsus regiam videri, atque ideo propriam ei sedem ac domicilium, non alibi decuississe, quam in *Regia Westphalia Urbe* collocari.

CAPUT VII.

Nihil Paderbornæ eorum deesse, quæ ad Academiæ splendorem & commoditatem requiruntur.

Sangall. l. I.
cap. 1. de
gestis Caro-
ni M. ET sanè si faciem & ingenium loci intuebimur, fatendum nobis erit, nihil vel à priscis illis Cæsaribus ornatus ad habitationis suæ dignitatem, vel abs Te, Princeps Illustrissime, felicius ad commoditatem studiosæ juventutis reperiri potuisse. Ac primi quidem illi viri sapientes, qui Carolo Magno Cæsare è Britannia delati in Galliam, Parisiensis Academiæ quasi parentes fuerunt, cùm venalem se Sapientiam afferre profisi, interrogati essent, quibus rebus ad rem tantam opus esset, responderunt: opportunis locis, animis ingeniosis, vieti, atque amictu. Atque ingenia quidem, quorum universa Westphalia inprimis est ferax, Paderbornæ deesse non possunt, præsertim cùm eo loco sit sita, ut ad eam ex omni Westphaliæ regione faciles sint accessus. De copia vero rerum quibus vita sustinetur, quæ potest cum ea Westphaliæ pars contendere? Cum enim Westphalia omnis

omnis, quā quidem ad Rhenum & Oceanum vergit, in latissimos expansa campos, ob crebras paludes pastioni sit aptior quam segeti: quā verò Visurgim, & Chattorum juga respicit, pinguiore sit glebā, præterquam ubi saltibus & silvis horrescit; quis non videt opes utriusque terræ eò loci confluere, ubi sita est Paderborna? Hic enim & planities paullatim quasi emersa ex uligine ad declivia montium assurgit; & montes in amoenos colles, lenesque clivos desinentes, ad camporum se valliumque facilitatem inclinant; & vastitas illa silvarum in crebra nemora, & virentes dissecta lucos, agris, hortis, arboretis plurimum relinquunt soli. Itaque nusquam alibi lētiora pascua, nusquam uberiora arva, nusquam villæ cultiores. Quid enim fœcundius eo omni agro, qui ad exorientem solem, & meridiem editior, latèque diffusus, oppidis, vicisque creberrimis colitur? Quid benignius illis ad occasionem, & septentrionem jacentibus campis, quos è montibus, quibus haec urbs utrimque in theatri propè speciem cingitur, plurimi & limpidissimi irrigant rivi? In tanta terræ bonitate, cælique clementia quæ unquam macello, quæ granaario, quæ penui sit egestas metuenda? Quando enim vel hos campos pascua, vel hos agros frumenta, vel hos clivos arbores, hortique fecellerunt? Quid ego de Cereali nostro Baccho dicam? cui & frugem haec pinguisima arva, & liquorem nostri beatissimi fontes suppeditant. Quis illum gustans, Cæcubum aut Falernum desiderat? Habet enim majorem quām vinum sitis levandæ facultatem, neque fere quicquam de calefaciendi stomachi, & adjuvandarum virium virtute concedit. Quòd si, ut est apud Strabonem, Gymnasio libe- Lib. 14.
ralium artium, quod erat Tharsi in Cilicia, Cydnus amnis, Geog.
cujus saluberrima aqua ferebatur, plurimum celebritatis attulit, nihilne habebit ad illustrandam Paderbornæ Academiam, haec salubrium fontium copia, quibus ambigere possis, plusne palati & valetudinis, an aspectus & voluptatis gratiā delecteris? Neque enim sentio quæ possit species esse jucundior, quām trium fontium in media Urbe, ex eodem colle,

colle, modico intervallo exorientium, tantamque subito vim
aquarum erumpentium, ut, non modicis effusi rivis, antè in
unum alveum visendo sanè agmine confluant, complures
que molas frumentarias prius versent, quām se effundant ē
moenibus. quanta amoena singulorum cū seorsim fluunt?
quanta omnium cū uno amne labuntur? quām juvat
aquam ipsam omni crystallo puriore intueri, & innascentes
viridissimas herbulas numerare? quale spectaculum ana-
ticulas, & cygnos videre in mediis undis pendulos, suspensa
caudā, nitentibus contra profluentem pedibus, prono rostro
piscantes? quæ voluptas ne sœvæ quidem brumæ inclemen-
tiā unquam eripitur. Quā enim tempestate nive omnia fœ-
da sunt, & gelu, non modò intra urbem, sed etiam non mo-
dico foris spatio, ne secundū quidem ripas, ut fert mos
cæterorum amnium, vel in tenuissimas crustas conglaciat.
Quid quod codem tempore peregrinas aves ad se noster
amnis allicit, quæ flaviis assuetæ, ubi glacie cæteris prohiben-
tur, ad hunc confugiunt? Æstate verò, potestne quicquam
illis viridariis, hortis, pomariis, quibus utraque ejus ripa præ-
texitur, esse formosius? Non enim nunc vacat aquam com-
memorare totā propè urbe per canales singulari artificio dis-
pensatam, non salientes fontes, non piscinas, non lavatri-
nas, non sexenta commoda. Quod si collibitum erit egredi
urbe, quem non delectet cursum ejus prossequi, modò ple-
no incedentis amne, modò divisis quasi copiis insulas am-
bientis, modò vario flexu, & grato errore per virentia prata
serpentis, modò limpidissimos rivos amplectentis sinu, mo-
dò celeberrimum Romanis annalibus flumen Lupiam, vel
cum jaætura sui nominis generantis? Ab amne verò cū dis-
cesseris, quocumque conjecteris oculos, quanta, Deus bo-
ne! se ubique ingerit in tam illustri naturæ varietate voluptu-
tum seges? Aspice hunc collem, in quo Paderborna non jacet,
sed cubat. potestne fieri quicquam his silvis, quas vertice
ostentat, altius, umbrosius, amoenius? num illo deinde modicè
declivi, sed latissimè se pandente, & quasi venditante agro ve-
nustius?

nustius? Ima denique ejus pars, quæ urbem est complexa, quantis referta est sepium, pratorum, hortorum, nemorum deliciis, sive in umbra requiescere, sive apricari, sive deambulare, sive honestis ludis indulgere libeat? Nam quæ aliquanto longius ab urbe digresso finitimus locis avocare, & tenere animum possint, nimis longum esset enarrare. Neque enim oppidum aut vicum temere reppereris, cui non proprias quasdam opes, & amoenitates natura indulserit? Quòd si Heli-conem gemino fonte insignem Musis poëtæ consecrandum putarunt, quòd illâ venustate plurimum crederent levari curis ingenia, & ad commentandum exacui, quis hanc omnem regionem quæ est sub urbe neget studiis alendis natam? Ut enim ipsam urbem taceam Castaliis fontibus redundantem: ut nihil commemorem de Saltotena oppido, aquâ, unde sal coquitur, nobili: ut præteram Luppespringam, ubi primum est Luppiæ caput, habemus in propinquuo Alpheum, cuius Arethusam frustra rerum naturalium curiosi jam pridem persequuntur. Nempe non longè à nova-Beca oppido rivus est non modicus, qui terrâ haustus fœse, nescio quò oculis mortaliū eripit. Mirabilius propè est, quòd duo rivi ad Liechtenavum oppidum confluentes, repente absorbentur, verùm non uno semper meatu, sed prout aquæ impetus tulit. Itaque admodum quinque jam patent, neque dubitat interdum novos aperire. Ad veterem verò Becam in silva fons est, quem Tumultuarium vocant. Is situs est in clivo montis, è quo magna vis ferri & æris eruitur. Non jugiter, sed intervallis fluit, sic ut cùm unam circiter horam cursum tenuerit, mox inhibeat, ac tres, aut amplius horas quiescat. Neque tamen stata semper tempora observat, aut vices. est enim cùm bis eodem die aquam profundat, est cùm semel. interdum ante, interdum longè post meridiem. Ferunt, quoties se ad cursum refert, sibilum per cacumina arborum exaudiri, velut exurgentis venti: & primus prodeuntis impetus, quodam cum murmure fit ac strepitu, quasi se ad cava montis allidentis, & foras erumpere gestientis aquæ. Quòd si non
vere-

vererer otio meo abuti, & tuā, Princeps Illustrissime, patientiā, persequerer oratione universam hujus urbis viciniam, atque demonstrarem nullam esse oram, unde non præcipua quædam sive commoda, seu oblectamenta, ad Academiam pertinere possint. At, inquiet fortasse quispiam, hæc loci commoditas atque jucunditas aëris insalubritate corruptitur. Nego post exortum Academiarum nomen, ullam conditam esse puriore coelo. Procul enim caussas omnes habet pestilentium aurarum. Quippe in declivi posita, è longinquo septa jugis montium, quæ vehementiorem vim ventorum defendant, non nisi secundis assiduè perflatur. Itaque cùm his proximis superioribus annis tota propè Germania, atque in primis Westphalia nostra, multi mortales pestiferæ lue consumerentur, ejusque metu necesse esset, gymnasii clausis, studia literarum intermitte; Paderborna jam ab anno **xcviii.** supra M.D. inter crebros aliorum luctus & funera, constantem suorum studiorum cursum tenuit. Sed jam mihi videor nonnullorum murmur exaudire, quibus, quæso, Princeps Illustrissime, ut ignoscas. Si enim eorum orationem rectè assequor, non nisi ardentí quodam adversus Celsitud. V. studio permoventur. Quid ergo illi? De loco fatentur; de civibus alia omnia. Refricare enim student animum tuum eorum memoriā bonorum, quæ per hosce triginta annos, Paderbornensibus tuis ostendisti: enumerant cohortationes, monita, decreta, minas: percensent curas, labores, vigilias, sumptus, pericula; cùm interea nihil ab iis, quod operæ pretium sit, post tot conatus factum videatur. Itaque principiō negant, qui tot antea tua beneficia sint aspernati, nunc hoc præstantissimum, & cum totius Westphaliæ gloria conjunctum mereri potuisse. Deinde qui in Principem suum optimum, & suæ salutis amantissimum tam fuerint invenusti & inurbani, valdè verentur, ne semper eos illa morum commoditas deficiat, quam tanta virorum, adolescentiumque multitudo omni humanitate perpolita desiderat. Verum isti primū, paucorum civium crimen, toti inferunt civitati.

tati. Deinde non vident, quo argumento ipsi utantur ad frangendum, vel infirmandum, hoc eodem tē ad suscipiendum usum esse, & jam porrō uti ad persequendum consilium tuum. Quid enim? Sunt nonnulli minus bene morati. audio. nempe, ne recte quidem de D e o sentire, & loqui dicerunt. Est verò cùm pravarum opinionum, tum malorum morum una & eadem mater Ignorantia, quæ si luce salutarium doctrinarum aliquando discussa fuerit, vidisti, Princeps Sapientissime, alios Paderbornam mores, alios cives habituram. Nihil enim ad profligandos errores, nihil ad ferciam domandam, nihil ad recte componendum civitatis statutum doctrinā præsentius. Lovanium accepimus, cùm civili-
 bus armis, atque discordiis complures annos arsisset, esset
 que civitas mutuis cædibus propè perculta atque afflita,
 Joannem Brabantiae Ducem consilium cœpisse extruendæ
 Academiæ. Quid plura? brevi illa civibus pristinam lenitatem, & concordiam reddidit, quam rerum omnium ubertas, & publica felicitas est consecuta. Non aliam quoque spem, te Duce, atque auctore, Illustrissime Princeps, ingredimur. Spem autem? quasi verò non jam fructus aliquos, certè flosculos tuæ providentiaæ teneremus. Tot enim adolescentes Paderbornæ nati, qui in tuis scholis jam inde à prima pueritia liberalibus disciplinis, ad omnem honestatem informantur, qui neque sensu celeritate, neque laboris patientia, neque morum facilitate à quoquam exterorum vincisci sustinent, satis declarant, si quid superioribus annis secessus accidit, quām volebas, id non naturæ perversitate, sed salutaris culturae inopiam contigisse. Ea jam abs te relata, ac tam insigni accessione cumulata, non modò omnem maculam ac labem, si qua paucorum culpa infudit Paderbornensi nomini, se deleturos profitentur, sed etiam daturos operam, ut vetus illud Paderbornæ elogium, quod ab illo pio viro, quèm superius, laudavi, Arnulfi Imperatoris memoriam litteris mandatum est, quasi postliminiò recuperent. Id ita habet.

*Hic locus (Paderborna) viris omni nobilitate generis, animique
 h semper*

*Lipfius
 Lovan. l. 3.
 c. 1.*

*In Coſmod.
 atat. 6.
 c. 37.*



semper insignibus abundabat, ut non esset dubium, quin patria civibus, & cives patriæ congruerent, ac sibi utraque vicissim ornamento forent.

CAPUT VIII.

Newhauß Illustrissimi Principis Fundatoris domicilium situm esse, ubi olim Nero Claudius Drusus Augusti Prignus Castellum Alissonem contra Sicambros condidit.

Ceterū, Princeps Illustrissime, circumspicientem me, ac penitus perlustrantem animo hujus Urbis, ut cùm Comico loquar, optimitates, & commoda, hæc quoque sedes ac domicilium tuum, in quo majores tui Episcopi Paderbornenses amplius tria retrò secula habitarunt, ne se silentio præteream admonet. Quanquam enim longulè abest ab Urbe, illinc tamen ipsa, totaque provincia jus petit: illic hujus Academiæ moliendæ consilia sunt nata: denique quicquid est in ista arce splendoris hodiè, & magnificentiæ, id totum abs te habet, qui unus, & illius, & Academiæ es conditor. Quare si ad relaxandos contentione studiorum animos, jucundum erit unquam Academicis nostris educere se nonnunquam ex Urbe, & hæc lustrare vel umbrosa silvarum, vel aprica camporum, libenter, opinor, hujus quoque arcis specie è propinquo perfruentur, eosque cùm ædificii majestas, locique amoenitas, tum verò præcipue Tui illos Optimi Parentis, ac Fundatoris memoria delectabit. Accedit illa quoque liberalis sanè voluptas, & adolescente collente bonarum litterarum longè dignissima, quam capient ex earum recordatione rerum, quæ vetustissimis temporibus hoc ipso loco gestæ memorantur. Est enim hic locus, si quis aliis in universa Germania magna, & veterum Annalibus, & virorum fortium, atque illustrium monumentis celebratus. Quibus de rebus si pauca attigero, veniam, ut spero, dabis, Princeps humanissime, huic meo ornandi honoris Tui studio,

studio, neque alienum me quicquam ab instituto facere iudicabis. Si enim laudationem instituenti illius Academiæ Platonis nemo vitio verteret, quod cùm illa esset in suburbano Athenarum, neque multò inde proprius abesset, quām hæc arx à Paderborna, existimaret Athenarum gloriam ad Academiæ laudem pertinere; neque ego accusandus sum, si ostensurus idoneum abs te Academiæ locum captum esse, de hoc tuo domicilio differam. Ut enim, propter locorum propinquitatem, qui in Academia Platonii dabat operam, is minimè vanus erat, cùm se Athenis studere Philosophiæ diceret, tametsi gymnasium esset in suburbano: ita sedem hanc tuam perinde atque continentem cum hac urbe, lucem quan-
dam, & ornamentum nostris studiis afferre credimus. Est igitur observatum à viris eruditis, hoc ipso loco Neronem Philipp.
Clauer. l. 3.
antiqua
German.
Maximo Coss. qui, ut rationem iniit Siganus, fuit ab Urbe cap. 9.
condita annus D C C X L I I , ante C H R I S T U M Salvatorem In fastie.
natum nonus. Siquidem anno proximo superiore, ut narrat Dio Cassius, Sicambri cum finitimis gentibus, absentia Au- Lib. 54. hist.
gusti, & exemplo Gallorum commoti, bellum adversus Ro- Rom.
manos moverant. Hos Drusus non modò, quod moliebantur, armis vetuit, Rhenum transmittere, verùm etiam ipse transgressus, secundùm insulam Batavorum, quam Rheni divortia efficiunt, primum Usipetibus, deinde ipsis Sicambris arma intulit. Anno sequenti, qui fuit is quem diximus, vere ineunte, rursus subjugatis Usipetibus, Luppiaque fluminis ripis ponte junctis, in Sicambros irruptionem fecit. Ii per hos dies fortè cum Chattis finitimis, propterea quod auxilia negaverant, bellum gerebant, quæ res locum dedit Druso per Sicambrorum fines ductis copiis, ultra Visurgim movendi. Inde cùm remigraret, in hostes delapsus est, à quibus cinctus in magnum cum suis discrimen venit: sed hostibus temerè, & sine ordine prælium aggressis, non modò viator evasit, verùm etiam castellum contra eos ad conflu-
h 2 tes



tes Luppiæ & Alisonis posuit. Ex quibus principio certum est Sicambros hanc, in qua sumus, regionem eâ tempestate coluisse, cùm inter insulam Batavorum, & Luppiam habi- tarent Usipetes, è quorum finibus in Sicambros Luppii traji- ciendus fuit. atque ita terminus Sicambrorum erat ex ea par- te Luppii, ex altera verò Chattis & Visurgi confines erant. Per hos fines cùm iter haberet Drusus, castellum posuit eo loco, ubi Luppii & Aliso miscentur. At quis iste Aliso? di- ligenter omnem hunc tractum lustranti, omnesque amnes, qui se in Luppiam exonerant, recensenti, nullus in men- tem venit, in quem Alisonis, sive ut est in Græco, Elisonis no- men conveniat, præter eum, quem hodie Almam vulgo di- cimus, qui apud tuas ædes, Princeps Illustrissime, in unum cum Luppii amnem confluit. Præfertim cùm gravissimi au- Ætores, Velleius Paterculus, qui in his oris sub Tiberio, ut ipse narrat, Praefectus equitum fuit, & Cornelius Tacitus, hoc ipsum castellum Alisonem appellant, ascito, ut apparet, à præterfluenti nomine. Atqui in conspectu hujus tuæ arcis, est hodieque vicus Elsen, qui vetus illud Elisonis retinet no- men, facileque fidem facit hos esse illos confluentes, ad quos Drusus suum illud castellum collocarit. Porrò nemo, qui castelli nomen audit, vilis & abjecti loci speciem subjiciat animo. Etenim Dio aggressurus Varianam cladem enarra- re, cuius, ut dicemus, quasi semina posita sunt in hoc castel- lo, disertâ oratione persequitur cujusmodi fuerint hæc Ro- manorum castella. Primùm enim negat ejusmodi castella crebra in Germania, aut inter se vicina fuisse: deinde Ro- manas legiones in iis hibernare solitas: tum civitates iisdem locis conditas: eodem Germanos ad forenses conventus convenisse: hic jus iis dictum esse: hic paullatim feris & barbaris moribus positis, consuetudine Romanorum, hu- manitatem & mansuetudinem induisse. Quæ omnia eâ gratiâ ab illo narrantur, ut intelligeremus, quemadmodum Ger- mani, eum locum, in quo Varus habitabat, celebrando, omnesque in speciem amicorum, atque adeò civium partes agendo,

*Velleius
l. 2.
Tacitus
Annal. 2.*

Lib. 56.



agendo, sensim eum in securitatem, ac mox in exitium impulerint. Atqui Varum fuisse tum in Alisone postea ostendemus. Igitur omnia illa, quæ de castellis Romanis à Dione disputantur, sunt in primis Alisoni tribuenda. Sanè cùm vicus, qui hodie superest Elsen, non modico spatio à confluentibus recesserit, non vana est conjectura totum eum campum, qui medius est inter confluentes, ubi castellum fuit, & extremos vici fines, frequentibus domiciliis habitatum, atque ita non mediocrem civitatem hoc loco fuisse. Præterea liquet ex his, quæ è Dione attulimus, unum hoc in interiore hac Sicambrorum regione castellum, ubi hiberna essent Romanorum, extitisse. neque enim vel pauca his locis castella verè affirmasset, si modico intervallo plura fuissent, vel in castellis hiberna poni solita, si alius unquam fuisse castelli, aliud hibernorum locus. Quæ cùm certa sint, alio præterea argumento certò concludimus, Alisonem castellum & civitatem non alibi, quam in hoc loco querendum esse. Proditum enim est à Velleio, Tiberium, cùm post cladem Lib. 2. Varianam, rem his oris utcumque restituisset, digredientem in Italianam, ad caput Luppiæ fluminis hiberna locavisse. Quid clariss? Quem enim locum Dio ad confluvia Luppiæ & Alisonis, eum Velleius statuit ad caput Luppiæ. Is igitur amnis, qui proximè à capite Luppiæ in ipsum influit, is est, qui Aliso veteribus dictus, Drusiano castello locum & nomen dedit. At quis ille est, nisi Alma? Maneat ergo, Princeps Illustrissime, tuum hoc domicilium in ipsis Castelli Drusiani vestigiis esse collocatum.

C A P U T I X .

*Summa rerum in Alisono castello gestarum,
dum illud Romani tenuerunt.*

Quo in loco, quæ jam inde à prima origine, non indigna posteritatis memoriam gesta sint, si coner breviter percensere, equidem nescio simne operæ pretium.
h. 3. factu-

facturus. certè, quæ tua est humanitas, Princeps optime, si me in eo, & pietati in te meæ obsequi, & studiis adolescentum nostrorum prodesse velle videris, non gravatè, uti confido, feres. Illud principiò constat hunc locum situm in finibus Sicambrorum insigni Romanis fuisse præsidio ad compescendos, domandoisque Tencteros, Usipetas, Bructeros, Marsos, Tubantes, Chattos, Delgubinos, quæ omnes gentes finitimas oras incolebant. Deinde plurimum habebat momenti ad Luppiam, Amisiam, Visurgim in Romani populi potestate retinendum. Quocirca multæ hoc loco nobiles expeditiones suscepitæ, multa prælia decreta sunt. Itaque cùm Imperatores, tum eorum legati multi hoc loco erant. Ac Drusus quidem quem post conditum Alissonem legatum habuerit non certò proditur, est tamen ut credam fuisse L. Domitium Ahenobarbum Neronis Imperatoris avum. Is,

Annal. 1. ut refert Tacitus, per medias paludes tramitem aggeravit usque ad Rhenum, quò commodè Romanæ copiæ permearent. Pertinuisse verò eum aggerem usque ad nostrum Alissonem, ex eo conjici licet, quòd postea narrat Germanicum omnia inter Alissonem castellum, & Rhenum novis aggeribus permunivisse. Novos vocat, eò quòd veteres antè à Domitio structos instaurarit. Idem Domitius hinc quoque,

Annal. 2. ut opinor, arma ultra Visurgim, atque adeò Albim tulit. Sic enim Tacitus de eo: *Exercitus flumen Albim transcendit, longius penetratā Germaniā, quam quisquam priorum, easque ob res insignia triumphi adeptus est.* Drusus quoque Alissonis nostri

Epitome Li-
vii. conditor, ad eundem Albim nomen Romanum protulit, sed cùm victor reverteretur, priusquam ad Rhenum perveniret, ex fractura, equo super crux collapso, naturæ concessit, tertio anno à condito Alisone, quo unà cum T. Quintio Crispino ipse consulatum gerebat. Corpus Romanum à Tiberio perlatum est. Milites Romani qui his locis versabantur aram suo Imperatori defuncto erexerunt, haud procul ab Alisone Castello, si rectè Tacitum asséquor, qui memorat

Annal. 4. cam à Germanis postea dirutam, atque item tumulum Varianis

*Anno ante
CHRI-
STUM 7.*

Annal. 2.

rianis legionibus positum, cùm à Germanico Alisone, quem obfederant, deserere cogerentur. A neutro igitur longè aberat. Atque, ut dicam quod sentio, credo fuisse inter Luppiam, & montes, inter quos via patet ad Teutoburgiensem saltum. Discimus enim ex Suetonio, cùm de altero monumento, quod Moguntiaci eidem Druso est positum, loquitur, solenne fuisse, ut stato die, circum hanc aram quotannis exercitus decurrerent. ejusmodi verò decursiones magna camporum spatha postulabant, qualia sunt ea quæ Moguntiaci hodieque nomen à Druso obtinent: Neque verò è *Druzenloch*. re erat legionum, ut quotannis procul à suis castris abducentur: præsertim his locis, ubi ab hostibus facile iniquitate locorum in discrimen adduci poterant. Quæ mihi ratio Germanicum permovisse videtur, cur, ut ibidem narrat Tacitus, tumulum Varianis legionibus structum, quem iidem Germani disjecerant, minimè iterarit. nimirum tumulus longius aberat ab Alisone, non item ara. Quare confirmare ausim aram hanc Drusi fuisse in ea planicie quæ inter Alisone jacet, & Luppiæ caput. Druso succedit in Germania frater ejus Tiberius, is quo deinde rerum potente **C H R I S T U S** Salvator noster crucem pertulit. Is proximo à morte Drusi anno (Marcio Censorino, & Caio Asinio Gallo Cost.) Sicambros, in quorum regione demonstravi fuisse Alisone, magis consilio, ut ipse apud Tacitum gloriatur, quam vi usus, in ditionem accepit, eorumque multa millia supra ripam Rheni in Gallia collocavit, ut ait Eutropius. eos *Lib. 7.* alii postea Burgundiones, alii Gugernos dictos volunt. Ne- *Isidorus.* que multò pòst Tiberius Romam discessit. Fuit deinde e- *Cluverius.* ius in locis legatus M. Vinucius, ejus, cui Velleius suam hi- storiam inscribit, avus. Sub eo, ut idem memorat, *triennio Velleius l. 2.* ante adoptionem Tiberii immensum in Germania bellum excaristi, quod ab eo quibusdam in locis gestum, quibusdam suscitatum feliciter, eoque nomine decreta ei cum speciosissima inscriptione operum ornamenta triumphalia. Ad id bellum profligandum jam ab Augusto adoptatus, rediit in has oras Tiberius, Sexto *Ælio*

*Velleius**ibid.**An. CHRI-
STI 5.*

Ælio Cato, & C. Sentio Saturnino Coss. Ibi cùm trans Visurgim duxisset exercitum, atque Cheruscos in deditio- nem accepisset, hieme sequentis anni, qui L. Valerium Mes- salam, & Cornelium Cossum Coss. habuit, ad tutelam im- perii, inquit Velleius, digrediens in Urbem, *ad caput Lup- piae fluminis locavit hiberna*. Quæ res manifestò ostendit id o- mne bellum ex hoc potissimum Alisone nostro, administra- tum esse: atque ita ipsa regionis opportunitas flagitabat. Pu- gnanti enim ad Visurgim non aliis erat in propinquuo rece- ptus. Proximo consequenti anno repetit eundem locum, at- que expeditionem Tiberius, atque iterum *trajecto Visurgi, re- ceptis Cauchis, fractis Longobardis, ad quadringentesimum (verba sunt Velleii) milliarium à Rheno ad flumen Album victorem per- duxit exercitum*. Erat Tiberii legatus in hoc bello C. Sentius

Lib. 55.

Saturninus, qui nuper consulatum gesserat, ei, ut refert Dio, ob res his regionibus ductu Tiberii bene gestas, ornamenta triumphalia decreta sunt. Circa idem tempus Maroboduus

*Velleius ibi-
dem.**An. CHRI-
STI 8.*

Marcomannorum rex, qui in Boiohæmo dominabatur, grave bellum in Romanos commoverat. adversus eum ex his ad Alisone castris Tiberius per Noricum, Saturninus per Chattos cum copiis est profectus, A. Licinio Nerva, Q. Ca- cilio Metello Coss. Hoc bellum sanè atrox & periculosum, ut in cuius societatem Marobodus universam quoque Pan- nontiam, & Delmatiam traxerat, propè à Tiberio feliciter patratum erat, cùm hic apud Alisone ingens plaga Roma- no est nomini imposita, Q. Sulpicio Camerino, C. Poppæo Sabino Coss. Etenim digresso Tiberio, præfectus in Ger- maniam venerat P. Quintilius Varus, qui antea Syriam ad- ministrarat, vir, ut eum nobis depingit Velleius, *ingenio mitis, moribus quietus, ut corpore & animo immobiliar, otio magis castrorum, quam bellicæ assuetus militie*. Hunc suprà memoravi cum exercitu Alisone consedisse. Nam Germani, ut narrat Dio, quibus nimium fidebat, dederant operam, ut quam longissi- mè abesset à Rheno, scilicet ut homini facilius infidias face- rent. at nullus castrorum Romanorum locus in hac regione à

Rhe-

*ibid.**An. CHRI-
STI 10.*

Romano est nomini imposita, Q. Sulpicio Camerino, C. Poppæo Sabino Coss. Etenim digresso Tiberio, præfectus in Ger- maniam venerat P. Quintilius Varus, qui antea Syriam ad- ministrarat, vir, ut eum nobis depingit Velleius, *ingenio mitis, moribus quietus, ut corpore & animo immobiliar, otio magis castrorum, quam bellicæ assuetus militie*. Hunc suprà memoravi cum exercitu Alisone consedisse. Nam Germani, ut narrat Dio, quibus nimium fidebat, dederant operam, ut quam longissi- mè abesset à Rheno, scilicet ut homini facilius infidias face- rent. at nullus castrorum Romanorum locus in hac regione à

Rhe-



Rheno quantum Aliso distabat. Deinde caſo Varo Germani confeſtim ad oppugnanda caſtra conversi ſunt. ea verò fuiſſe Alifone diſertè pronunciat Velleius. Affuetus igitur, ^{ibid.} ut antè cognovimus, otio caſtrorum Varus, hīc non modò hiberna, ſed etiam, ut ait idem, *trahebat aſtiva*, & quoniam, ut ex Dione nuper didicimus, Alifone forum erat, ubi Praefectus Romanus jus dicebat, audi quemadmodum ea res hominem infelicem, Germanorum fraudibus, ac dolis irreſtiendum, ac penitus conſtrigendum dediderit. Velleii verba ſunt: *Mediam ingressus Germaniam, velut inter viros pacie gaudentes dulcedine, jurisdictionibus, agendoque pro tribunali ordine trahebat aſtiva.* At illi, quod, niſi expertus, vix credebat, in ſumma feritate versutissimi, natumque mendacio genus, ſimulantes fictas litium ſerias, & nunc provocantes alter alterum injuriā, nunc agentes gratias, quod eae Romana iuſtitia finiret, feritasque ſuā novitate incognitae disciplina mitesceret, & ſolita armis diſcerni, jure terminarentur, in ſummam ſocordiam perduxere *Quinctilium*, uſque eō, ut ſe Prætorem Urbanum in foro jus dicere, non in mediis Germania eis exercitui præſe crederet. Hæc Velleius, qui unum præteriit, quod ad excuſandos Germanos non nihil facit, neque reticuit Dio. Ait enim Varum principiō Germanis velut ſervis imperaffe, & argentum exegiſſe tanquam à ſubditis, cuius rei insolentes eorum primores, quando pàlām rebellare non audebant, ad ſimulandam amicitiam, & obsequium, ſtruendasque clandestinò insidias flexiſſe. obſervarunt igitur adverſus Romanos Germani illud Romani vatis: *Dolus an virtus quis in hoſte requirat?* Erant insidiarum principes, ut idem Dio ait, Arminius & Segimerus, qui affiduō cum Quinctilio verſabantur, ac ſepenumero convivabantur. Atque hæc omnia gerebantur, ut diximus, Alifone. Ubi jam nihil ſibi Quinctilius à Germanis metuere vi- ^{Dio lib. 56.} ſus est, primū eum rogarunt, ut præſidio ſibi militum Romanorum uti liceat. Dictum factum. aliis ad oppida mu nienda: aliis ad capiendo latrones: aliis ad ſubvehendos commeatus præſidia concedit. Postquam imminutus, & de bilita-

bilitatus exercitus Alisone remanserat, excogitant quemadmodum Varum inde ad iter protrahant, quō cladi sit opportunior, cūm se per amicorum regionem ire crederet. Quid quæris? repente ex composito Alisonem affertur nuncius, quosdam è longinquis Germanis arma sumpsisse. Hic qui apud Quintilium erant, quos jam pridem amicos esse sibi persuaserat, rem indignam dicere: hortari ut rebelles punitum iret: auxilio se mox affuturos. Illi digressi, quosque Romanos, velut sibi præsidio futuros à Quintilio postularant, obtruncant: Quintilium adversus rebelles Alisonem proficiscentem, à tergo, depositā jam amicorum personā, adoriuntur. Ita, inquit Velleius, *exercitus omnium fortissimus, disciplinā, manu, experientiāque bellorum inter Romanos milites princeps, marcore ducis, perfidiā hostis, iniquitate fortune circumventus, cūm ne pugnandi quidem egregiè occasio, in quantum voluerant, data esset miseris, castigatis etiam quibusdam gravi pñā, quia Romanis & armis, & animis usi fuissent; inclusus silvis, paludibus, insidiis ad internecionem trucidatus est.* Reliquerat Varus Alisonem, ut constat ex Dione, legatum L. Asprenatem. narrat enim à tubicinibus, cūm se ad prædam convertissent Germani, sparsam esse famam adventare Asprenatem suos ulturum, neque eam vanam fuisse. In propinquo igitur fuisse oportuit. Ducebat Asprenas duas legiones, quas, ut narrat Velleius, *navā virilique operā immunes tantā calamitate servavit; matureque ad inferiora hiberna descendendo, vacillantium etiam cis Rhenum sītarum gentium animos confirmavit.* Appellat inferiora hiberna, quæ erant apud Vetera, ubi hodie est oppidum Sancti, quo pertinebant aggeres illi ab Alisonem ad Rhenum olim structi. Inter alia rei Romanæ damna, quæ clades Variana attulit, illud etiam fuit, quod Aliso, vigesimo circiter, postquam edificatus fuerat, anno in hostium potestatem venit. Cæso enim cum exercitu Varo, immense Germanorum copiæ, ut testatur Velleius, Alisonem, & in eo Lucium Cæditium præfectum castrorum, aliosque, qui supererant, Romanos obsident. At illi *omnibus difficultatibus*

bus superatis, quas inopia rerum intolerabiles, vis hostium faciebat
inexsuperabiles, nec temerario consilio, nec segni providentia usi,
speculatique opportunitatem, ferro sibi ad suos peperere redditum.
Hæc sunt, quæ de clade Variana ad Alisonis historiam per-
tinere visa sunt, quæ Romano nomini pœnè exitiabilis, ut loqui-
tur Suetonius, accidit in Teutoburgensi saltu, quod nomen ^{In Oðav.}
hodie retinet mons, cui subjectus campus à Germanorum ^{cap. 23.}
de Romanis victoria Winfelt appellatur, non longè ab Hor-
na oppido, xii. ab Alisone passuum millibus. Quo tem-
pore Aliso in Romanorum ditionem redierit, non satis
compertum habeo; illud ex Tacito exploratum est, octavo
post cladem anno tenuisse Romanos. Neque verò ante Au-
gusti mortem, qui quinto post cladem anno obiit, recupe-
ratum puto. Nam et si Tiberius, & Germanicus pœnas de Ger-
manis repetitum mox venerunt, negat tamen Dio longè ab
Rheno discessisse, ne quod sibi novum malum crearent.
Mortuo Augusto, Sexto Pompeio, & Sexto Appuleio Coss. ^{CHRISTI}
Tiberius jam Imperator in has oras venire desiit. quapro-^{15.}
pter totam belli Germanici molem Germanicus Drusi, qui
Alisonem ædificaverat, filius, sustinuit: quem, ut narrat Ta-
citus, Oðavius Augustus ^{anno 1.} *œdo apud Rhenum legionibus impo-*
suerat. Is anno ab Augusti excessu proximo, Druso Julio &
C. Norbano Coss. sedatâ militum seditione, res novas Au-
gusto jam extincto molientium, depulsisque hostium iter
obsidentium copiis, exercitum duxit, inquit Tacitus, ^{ad ul-} ^{ibid.}
timos Bruðerorum, quantumque Amisiam & Luppiam amnes in-
ter, vastatum haud procul Teutoburgensi saltu, in quo reliquie
Vari, legionumque insépultæ dicebantur. Pergit exequi quemad-
modum in eum saltum progressus legiones Varianas tumulo
condiderit, primusque cespitem posuerit, atque mox an-
cipiti cum Arminio Marte conflixerit. In hac expeditione
receptum, vel instauratum Alisonem promptum est credere:
nam ex ultimis Bruðerorum, ubi hodie Delbrugia est, in
Teutoburgensem saltum tendentibus erat necessariò præ-
tereundus. Consecutus est annus, qui T. Sisenam, Stati-

lum Taurum, & L. Scribonium Libonem Coss. habuit, quo Germani, dum Germanicus classem apparat, quā militem & commeatum in has oras per Amisiam advehat, interea magnis copiis *castellum Lupiae flumini appositorum* obsident, ut commemorat Tacitus. Id castellum paullò pōst Alifonem nominat. Sic enim habet: *Auditō castellum Lupiae flumini appositorum obſideri, ſex legiones eo duxit. & paullò pōft: Neque Caſari copiam pugna obſeffores fecere, ad famam ejus dilapſi. tumulum tamen nuper Varianis legionibus ſtruūt, & veterem aram Druso ſitam diſjecerant. Reſtituit aram, honorique patris princeps ipſe cum legionibus decucurrit. Tumulum iterare haud viſum; & cuncta inter castellum Alifonem, & Rhenum novis limitibus, aggeribusque permunita.* Atque hæc ſunt, Princeps Iuſtrissime, quæ de Alifone noſtro à Romanis ſcriptoribus ſunt prodita. Consequentibus temporibus, uti ſegnius Romani in Germania Magna bella gafferunt, ita minorem dedere ſcribendi materiam. Siquidem hoc ipſo anno, quo Alifonem obſidione liberatum eſſe dixi, Germanicus poſt iſignem victoriam, quam ad Viſurgim, in campo Idiſtavifo, non longè à Minda, de Arminio reportavit, à Tiberio fortiſſimum juvenem, ut loquitur Tacitus, *ſpecie honoris, amoliri cupiente, in urbem revocatur.* Ibi cùm proximo anno C. Cælio, L. Pomponio Coss. de Germanis triumphaſſet, miſſus in orientem, non multò pōft, dolo Pifonis interiit. Interea res Germaniæ per praeſectos Tiberius ſic admiſtrabat, ut, ne cui bellum permitteret, etiam damaſſimularet, ſatiuſ arbitratus rebellium gentes, quando Romane ultioni conſultum ſit, internis diſcordiis relinqui. Neque nihil in hoc Tiberius vidit. nam poſt diſceſſum Germanici, inter Cheruſcos, & Maroboduum grave bellum exarſit, & poſtea inter eosdem Cheruſcos, & Chattos tantæ inimicitiæ, ut alicubi Tacitus, eos *aternum diſcordare ſcriperit*, ut interea Hermundurorum cum iisdem Chattis prælia, & Bruſterorum, atque Anſibariorum excidia ſilentio præteream. Inter hæc Germanorum diſſidia, tan-
tiſper Alifo præſidiis Romanorum tenebatur, donec Clau-
dius

Annal. 2.

Tacitus

Annal. 2.

ibid.

Tacit. l. 4.

Annal.

Annal. 2.

Annal. 11.

dius Imperator, ut est apud Tacitum, C. Valerio Asiatico,
M. Valerio Messalla Coss. qui erat à condito Alisone sextus Annal. II.
& quinquagesimus, adeò novam in Germanias vim prohibuit, ut
referri præsidia cis Rhenum juberet. Praerat tum Germaniæ
cum exercitu L. Domitius Corbulo, vir veteris disciplinæ mi-
litaris observantissimus, & maximis postea rebus in Oriente
gestis immortalem famam consecutus. Is igitur in ipso aditu
præclarorum operum, ad quæ jam pro nominis Romani glo-
ria se accinxerat, non modo reducere exercitum, sed Ali-
sonem quoque, & quæcumque in ulteriore Germania Ro-
mani loca tenuerant, præsidiis nudare coactus est. Itaque
deinceps præclarè Romani sècum agi existimarent, si Ger-
manos transitu Rheni prohiberent. Quid quod Panegyristes Paneg.
quidam ausus est dicere coram Maximiano, & Constanti-
no, posterioribus falso de antiquis Imperatoribus traditum
visum fuisse, quòd trans Rhenum signa barbaris gentibus
intulissent. Quò major est gloria tui Alisonis, Princeps Il-
lusterrime, habuisse in hibernis Romanas legiones, hic jus
dixisse tot Consulares, tot ornamenti triumphalibus insignes
viros, hic bella administrasse illos ex Augusta domo nobilis-
simos Imperatores, quorum ea fuerit virtus, ut etiam posteris
supra fidem esse videretur.

Max. &
Constant.

C A P U T X.

In quorum potestatem venerit Aliso à Romanis desertus.

Quid verò, Romanis aquilis cis Rhenum reductis, Ali-
sone factum est? Videtur enim certum, & explora-
tum, minimè vacum, ac desertum esse derelictum,
sed abscedentibus Romanis immigrasse Germanos, aut,
quod verisimilius, dirutum instaurasse. Neque enim fieri
potuisset, ut ad nostram usque ætatem Romanum Alisonis
nomen retineret, nisi jam inde à Romanorum ex his oris
descessu, ab aliquo populo cultus esset, atque celebratus.
Quid quod jam antè docui convenisse etiam Alisonem, &

i. 3

sc-



sedes in eo fixisse Germanos, quod sanè libenter in tantis, & tam crebris inter vicinas gentes simultatibus faciebant, quòd à bellorum injuriis Romanorum essent præsidio tutiores. Eadem eis fuit, Romanis quoque digressis, caussa colendi & muniendi Alfonis. erat enim, ut jam demonstravi, in medio multarum gentium, quæ infestis sæpe armis inter se dimicabant. nam, ut alias taceam, Bructeri, quorum extre-
Tacitus de
morib.
Germ.

Annal. 12. mos audivimus ex Tacito propè ab Alisone confessisse, circa exordia principatus Trajani propè funditus à vicinis deleti sunt. *Quis ergo populus Alisone tenuit?* nempe idem qui hanc regionem. Ac superioribus quidem annis, Druso rem gerente, ut diximus, in hac Luppiæ ripa Sicambri incolebant, quos Tiberius postea, quòd belli adversus Romanos autores ac principes fuissent, transportavit in Galliam. Versatur verò in quæstione apud eruditos, num Sicambri stirpitus ex his oris excisi sint, an verò nonnulli remanserint? Qui ullos remansisse negant, Taciti partim silentio se tuentur, partim verbis. Silentio, quòd Germaniæ populos accuratissimè percensens, nunquam postea Sicambros in hac regione collocat, quàm sunt translati in Galliam. Verbis, quia disertè excisos esse confirmat. quomodo verò excisi, si ulli restabant? Qui contrà sentiunt, gravem habent suæ opinionis auctorem Strabonem, qui suam Geographiam Tiberio imperante scribebat, cùm necdum extinctum esset illud Germanorum belli fulmen Arminius. nam libro septimo ejus etiam viventis, & cum Romanis bella gerentis meminit. *Annal. 2.* mortuus est autem Arminius, ut ex Tacito clarum est, M. Silano, L. Norbano Coss. viginti & amplius annis post deditos Tiberio Sicambros. Is igitur, eodem libro septimo, sic ait: *Hujus partis (Germaniæ) populos Romani partim in Galliam traduxerunt: reliqui migraverunt in penitiores Germaniæ partes, ut Marsi: sed & Sicambrorum exigua restat portio.* Idem eodem libro commemorat à Germanico, inter alios Germaniæ principes, ductum in triumphum Teudorigem principem Sicambrorum. Fuerunt igitur Sicambri in Germania, cùm eam

ad-



administraret Germanicus. non ergo omnes à Tiberio translati. Postea verò quām Francorum in his terris nomen exortum est, quid illustrius Sicambris? Quoties eorum Jornandes, Claudianus, Sidonius, alii meminerunt? Quod Tacitus eorum non meminerit, respondent non pugnare cum Strabone, qui exiguum portionem fuisse ait, quam Tacitus meritò in integri populi numero habendam non putavit.

Quod idem excisos memoret, ex eo non consequi ut nulli Lib. de
manserint. nam & Bruðteros ab eodem excisos perhiberi, & mor. Germ.
Ansivarios, quod juventutis erat, cæsos; imbellem ætatem
in prædam divisam esse. Et tamen Bruðterorum & Ansivario-
rum nomen, posteriorum quoque seculorum memoriâ cele-
bratur. Quid: nonne ausus est Velleius scribere, à Tiberio, Lib. 1.
post cladem sub Varo acceptam, *ocrys prosperrimo eventu exci-
sam esse Germaniam?* num ideo nullos Germanos Germanico,
cum quibus bellum gereret, reliquit? Habent igitur, qui Stra-
bonem sequuntur, quo se tueantur; neque sibi eripi sinant,
etiam deserentibus has oras Romanis, fuisse è veteribus illis
Sicambris, qui Alissonem colerent. Quod si apud quem-
piam plus aliorum, quām Strabonis valebit auctoritas, nihil
tamen ille de Alisonis dignitate decerpit. Nam etsi negent
mansisse veteres illos Sicambros, fatentur tamen ab Uſipe-
tibus & Ten̄teris, qui vacuam, ut aiunt, eorum regionem
adierint, usurpatum postea fuisse glriosum, & veterum me-
moriâ inclytum Sicambrorum nomen. In ea regione cùm
fuerit Aliso, inter utrosque convenit venisse in eorum po-
testatem Sicambrorum, qui Rhenum postea transgredi, at-
que ad Vahalim & Mosam longè latèque primū domina-
ti, ad extreum subjugatā Galliā, reversi in Magnam Ger-
maniam, unde exierant, ac tandem eversis Turingis, am-
plissimum Francorum regnum fundaverunt, quod Caroli
Magni tempore, à Bulgaris, seu Illyrico usque ad Hispanos, à
Danis usque ad Calabros pertinebat. Hoc regnum qui pri-
mi tenuerunt, è Sicambris fuisse, fidem facit D. Remi-
gius, qui eorum Regem Clodoveum salutaribus aquis expia-
turus,

*Otto Frisii.
lib. 5. c. 32.*



Greg. Turo. turus, sic eum affatus dicitur: mitis depone colla Sicamber:
l. 2. c. 31. & Venantius Fortunatus, qui sic alloquitur Charibertum
 Regem:

Lib. 6. 4. *Cum sis prognatus clarâ de stirpe Sicamber.*
Tacitus 13. Huic igitur tam inclytæ genti servivit derelictus à Roma-
Annal. nis Aliso, quem equidem reor caput gentis interea fuisse,
 dum Romani, tametsi nulla in hac ulteriore Germania præ-
 fidia habebant, tamen Rheno propinquiores agros militum
 pecoribus, atque armentis vendicabant, & veteres colonos
 adire cupientes armis arcebant. Tunc enim Sicambi nostri
 tantisper se his remotioribus ab Rheno locis tuebantur, &
 discordantibus cæteris Germaniæ populis, paullatim cresce-
 bant, easque vires induebant, quibus non modò deinde Ro-
 manos Rheno arcerent, verùm etiam cum iis in Romano
 solo de orbis terrarum imperio dimicarent. Quam ad rem
 plurimùm eis contulisse Alifonis opportunitatem mecum fa-
 tebitur, qui conditionem eorum temporum, locorumque
 considerabit. Siquidem nulla res deteriorem faciebat Ger-
 manorum fortunam, quam intestinæ dissensiones ac bella.
In lib. de
moribus
Germ.
Alciat. Lib.
de form.
Imp. Rom.
Philipp.
Cluverius
Germ. an-
tig. lib. 3.
e. 20. Itaque Tacitus de iis loquens, pronuntiat: Urgentibus im-
 perii fatis, nihil jam præstare fortunam majus posse, quam
 hostium discordiam. Ea demum discordia sublata est, exor-
 to primùm in his regionibus Francorum nomine, sive ea, ut
 volunt quidam, una primùm gens littoralis fuit, quæ cæte-
 ras postea in societatem traxit, sive, ut alii, omnes hæ gen-
 tes iætis inter se pro summa rei foederibus, hoc sibi pulcher-
 rim à studio libertatis Francorum cognomentum ascive-
 runt. Illud certissimum est, gentes plerasque omnes, quæ in-
 ter Francicas à veteribus nominantur, in hac regione, quam
 hodie Westphaliæ vocamus, sedes primùm habuisse, ut
 Salios, Ansivarios, Attuarios, Chamavos, Bructeros, ac
 denique Sicambros nostros. His gentibus cùm videamus in
 Romani imperii terras transgressis Sicambros imperitasse,
 proximum est ut credamus, eos quoque primos illius tantæ
 coitionis, & conjunctionis duces, ac principes fuisse. Nimi-
 rum

rum quod Drusus fecerat, ut ad domundos, & continendos in potestate populi Romani tot bellicosos Westphaliae populos (sic enim loquamur, tametsi necum Westphalia dicebatur) hoc castellum in mediis eorum finibus collocaret, idem existimo plurimum profuisse Sicambris, qui illud post id locorum obtinuerunt, ad eosdem populos communis belli societate colligandos.

C A P U T X I .

*De occupato à Saxonibus Alisone, &
origine Paderborneæ.*

INITI illâ circa Gallieni tempora, populi olim discordes, Franci sunt appellati, quibus, ut ait Marcellinus, confines erant Saxones, gens primùm ultra Albim sita, ut ex Ptolemæo discimus, sed quæ deinde adjunctis sibi Cauchis, si Zosimo credimus, Juliani temporibus ad Visurgim usque dominabatur. Ab horum finibus usque ad Rhenum quæcumque gentes habitabant, Franci dicti, & eorum regio D. Hieronymo, Sulpitio Alexandro, & in veteri tabula itineraria Valentiniani ætate descripta, quæ Amplissimi, & optimè de litteris meriti Viri Marci Velserti ope prodit in lucem, Francia nominatur. Ac principiò quidem, cùm, ut opinor, imbecillioribus singuli viribus erant, Franci & Saxones conjunctis consiliis, & opibus piraticam in Rheno ac mari exercentes Romanorum terras infestabant. Deinde, ubi seorsim fatis utraque gens sibi posse visa est, Franci terrâ, quod Sicambi nostri, & ceterorum plerique equitatu valescant: Saxones mari rem gerere coeperunt. Ac Franci quidem tandem aliquando transgressi Rhenum sedes in Romano fixerunt solo, & post multa prælia, subjugatâ Germaniâ primâ, ubi est Moguntiacum, & Belgicâ secundâ, in qua Sueßiones, Catalaunum, Ambiani, circa annum Domini CCCCLVI. ad extremum in Gallia confederunt. Ho-

Lib. 27.Lib. 3.In vita Hi-larionis.apud Tu-ron. l. 1.c. 9.Sidon. A-pollin. inpanegyr.Avii.

k rum



rum prosperam fortunam æmulati Saxones, à tergo consecuti, transito Visurgi, regiones, è quibus illi migraverant, occuparunt. Neque tamen credibile est ita Francos excessisse, ut nulli remanserint. Nam ut alios taceam, Bructeri, quos inter Francorum populos Eumenius, & Sulpitius Alexander numerant, longo post intervallo Boructuarii dicti, demum circa annum CHRISTI DCCVIII, ut testatur Venerabilis Beda, cùm eis CHRISTI Euangelium afferre coepisset S. Suibertus, à Saxonibus sunt devicti. Transierunt quoque in Saxonum nomen Angrivarii, quos postea Angarios dixerunt. Itaque neque Sicambros planè deseruisse Alilonem, ut vacuum ingredenterunt Saxones, equidem adducor ut credam, sed potius condendæ Paderbornæ Saxonibus caussam dedisse. Id priusquam explanem, video mihi necessariò confutandas quorundam de origine Paderbornæ opiniones. Nam qui nobis tabulas Ptolemai egregiè illustratas ediderunt, cùm inter Germaniæ oppida Teuderium repperissent, non dubitarunt confirmare esse Paderbornam. At Teuderium, quod Theudurum Antoninus vocat, non in Germania magna, sed in adversa Rheni ripa fuisse, ex ipsa itineris ratione, quam Antoninus persequitur, alii satis liquidò demonstrarunt. Nihil igitur Teuderium ad Paderbornam. Aliis visum est Paderbornam suam originem Carolo Magno debere, qui amnem è tribus fontibus hoc loco ortum, à Pado illo nobili Galliæ Cisalpinæ fluvio, cui tres item sint fontes, Paderam appellari. Verum Paderbornæ nomen antiquius esse Carolo Magno, liquet ex epistola S. Ludgeri ad Rixfridum Episcopum, ubi inter rebelles Saxones meminit Ogelli Oesterbach de Paderborne, qui cùm anno DCC LXXVIII. hoc est, proximo à suscepta fide & baptismo, pugnaret contra Carolum, essetque ejus ætas adventu illius in has oras vetustior, non potuit Paderbornæ nasci, neque à Paderborna nomen ferre, si primum à Carolo condita fuisset, vel appellata. Neque id Gobelinus Persona confirmare audet. Nam quod adjungit, ab iis Saxonibus,

*Panegyr.
Constant.
Apud Tu-
ron. loc. cit.
Lib. 5. c. 12.*

*Philippus
Cluverius
l. 2. Germ.
ent. c. 18.*

bus, qui Longobardos, duce Alboino, in Italiam comitati, fe ab iis circa annum Domini D L X X . se junxerunt, edificatam, vel nominatam esse Paderbornam, longius etiam abest à vero. Nam illos ex Italia profectos, arma intulisse in Gallias, ibique à Mummulo Francorum duce fractos, atque subactos, retrò unde venerant recessisse legimus, nusquam verò, in has oras remigrasse. Sed hæc haec tenus. Nunc, ut institui, quid de origine Paderbornæ sentiam, explicabo. Quod plerisque in rebus usu venire solet, ut unius interitus, alteri præbeat nascendi locum, id Paderbornæ accidisse judico. Saxones enim cùm à Visurgi profecti se primùm his regionibus intulerunt, ut paullò antè ostendi, non vacuas hominibus repererunt. Quare tametsi Sicambri, ceterique populi, tot copiis in Romani populi terras ultra Rhenum traductis, pristinas suas vires acciderant, tamen non usque eo fracti erant animis, ut loca munitione, & frequentia populi nobilitata, ultrò advenientibus hostibus indefensa traherent. Hujus generis cùm esset Aliso, toto eo tractu, qui inter Visurgim, & Alisonem jacet, non magno negotio in ditionem redacto, facile est suspicari ab Alisone, primam esse Saxonibus injectam moram. Interea dum opperuntur, dum se suaque Sicambri, ultrò, vel armis compulsi dedant, videtur illa loci amoenitas, & ubertas elegantissimorum fontium, in qua castra fecerant, quamvis barbaros id temporis Saxonum animos permovisse, ut in eo loco Urbem condarent. Quoniam verò veteres in numero multitudinis pleraque nomina quarta vocali terminabant, quæ nos per secundam efferimus, (dicebant enim *thi engelon, thi heiligon, thi bronnon, seu bornon*) & jucundissimos hos tres nostros fontes Patherbrunnon visum erat nominare, ideo Urbi ipsi idem est nomen inditum. Sed quid sibi vult illud Pather? Colligimus enim sic à majoribus enuntiatum esse, quod ita crebro scriptum reperiamus, nimirum cùm lingua Germanica veterem illam suam asperitatem retineret. quemadmodum enim paullatim articulum *thi* mollius pronunciarunt *die,*

k 2

ita

*Gregor. Tu-
ron. l. 4.
bif. Fran-
corum c. 7.*



ita ex Pather fecerunt Pader. Testatur Gobelinus à Pado derivatum, qui, ut ait, ex tribus fontibus sibi invicem prope surgentibus ad pedes Alpium in unum alveum concurrentibus oriatur. quæ descriptio non congruit cum iis quæ à Strabone, Plinio, Ptolemæo, Leandro Alberto de origine Padi memorantur. Sed faciamus non speciatam esse in hac appellatione tam accuratam similitudinem, si cui id sequi libebit, dicet à Pado factam esse Paderam, quemadmodum brachium Padi, quod est ad Ravennam, Padusam dictum accepimus. Reperitur quoque scriptum Padesbronnen, ubi videri possit deductum nomen ab eadem origine atque ipsum Padi vocabulum. Refert enim Plinius ex Metrodoro, Padum nomen accepisse ab arbore picca, quæ multa circa fontem, quæ Gallicè Pades dicatur. Verum unde Saxonibus nostris, quos eo tempore quasi more ferino vixisse ait Venantius, ea eruditio, & cognitione linguarum? Evidem malim fateri nescire me, unde illud Pather, in nomine Patherbornæ, perinde atque obscurum est quid sibi velit Mimigarna, in nomine Mimigarnafordæ, quo aliquot saeculis dicta fuit ea Westphaliæ Urbs, quam hodiè Monasterium nuncupamus. præfertim cum illa à Pado derivatio nullius è veteribus auctoritate nitatur. Romanis certè hi fontes, Luppiæ fontes perinde dicebantur, atque ille Luppespringensis, atque adeò qui nobis Padera est, non aliasac Luppia. quanquam nec dum conditæ Paderbornæ, antequam ars aliquid moliretur, non videantur nostri fontes in unum alveum fuisse collecti, sed temerè, ut casus ferebat, per subjectos campos lapsi se in Luppiam intulisse. È factum est, ut cum Sicambri vetus Luppiæ nomen his fontibus tribuerent, Saxones ejus appellationis ignari novum iis vocabulum attribuerint. postea verò occupato Alisone, didicerunt à Sicambris Luppiæ nomen: hæsit tamen iis fontibus, quos priùs in potestatem redegerant, novum Padera nomen. Quocirca cum antea duo tantum amnes ad tuam arcem, Princeps Illusterrime, confluere dicerentur, deinceps tres sunt numerati,

*Annales
Camisiensi
an. 777.
Lib. 3. c. 16.*

Lib. 3. 7.

*Vide Gobe-
linum.*

rati, cùm revera Luppia, & Padera unus, atque idem sit fluvius.

C A P U T X I I .

Instauratione videri Alisone à D. Carolo Magno.

Potiti Alisone Saxones, omnique circa eum regione, secundâ fortunâ elati, ausi Francorum vestigiis insistere, devinctis sibi belli societate Thuringis, Rhenum & ipsi transcendunt, rati idem sibi in Francos licere, quod illis in Gallos, aliosque Romani Imperii populos licuisset. Ea res Francos coëgit arma retrò in Saxones Thuringosque convertere, donec exciso florentissimo Thuringorum Imperio, Gregor. Tu-
ron. l. 3.
c. 7. l. 4.
c. 10.
Saxones vestigales facerent. Contigit hoc anno C H R I S T I
D X X V I I . Quo ex tempore nunquam desierunt Saxones, saepe excusso Francorum jugo, ad libertatem eniti; donec à Carolo Magno Francorum rege, antequam à Leone III. Pontifice Maximo, qui Paderbornæ fuerat, Imperator Populi Romani renunciaretur, bello pressi simul Francorum imperium, simul C H R I S T I religionem amplectenterunt. In eo bello non dissimili caussâ atque olim Drusus, castellum hoc ipso loco Carolus videtur condidisse. Cùm enim Saxones denuò Francis rebellassent, eosque jam ulturus Carolus Wormatiâ properaret, perterriti, inquit Regino, ad locum ubi Lib. 2.
Lippa oritur venerunt, ibi se suamque patriam Regi tradiderunt,
& sponserunt se Christianos esse debere. Tunc Rex una cum Francis restauravit Heresburgk castrum, & aliud castrum super Lip-
pam, ubi venientes Saxones unâ cum uxoribus, & parvulis innume-
rabilis multitudo baptizatis sunt. Non possum iis assentiri, qui hoc posterius castrum procul collocant à Luppiæ fontibus. In annalibus enim, qui Astronomo tribuuntur, hæc Saxonum deditio, & baptismus eodem propemodum loco describitur, ubi Carolo obviam venerunt, hoc est ad Luppiæ caput. Sic enim habent: *Ad fontem Luppiæ veniens, immensam illius perfidi populi multitudinem, velut devotam & supplicem, ac quasi er-*
k 3 *roris*

roris sui veniam poscentem invenit. Cui cum & misericorditer igno-
 viisset, & eos, qui se Christianos fieri velle affirmabant, baptizari
 fecisset, datis & acceptis pro fide servanda fraudulentis corundem pro-
 missionibus, obsidibus quoque quos imperaverat receptis, Eresburgo
 castro, quod dirutum erat, restaurato, alioque castello super Lipp-
 iam extructo, & in utroque non modico praesidio relicto, ipse in Gal-
 liam reversus, in villa Harißallo hieavit. Ex his constat, prin-
 cipiò Saxones, haud procul à fonte Luppiæ, Carolo sup-
 plices esse factos, atque eodem propè loco magnam partem
 esse baptizatos. Deinde hunc baptismum ad novum illud
 castellum celebratum esse. id enim, præter Reginonem, di-
 fertè affirman Annales Canisiani. Ex quibus concluditur
 hoc castellum propè à Luppiæ fontibus abfuisse. Quoniam
 tamen super Luppiam situm esse dicitur, non ideo sentien-
 dum super eum rivum fuisse, qui Luppespringæ oritur. Ne-
 que enim is rivus, ut testatur Gobelinus, unquam absolutè
 Luppiæ dicitur. Deinde pugnat cum Caroli consilio. Siquidem
 ante ejus adventum Saxones fusi fugati que erant à Fran-
 cis, usque ad flumen (inquit Regino) quod Lippa dicitur.
 Eodem postea itinere eos persequenti Carolo, ut bellum
 profligaret, super idem flumen castellum ponere visum est,
 eo loco ubi & amnem ipsum haberet in potestate, & transi-
 tu per rivos, ex quibus ipse oritur, intercluso, rebellibus
 populis spem omnem adimeret se ad arma congregandi. Est
 igitur Carolus adversus Saxones idem consilium fecutus,
 quod olim hoc ipso loco contra Sicambros Druso placue-
 rat. Ex quibus apparet, cum tam propinquum fonti Lup-
 piæ fuerit, & tamen Luppiæ, ubi jam flumen dici potest,
 non rivus, impositum; non alibi hoc castellum fuisse, quam
 ubi Drusianus Aliso steterat, ad Luppiæ, Alisonisque con-
 fluentes. Hunc ipsum locum equidem crediderim significa-
 ri, quoties consequentibus annis Carolus cum exercitu ad
 eum locum venisse memoratur, ubi Luppiæ consurgit. ut
 anno D C C LXXX. apud Reginonem: Carolus Saxoniam in-
 gressus ad Heresburgk venit. & inde ad locum, ubi Lippa consur-
 git,

git, & ibi Synodum tenuit. & iterum biennio pòst, Coloniam
veniens Rhenum transiit, & Synodum tenuit, ubi Lippa confur-
git, ubi omnes Saxones convenerunt, excepto rebelle Widikindo.
Illuc etiam venerunt legati Godefridi Regis Nortmannorum, &
Altdeni, & Hosmundus, necnon etiam legati Avarorum missi à
Cacano, & Inguno. Peracto placito reversus est Rex in Franciam.
Hæc Regino. Hic non est nobis anxiè quærendum, ubi fue-
rit Caroli exercitus, cùm ad Luppiæ fontem castra fecisse di-
citur. nihil enim dubito, quin cum omnem campum fue-
rit complexus, qui utrisque Luppiæ fontibus, & eorum con-
fluentibus continetur. id quod hodieque ostendunt inge-
tia aggerum, vallorum, fossarum vestigia, que jam indè à
Caroli memoria, in iis, quos dixi, finibus, pañim visun-
tur. Ubi verò ipse met Carolus interea se tenuerit, id video
non absurdè quæri posse. Sanè reputanti eos conventus, quo-
rum ex Reginone meminimus, nemini veniet in mentem
alibi Carolum, quām in loco aliquo munitiori, tantisque re-
bus gerendis apposito, diversatum esse. Atqui nullus ejus
temporis auctor, alium locum munitum in eo tractu fuisse
prodidit, atque castellum, quod nuper ad Luppiam exedi-
ficarat. hīc igitur morabatur Carolus, cùm ad fontem Lup-
piæ venisse memoratur. cuius rei non leve indicium est,
quòd ante hoc conditum castellum, nunquam, uti sæpe
postea, *ad locum ubi Luppiæ confurgit*, venisse dicatur. Qua in
re scriptores Francicarum rerum, Romanos sunt imitati.
Quemadmodum enim illi, quod ad confluentes Luppiæ &
Alisonis Drusus contra Sicambros castellum posuerat, id illi
ad caput Luppiæ positum dixerunt, quòd non longè suprà
Luppiæ primū justi amnis nomen ferre possit: ad idem
exemplum, qui res gestas Caroli sunt persecuti, tunc illum
ad fontem Luppiæ pervenisse scriperunt, cùm exercitu à
fontibus ad confluentes tendente, ipse codem quo olim
Drusus loco sedem fixerat. Itaque Princeps Illustrissime, tuus
Aliso primū in potestate fuit Romanorum, deinde Sicam-
brorum, qui Francorum fuerunt nobilissimi, tum Saxonum,

ac

ac denique iterum ad Francos rediit, quo tempore simul à Romanis receptus videri potest, quandoquidem eo tempore Romanum imperium ad Francos est Pontificis Maximi auctoritate translatum.

CAPUT XIII.

Aliso sedes Episcorum Paderbornensium.

Verum enim verò satis jam diu Aliso noster Martis & Bellonæ domicilium fuit. Vindicandus est aliquando Religioni & Sapientiae. id factum est, cùm tui, Princeps Illustrissime, Majores, hujus Urbis Antistites, stabilem sibi in eo sedem constituerunt. Quanquam, ut est semper difficile ab eo loco divelli, in quo sis multum diuque versatus, ne tum quidem prorsus belli tumultibus caruit. Nam ut taceam sèpenumero cùm alios Antistites, tum Teipsum, Princeps Illustrissime, Reip. caussa ad arma compulsum, princeps majoribus tuis huc migrandi caussa, Martis perpetua pedissequa & comes Discordia videtur fuisse. Antea siquidem in Urbe sua Paderborna, apud Cathedram Ecclesiam habitabant, quo tempore civium erga suos Præfules amor, & reverentia tanto eis præsidio erat, ut vallum, turresque minimè requirent. At postquam ab iis illa sacrosancta dignitas contemni coepit, gravesque sunt motus adversus Ecclesiasticum ordinem excitati, faciendum visum est, ut ab eorum injuriis semoti, hujus se arcis præsidio tuerentur. Annum, quo id factum sit, non habeo certum dicere. Suspicor tamen circa annum partæ salutis M C C. Certè Otto Ritbergensis, qui anno M C L X X V I I . ad Paderbornensem Cathedram est elevatus, in hac se arce tenebat, dicebaturque vulgo codem, quo hodiè nomine, fortasse, quod in veteris arcis Carolinæ vestigiis esset collocata. Eam deinde civium eruptione incensam & propè complanatam, Henricus Spiegelius Episcopus restituit, ac, nisi fallor, Carolum I V . Imperatorem, qui hac iter habebat

bebat in ulteriorem Saxoniam, in ea accepit hospitio, anno M C C C L X X V . quamquam Gobelini verba legenti potius videatur mansisse Paderbornæ. Nostrā verò memoriā, Princeps Illustrissime, dignam veteri illâ nominis sui gloriâ speiem hæc arx aliquando est consecuta, postquam ingenti sumptu in hanc abs te amplitudinem, excelsitatemque exædificata, fossis & turribus communita, laxis, elegantibus que conclavebus, pomariis, hortis, fontibus ornata est. Itaque quamvis splendido, augustoque Principi accipiendo est idonea. Sed nullam illa, inter tam multa, præstantius teipso ornamentum habet, neque unquam æquè beata, quâm te domino, fuit. Tenuerint illam quondam Drusi, Tiberii, Germanici, sed illi arma ex ea in omnes vicinas oras circumferebant, sed terrorem intentabant, sed luctuosas ubique pugnas & strages edebant. Tuus, Illustrissime Princeps, Aliso nihil habet durum, nihil asperum; sed in eo clementia in subditos, observantia erga finitos dynastas, de omnibus benè merendi voluntas habitat. Denique quid potest in ea domo esse non pacatum & mite, in qua eo tempore, quo vicinia, neandum positis armis, vel præteritas clades deplorat, vel formidat imminentes, de Academia fundanda consilia agitantur, propagandisque bonis litteris, quæ germanæ pacis filiæ, atque alumnæ, non nisi in dulci otio, & summa rerum omnium tranquillitate acquiescunt? Credo mihi, Princeps optime, Carolus ipse Magnus, D E U S bone, quantus Imperator! feliciorum, te Principe, Alisonom esse ducit, quâm se Saxones indè armorum formidine subjugante. Quod enim illi optare potius, quâm sperare licuit, id te nunc assécutum videt. Quò enim illius mens assiduo esset intenta, satis ostendit anno C H R I S T I D C C L X X I I . cùm, paucis etiam Saxonum ad C H R I S T U M traductis, Adriano I. Pontifice, Romam profectus, partem aliquam Saxonie (Luitprandi Ticinensis verba sunt) in provincia Westphalia, quam ad fidem Christianitatis convertit, ut ipse jam prædictus Papa præcepit & docuit, secundâ feriâ Pasche,

1

in

*In vita
Pontif. in
Adriano.*

*in basilica S. Petri Apostoli, inter cetera quæ ad manum Papæ offer-
rebat, Deo in sacrificium obtulit. Vide sine, Princeps optime,
in quo religiosissimi Cæsaris curæ & cogitationes omnes evi-
gilarint? In eo videlicet ut Westphaliæ universam ad
CHRISTUM adjunctam, in Beati Petri, ejusque success-
oris potestate collocatam, DEO immolare. Sed quantum
interest inter rudem, agrestemque populum, & omnibus
ingenii ornamenti exultum, tanto est tuum, Princeps Il-
lusterrime, Caroli sacrificio præstantius. Cujusmodi enim
Westphaliæ Carolus DEO consecrabat? nonne recens è
tenebris emersam, & etiam caligantem, ac, nisi metu reti-
neretur, eodem rursus præcipitaturam? Tibi verò, Princeps
Illusterrime, quale, & quam DEO jucundum munus licet
offerre? tot lectissimos adolescentes, qui modò litteris in hæ-
tua Academia operantur, quique consequentibus seculis
operabuntur: qui non modò ipsi salutarem doctrinam com-
bibunt, sed alios quoque erudire, & aliud ex alio sacrificium
possunt accendere. quod quidem sacrificium DEO gratissi-
mum totque mortalibus salutare, jam indè ex eo tempore,
cùm primum hoc instituendæ Academiæ consilium, in hoc
tuo Alisone, iniisti, immortalem tibi apud DEUM, & homi-
nes gloriam conciliat.*

CAPUT XIV.

Gratiæ nomine civitatis Paderbornensis.

QUÒ magis æquum est Paderbornenses, grates & lau-
des immortales DEO Opt. Max. habere atque agere,
qui te huic Ecclesiæ difficillimis temporibus Theodo-
rum, id est divinum quoddam, & celeste donum largitus
est. Si enim tunc immortali quodam se beneficio affectos
profitentur, cùm Caroli imperio huc missi sunt, qui primis
eos salubris doctrinæ elementis erudirent, quanto est hoc
majus atque splendidius, tua Princeps ope perfectum esse,
ut Divinæ Sapientiæ, & omnium, quæ illi famulantur,
Disci-

Disciplinarum Templum esset Paderborna? Itaque quod disertissimus Judæorum Philo prædicabat de Athenis, eas esse in Græcia, quod sit pupilla in oculo, & mens in anima, idem nunc, tuo, Princeps Optime, beneficio celebrabitur de Paderborna: eam esse *Lumen, Mentemque Westphalie*. Hinc enim illa accerget, qui populum de superiore loco in templis erudiant, qui sacris tribunalibus præsideant, qui Ecclesiæ, qui cœnobia gubernent. Hic illi divinarum, humanarumque rerum scientiam haurient: hic in luce doctorum hominum suæ eruditionis, & virtutis specimen dabunt: hic promeritis titulis, & decoris insignibus cohonestabuntur, eritque dubium plusne Paderborna dignitatis afferat Westphaliæ, tales fingendo, atque formando, an Westphalia Paderbornæ, iis, quos illa perfecerit, munera honoresque mandando. Ipsa verò quantum inde fructum capiet, cum similiter atque his suis salubribus fontibus, omni scientiæ ubertate circumfluet? Numquam illa præterea usque eò se transversam trudi sinet, ut ab homine omnium rerum honestarum ignaro, & bardo, templum, aram, suggestum teneri, absterreri plebem à religione majorum, divelli ab imperio, & auctoritate Principis, & Antistitis sui, divina & humana violari patiatur. Fuerunt hæc Ignorantiae facinora, quæ Rebellionem, Temeritatem, Fuorem perpetuos habet satellites. At verò postquam tua, Princeps Illustrissime, insigni illâ caritate, quâ illius ubique salutem & commodum, nusquam tuum quæstum sequeris, congesti sunt, ut cum Apostolo loquar, carbones super caput ejus, atque demum, ne unquam ad pristinas tenebras revolveretur, hanc ei quasi immortalis lucis officinam comparasti, jubet nos divina Beignitas, & Sapientia, à qua hæc tam certa præsidia provisa sunt, omnia de ea, quæ volumus, polliceri. Licet verò, ut nunc quidem est, justo pauciores hoc tantum tuum beneficium, quanti par est, æstiment, vivet tamen, ac vigebit in memoria posteritatis sempiterna. Noli enim diffidere in paucis annis, Paderbornam ad ejus ætatis gloriam posse re-

12 vocari,

vocari, cùm totius propè, uti narravimus Septemtrionis lux quædam erat, & magistra. Ibi demum cognoscet quàm eximia fuerit tua voluntas, quàm salutaria consilia, quàm immortalia merita. At modò, tametsi apud paucos, ut dixi, hæc eo sunt pondere quo oportet, tamen pauci illi maximas tibi, & suo, & infelicum illorum, qui minus intelligunt, nomine gratias agunt, Deumque precantur ex animo, ut quando non proinde, ac mereris, gratia tibi habetur ab hominibus, ipse tanto hanc jaæturam pluribus, uberibusque præmiis inter mortales, cælestesque compenset.

FINIS LIBRI SECUNDI.



P A-

P A N E G Y R I C I ;
 D I E N A T A L I
 A C A D E M I A E T H E O D O R I A N A E
 P A D E R B O R N E N S I S ,

Ejus Illustrissimo Principi Fundatori oblati,

L I B E R III.

De Illustrissimi Principis in fundanda Aca-
 demia consilio.

C A P U T I.

Proæmium.

Uod, Princeps Illustrissime, honesti liberi suæ
 adversum Parentes, & suæ stirpis auctores
 pietatis esse putant, ut cùm eos omni officio
 colant, tum eorum præclarè factis cognoscen-
 dis, atque commemorandis plurimū dele-
 ctentur: eodem videmur nos, qui que unquam
 in hac Academia bonis litteris inservient, erga te opti-
 mum, ac præstantissimum ejus parentem animo esse debere.
 Est igitur profectò nostrarum partium, posteaquam de West-
 phalia, atque Paderborna, quæ est Academiæ quasi patria,
 nonnulla dicta sunt, ut de tuis quoque, Princeps Illustrissi-
 me, laudimus differamus. Atenim video jam illam tuam
 omnium dictorum factorumque moderatricem, ac magi-
 stram Modestiam, ad hanc solam mentionem laudis con-
 traxisse frontem, & tristiore, quam adhuc, vultu accipere

13

ora-

orationem meam. Sic enim illa te jam inde à prima infan-
tia finxit, atque formavit, ut cùm omnia unius D E I caußâ
facias, à quo omnia sunt profecta, D E U M ipsum sat ma-
gnum tuarum virtutum pretium putas: ut proinde anxiè
semper verenti, ne vel aliud ac D E U M spectasse, vel aliquid
eius munerum ascripsisse tibi videare, molestiæ sit atque fa-
stidio omnis tuarum rerum commemoratio. Atque hanc e-
quidem, tuam, Princeps Optime, submissionem animi, sem-
per, fateor, pro eo ac debui, tanquam coelestem in hoc digni-
tatis fastigio virtutem, sum veneratus: tamen hodiernus
dies nonnullam mihi dubitationem attulit, essetne tali tem-
pore illi de jure suo cedendum, atque paullisper, publici
commodi caußâ, ab illa consuetudine deflectendum. Sic
enim cogitabam: si id vereatur tua Modestia, ne tua laus
quicquam de D E I gloria decerpatur, nunc profecto illud esse
cùm de tua laude silere sit nefas, quoniam, nisi te publicè
laudato, D E I gloriam obscurari necesse est. Non enim
D E U S, cùm hanc tibi Academiæ fundandæ cogitationem
objecit, paucis mortalibus consulebat, sed compluribus latè
terræ, atque populis: non ad fructum exigui temporis, sed
ad perpetuitatem consequentium sæculorum: non viles, at-
que incertas utilitates, sed sapientiæ lucem, solidæ gloriæ sege-
tem, adjumenta sempiternæ salutis, felicitatis præsidia com-
parabat. His talibus tantisque muneribus ut gratiæ, quas
Deo certè debemus, aliqua ex parte respondeant, par est eas
non in arcana tantum, ac tacita cogitatione, sed publicis,
illustribusque mandatas monumentis, in media hominum
luce versari. Quod si ita est, qui fieri potest, ut, cùm benefi-
cia quæ D E U S Opt. Max. Te Princeps Illustrissime admi-
nistro, nobis præstiterit, palam celebrentur, de eo, quod abs
te præclarè gestum est, fileatur? Verebar deinde judicia po-
sterorum. Quid enim existimas illos esse dicturos, si tuum
tanti beneficii auctoris nomen ad eos absque ulla transmis-
rimus, vel tuorum commemoratione meritorum, vel nostræ
testificatione pietatis? Num caußâ dicere licet, quin

nos

nos omnium mortalium invenustissimos, atque ingratissimos fuisse judicent? Tametsi enim nihil est tibi gloriosius, quam, cum tanta perfeceris, nihil gloriae amore fecisse, tamen posteaquam, pro rerum gestarum claritudine, gloria te sequitur vel invitum, nostrâ certè caussâ tibi latandum est, cum his operibus tuis magnificis, atque præclaris gloriam tribuimus, quæ nisi in laude poneremus, nunquam induceremus animum, ut, quod unum optas, his abs te nobis paratis commodis uteremur. Qui enim illum meritâ laude privat, cuius beneficium habet, is profectò satis ostendit ejus se beneficii fructu non moveri. Atque hæc quidem succurrabant reputanti, quid nostram in te pietatem deceat, & quid virtutibus tuis debeatur. Sed quoniam attendendum quoque fuit quid modestia tua, quid aures ferre possent, faciendum mihi visum est, ut tuâ, Princeps Illustrissime, caussâ, laudatione quidem abstinerem, ne tamen suum Fundatorem, ac Parentem Academia quondam ignoraret, breviter, quid in ea instituenda consiliis fecutus exponerem. Ita enim fore confidebam, ut neque posteros quicquam eorum fugeret, quæ scire interesset, neque tuæ modestiae negotium facerem. Tametsi enim nihil horum absque tua laude dici potest, ita tamen dicentur, ut non in iis laus tua, sed eorum utilitas quæsita videatur, in quorum commoda tantum curarum, opumque contulisti.

C A P U T II.

*Illustrissimum Principem, in fundanda Academia, sua,
& Majorum præclaræ indoli respondere voluisse.*

AC licet arduum, & fortasse temerarium videatur Principum, qui, ut fastigio, ita quâdam mentis altitudine Deo sunt ceteris mortalibus propiores, consilia perscrutari velle, & exponere; tamen, quemadmodum ex iis, quæ in rebus creatis cernimus, nonnihil interdum de pro-

proposito divinæ mentis assequimur: ita in iis quæ publicæ
commoditatis amore abs te, Princeps Sapientissime, adhuc
facta sunt, extant nonnulla vestigia, in quibus tua salutaria
consilia, quasi descripta legimus. Quid, quòd in ipsa quo-
que tua indole, natalibus, genere, est quiddam, quo facile, ut
ad alia præclarè gerenda, tum ad meditandam Academiam
extimulatum esse cognoscimus? Quanquam enim, ut est
quisque maximè generosus animus, ita genus, & proavos,
& quæ, ut canit ingeniosus Poëta, non fecimus ipsi, mini-
mè ad se pertinere dicit; tamen postquam semel est animus
virtutis amore inflammatus, hunc è claro genere fructum
capit, quòd eorum facta intuens, à quibus est progenitus,
ne degener videatur, elaborat. Atque hunc stimulum legi-
mus in divinis quoque litteris admoveri: Sic enim Divus
Paulus Timotheum suum alloquitur: *Recordationem acci-
piens ejus fidei, quæ est in te non ficta, quæ & habitavit pri-
mùm in avia tua Loïde, & matre tua Eunice, certus sum autem
quod & in te. Propter quam causam admoneo te ut resuf-
cites gratiam DEI, quæ est in te.* Hoc præceptum ab Apo-
stolo datum Episcopo minimè tibi, Princeps optime, præ-
tereundum putasti. Videbas enim in nobilissima tua Fur-
stenbergiorum familia tot seculis integerrimam fidem Ca-
tholicam, non sine insigni aliarum virtutum comitatu, ut
verbo Apostoli utar, habitasse. Numerabas in iis complures,
qui non vulgarem eruditionem, rerumque usum sibi
pepererant: multos, qui in altiore dignitatis gradu positi,
Remp. consiliis, & operâ sustentarant: in plerisque omnibus
eximia quædam in D E U M pietas, facilitas, atque omnibus
in rebus modestia, & publicorum comodorum amor. Nam,
ut alios præteream, quantâ gravitate, & sapientiâ fuisse accepi-
mus ab avum tuum Wennemarum Furstenbergium? quantâ
vitæ sanctimoniam ejus conjugem Cordulam à Galen? De qua
illud accepimus, solitam tanto C H R I S T I pro nobis dira
passi amore exardescere, ac vicissim optare aliquid ejus caussâ
molestiarum exorberc, ut linteorum omni mollitie deposi-
tâ,

*1 Tim. I.
v. 5.*

sita , laneo duntaxat vestitu , nudisque pedibus sacellum crebro adiret eo intervallo ab avita domo dissitum , quantum inter locum , ubi C H R I S T U S damnatus est , & Calvariæ collem interest . Quam rem scio levem iis hominibus visum iri , qui totum hoc majorum nostrorum , ut nos sentimus , religionis , ac pietatis , ut ipsi dicere solent , simplicitatis , & superstitionis genus ludificati habent . Verum non peccaret me laudare in nobili femina , quod in Alipio , qui deinde fuit Episcopus , prædicandum sibi putavit Augustinus : velut *Lib. 9. conf.
cap. 6.*
fortissimo , inquit , *domitore corporis* , *usque ad Italicum solum glaciele nudo pede obterendum* , *insolito austu* . At hoc domandi corporis more musteum hoc Euangelium funditus caret . Quò libentius hæc talia commemoro , Princeps Illustrissime , ut omnes intelligent , solidam illam , virilem , antiquam , Catholicam religionem à majoribus tuis cultam esse . Hanc veluti carissimam hæreditatem adierunt , posterisque reliquerunt , Avus tuus Fridericus Satrapa Werlenfis , Electoris Coloniensis Consiliarius , & Pater item Fridericus Satrapa Bilsteinensis , cuius integritas , doctrina , prudentia , dicendi vis cùm in patriæ negotiis , tum in publicis Imperii convenientibus saepenumero cognita est . Hanc unà cum laete ipse suxisti à lectissima & antiquæ innocentiae amantissima femina Anna Westphael , quam omnibus semper pietatis officiis coluisti . Non est ab his divellendus Joannes Furstenbergius magnus Patruus tuus , qui D E O mancipatus in nobili Coenobio Sigebergensi , quod D. Anno Coloniensis , accedit è Fructuaria Italæ viris sanctitate præstantibus , quondam fundaverat , brevi ad eas virtutes , quas domesticâ disciplinâ combiberat , sanctiora illa instituta adjungens , tantum profecit , ut facer ille coetus dignum eum judicaret , cui se & coenobium regendum traderent . Quod munus ita sustinuit , ut Instaurator dici possit , cùm veteris illius disciplinæ , tum tectorum , atque fundorum . itaque clarissima est apud illos ejus nominis memoria & præclaris parta virtutum exemplis , & opibus , quas assiduâ rei communis curâ ,

m

ac



ac parsimoniâ collectas haud modicas successori reliquit. Jam verò flagitium sit, si ex hac ipsa inclyta stirpe, Guiliel-
lum Furstenbergium præteream, Ordinis Equitum Teu-
tonicorum Sanctæ Mariæ in Livonia Magistrum, in quo
Principatu Henrico à Galen succedit. Huic duæ res dissimil-
limæ egregiam demonstrandæ virtutis suæ facultatem dede-
re, Principatus, & Adversa fortuna. Nam cùm florenti æta-
te sacram illam militiam administrandam accepisset, in mul-
tiplici reip. perturbatione, consiliis, atque armis integrata-
tem Catholicæ religionis, dignitatemque ordinis fartam te-
tētam conservavit. Quod eo fuit difficilis, quòd cùm fre-
quentibus præliis laceſſeretur à Moschis, interea neque vi-
cinorum dynastiarum dislidia, neque orientes jam tum pesti-
fera ſectæ, res ejus eſſe quietas finebant. Ubi verò jam in-
gravescente ætate, post tantam jaſtationem, portum sibi
quasi quendam providit, & designato ſibi ſuccellore, in muni-
tam in primis arcem Vellinum ſe contulit, ut, quod ſupere-
rat ætatis in honesto otio contereret: ibi verò majus, quā in
medio mari, naufragium invēnit. Nam anno M D L X. cùm
Moschi magnis copiis in Harriam, & Lettoniam ſe effu-
dissent, tandem cæſo Teutonicorum equitum exercitu,
exeunte Quintili Vellinum oppidum, quatefactis vi tor-
mentorum muris, & ignibus in tecta conjectis, ceperunt.
Arcem verò ipſam, in qua Princeps verſabatur, conſe-
rati milites, qui in præſidio erant, pauci corporum ſuorum,
& omnium, quæ eſſerre poſſent, incolumitatem, nefariè
prodiderunt. Quid plura: direptis, quæ in arce erant, Prin-
cipis opibus, iſum fruſtra quiritantem, & fidem eorum ap-
pellantem Moschis dedunt. Neque tamen perfidis ſuā præ-
dā diu frui licuit. Nam Moschi re cognitā ſpoliatos omni-
bus quæ rapuerant, inanes dimiferunt. Princeps iſe ca-
ptivus ductus in Moscoviam, illuſtre barbaris patientiæ &
pietatis exemplum fuit. Cùm enim templo careret, in quo
Romano ritu ſacra fierent, velut quondam Abraham, ſub
queru Mambre, ſic optimus ſenex ſtatis temporibus, ſub
qua-

Gen. 18.



quadam arbore, D E U M colebat. Felicior omnino, qui conservatā majorum religione in exilio, & custodia diem suum obiit, iis, qui, illā repudiata, fumosos titulos, & fluxas opes sibi pepererunt. Etenim Guilielmus noster, quod de Theodoſio Magno ſcripsit olim D. Auguſtinus, *Eccleſiæ ſe* *s. Aug. de membrum eſſe, magis quam in terris regnare gaudebat.* Neque aliter, atque ille affecta eſt cætera Furſtenbergiorum familia, quaꝝ ad hunc uſque diem in tanta religionum licentia, ſuꝝ illi, quam ab optimis majoribus accepit, adhuc preclarè conſtituit. quod noſtrā tempeſtate tam paucis familiis eloſium video tribui poſſe, ut perinde ſint raræ, atque fluvii, qui inveſti in mare dulces, inter ſalfas, aquas perpetuò reſtinent. Atque haꝝ familiæ tuꝝ laudes, Princeps Illuſtriflme, haud paullò magis eam exornant, quam illæ ab ejus vetuſtate, primaque origine decerptæ. Non enim deſunt, qui & antiquarum tabularum auſtoritate, & è gentilitiorum inſignium forma, & natalis loci ſitu demonſtrare ſe poſſe conſidant, Furſtenbergiam domum è vētūtissima, clarissimaque Comitum Oldenburgenſum Stirpe genus ducere: Sed nimirum antiquius tibi ſemper fuit illuſtria majorum tuorum exempla virtutum æmulari, quam obſcuras, & tot ſæculis à noſtra memoria ſemotas generis tui origines excutere, & perſcrutari. Hoc certè Catholicæ religionis ſtudium, quo inflammatus cùm alia permulta gelliſti digna immortali laude, tum hoc gymnaſium condidiſti, pia illorum, atque attenta educatio, ac disciplina tibi primum inſeruit. Exorſaſti deinde, atque auxiſti, quod à parentibus acceperas, cùm profeſtus eſt Coloniam Agrippinæ, cui Urbi Stanislaus Hosius doctiſſimus Cardinalis, non dubitat acceptum ferre, quicquid in provinciis circa Rhenum ſupererat integræ, puræque de religione doctrinæ. Ibi minimè contaminatae, vel ambiguæ fidei magiſtris uſus, eorum ſtudiorum funda‐menta jecisti, quorum fructum facilè vel ex hac tua, affecta jam ætate prompta, & locuplete omnis eruditioſis memo‐ria, quam nemo non obſtupescit, æſtimamus. Cæterum

*Hosius in
epiſt. ad
Senat. Co‐
lon.*

m 2

jam

jam tum illa bonarum tractatione litterarum, inducebas animum, plurimum conducere, ad redintegrandum quicquid in religione labefactum est, juventutem ab iis duntaxat magistris liberalibus artibus infici, qui nihil alienum à majorum pietate sentirent. Quo in studio eruditionem cum religionis integritate copulandi tecum faciebant germani tui Fridericus; eximiā gravitate & prudentiā vir, Canonicus Moguntinus, &c., qui etiamnum vivit, Caspar Furstenbergius duorum Electorum Moguntini, & Coloniensis Consiliarius, supremus Westphaliæ Satrapa, jam pridem in omnibus Imperii conventibus magna cum dignitate, & publico commodo versatus. Neque hæc solūm magnorum operum adjumenta domo ad Remp. attulisti, sed præterea, cùm plerique omnes claris orti natalibus, immodicis in vestium, ædium, familiae splendorem jacturis ornare se sperent fortunam suam, ita à majoribus Furstenbergii sunt edocti, atque assuefacti, ut sciant dignitatem generis crebris & illustribus virtutum documentis, non rerum inanium apparatu, luxuque retineri. Hinc illa tua, Princeps optime, in hoc quoque fastigio in vietū cultuque frugalitas: domus expers strepitū, atque turbarum: latus caritate magis tuorum, quam armis septum: denique sumptus in privatum modici, in publicum profusi. Cui enim nullæ sunt insanæ cupiditates, quæ neque exhaustis Reip. vestigibus expleri possint, ei necesse est opes ad juvandam, ornandamque Remp. superesse. Meritò igitur, Princeps Illustrissime, Academia nostra, non tibi modò, sed inclytæ quoque domui Furstenbergiæ ingentes gratias agit, quod te sustulerit, talemque formarit, cui propter conceptum à teneris veræ religionis, omnisque præclaræ disciplinæ amorem, si quando ad dignum tuis meritis locum pervenires, cupido fundandæ Academiæ facile posset incidere, neque, propter insignem in omni vita temperantiam, rerumque omnium modum facultas perficiendi deesset.

C. A.



C A P U T III.

Miserum statum, in quo à primo Ecclesiam Paderbornensem offendit, Principem in cogitationem Academie impulisse.

Quis verò D E I in Ecclesiam Paderbornensem eximiam voluntatem, atque providentiam satis pro dignitate prædicet, qui in ipso tempore, parta cœlesti afflatus, & domesticis institutis animi tui ornamenta, non diu cunctatus, ad ejus salutem, dignitatemque convertere dignatus est? Vix inter hujus Ecclesiæ Canonicos censeri cœperas, cum in te omnium conjecti sunt oculi: neque quisquam fuit, qui ut tibi honores mandarentur, canos expectandos putaret. Aliorum virtutem diu pericitatur, & explorat Ecclesia, sç̄pe experta eos quoque quorum senectus omni laude floruerit, prius in illo ætatis lubrico, ut non cederint, titubasse. Te in ipso juventutis flore Præpositum sibi delegit, de robore animi tui, constantiâque secura. Quod equidem divino nutu factum arbitror, ut in tempore, Reip. vulnera, quæ paullò pōst curanda tibi essent, accuratè cognosceres. Eo enim tempore versabatur hæc Ecclesia in potestate Principis à Catholica religione alieni, neque multò antè vicinæ provinciæ gravibus erant ob dissidia de fidei doctrina motibus jactatae, quos Gebhardus Truchsesius Archiepiscopus ductâ uxore, & Ecclesiæ contemtâ auctoritate excitarat. Itaque omnibus fato quodam temporum ad studium novarum rerum conversis, & cum iis faciente ipso, qui corrigere debuit, Antistite, universa rei Catholicæ cura, huic Admodum Reverendo & Nobilissimo Canonicorum Ecclesiæ Cathedralis Collegio incubuit, cuius in tuenda majorum religione excubiæ, ac labores digni omnino sunt quos justissimis laudibus, & gratiis posteritas tota prosequatur. Inter hos eminebat tua, Princeps Illustrissime, animi magnitudo in vincendis rebus adversis, prudentia in capiendo

m 3.

con-



confilio, dexteritas in Ecclesiæ incolumentate ubique procuranda. Itaque cùm defuneto Principe de successore deligendo Canonici convenissent, nemini propè dubium fuit, quin, si salvam vellent Ecclesiam, tuæ potissimum fidei credenda esset. Ita omnibus volentibus, & faustâ preicatione te prosequenteribus, Episcopus Paderbornensis es renunciatus. Ibi cùm provinciam propè depositam, ac deploratam accepisses, ita persanandam putasti, ut eam aliquando non qualem modò accepisses laceram & afflictam, sed florentem, ornatamque posses successori relinquere. Nihil dico de fortunis, quas propè consumptas repperisti: nihil de ære alieno, quo graviter sanè premebatur: nihil de oppositis pignori fundis, ac villis. Taceo non modò nunc exisse ex ære alieno, & quicquid usquam obligatum fuerat bonorum Ecclesiæ, abs te liberatum esse, sed etiam novas arces exædificatas, nova vectigalia constituta. Et quoniā superiore libro nonnulla à me dicta sunt de hac tua ad confluentes Lupiæ, & Alfonis nova arce, adjiciam quoque de altera nonnihil, quæ Wevelsburgum dicitur. Ferunt in eodem loco antea arcem stetisse, cuius originem Hunnis, sive Hungaris tribuunt. Illi enim priusquam ad CHRISTI fidem, & humanitatem traducerentur, ut erant in primis immanes, & efferi, eruptione factâ in Saxoniam, & Turingiam circa annum Domini D C C C V I I . omnia flammâ ferroque vastarunt. Ab illis igitur, vel certè contra illos, prodidere quidam arcem primò positam II. à Paderborna millario, ac restauratam deinde à Friderico Arnsbergæ Comite, qui decessit è vivis anno CHRISTI M C X I I I . Venit postea in potestatem nobilium dynastarum in Beuren, atque inde in ditionem Paderbornensem Antistitum. Extructa est ab te, Princeps Illustrissime, forma triangulari, specie sanè visendâ, atque magnificâ. Quæ quidem, aliaque ejusdem generis opera si commemorarem, nihil equidem dicerem à laude Ecclesiastici Principis alienum. Nam etiam noster Magnus Carolus, cùm epitaphium carmen, quod Romæ, hodieque in

*Gobelinus
stat. 6.
e. 57.*



in Vaticano visitur, scriberet Hadriano I. Pontif. Maxim. quem summā pietate coluit, hæc inter ejus laudes quoque numeravit:

*Doctrinis, opibus, muris erexerat arces,
Urbs caput, orbis honos, inclita Romatua.*

*Extat apud
Baron. tom.
9. Anno
CHRISTI
795.*

Sed magis semper es arbitratus ad te pertinere quæ ad animorum sempiternam salutem, & Orthodoxæ religionis in columitatatem spectarent. Eò igitur evestigio curas cogitationesque contulisti. Neque id diu præferre cunctatus es. Certè David Chyträus homo Lutheranus, tuam electiōnem enarrans sic ait: *Paderbornensi diœceti Theodoricus à Furstenberg gubernanda propositus est, & Calendarium Gregorianum subditis statim obtrusit.* Studuit homo yafer, obtrudendi vocabulo, pulcherrimum factum in invidiam vocare, quam scilicet Princeps Illustrissime, facile contemnis, quod auctorati Vicarii C H R I S T I, & Nicæni Concilii omnium sanctissimi parere, nihil habeat quod erubescendum videatur. Post hæc verò cum animadverteres cursum religionis Catholicæ duabus potissimum rebus retardari, multitudine prava docentium, qui superioribus temporibus omnia ferme suggesta involarant, & inopiā eruditorum facherdotum, qui veritatem adversus mendacia tuerentur, utrique medicinam adhibere aggressus, lolii fatores facessere, & res suas sibi habere jussisti. Diuturnioris aliquantò curæ, & operæ fuit idoneos rei Catholicæ administratos, & doctores formare. Diu enim in hac urbe ne quidem Grammaticæ ludi satis ad rem Ecclesiæ erant comparati, donec Salentinus Coloniensis Elector, qui hanc Ecclesiam simul administrabat, annuis vectigalibus auctis, studia litterarum nonnihil erigeret. Extiterunt deinde illo decadente, ea tempora, ut Reverendum, & Nobile Cathedralium Canonicorum Collegium in litteris, quibus anno M D L X X X. Kalendis Junii longiorem operam Patrum Societatis J E S U expedit, confirmet raros possere reperiiri, quorum satis constans, & certa sit de divinis rebus sententia, cum quilibet fere, quod commodum sit, credat. Quæ res quo-

*In Chronico
Saxonie
anno 1585.*

quoque eosdem sapientissimos Ecclesiae nostrae proceres impulit, ut ludi administrationem omnem Societati J E S U postea committerent. Sed tibi nimurum jam tum, Princeps Sapientissime, videbatur, nisi conditam Academiā, nunquam Ecclesiam in his terris eam doctorum hominum, quæ satis sit ad frangendos adversariorum impetus, facultatem habituram. Neque enim defuerunt viri graves, è quibus non nemo etiamnum supereft, qui te audierunt, cùm diceres ipsis principatū exordiis te confidere, tantum tibi vitæ atque opum datum iri divinitus, ut publicam artium maximum officinam ponere in hac urbe liceret. Ea res quamvis id temporis ardua videretur, tamen fuit cui contemplatio magnitudinis animi tui, & spes utilitatis publicæ lachrymas cieret. Jam enim intelligebas, quod à Divo JOANNE CHRYSOSTOMO disertā, ut assolet oratione, firmisque rationibus ostenditur, parum esse Christiano doctori, si vulgari quādam, & mediocri eruditione sit prædictus, propterea quòd incertum sit, quibus potissimum armis humani generis incautos sit aggressurus. Facit enim ille quod ii, qui urbem aliquam circumfident, ut eā parte præcipue faciat impressio-
nem, quā paucioribus præfidiis munitam esse viderit. Itaque si parochus quis Ecclesiam regendam suscepit, qui, ut ceterorum non sit rudis, minus sit Græcè, vel Hebraicè doctus, confessim extimulat, qui voces in sacris litteris, aliter ac veritas habet, accipiendas esse contendat: Si dialectices est ignarus, exfuscitat, qui argutis cum conclusiunculis im-
pediat: Si historiæ veteris, & Ecclesiasticæ est imperitus, qui fictas fabulas, & contortas, ac difficiles temporum ratio-
nes objiciat. Denique quacumque in arte fuerit minus ver-
fatus, in ea si adversario latus præbuuisse videbitur, quamvis ceteroqui sit excellenti, reconditaque doctrinā, tamen caussam dederit imperitis suspicandi, ideo quippiam in Ca-
tholica doctrina verum non esse, quòd à veritatis doctore, non quicquid contrā dici potest, diluatur. Id si iis usu ve-
nire potest, qui sublimioribus disciplinis exulti, minorum
sunt

*Lib. 4. de
Sacerdot.*



sunt expertes, quid illis fiet, qui inferioribus leviter tincti, nullam partem graviorum attigerunt? Magnâ igitur ratione, Princeps Illustrissime, instituisti, cùm provinciam accepisses refertam oppugnatoribus Catholicae religionis, vacuam propè iis qui pro dignitate ejus scita, ac decreta explicare possent, successori optimè eruditis hominibus septam & vallatam relinquere, qui illam omni doctrinæ genere, adversus quodlibet hostium genus propugnare, & tueri didicissent.

C A P U T IV.

Illusterrimum Principem fundanda Academia paci, & tranquillitati publicæ consultum ivisse.

QUibus rebus perfecisti ut & Episcopi, cuius est sibi creditos homines erudire, & Principis, qui non sine caussâ gladium portat, præclarè muneribus perfunctus esse viderere. Tunc enim minus molestum est timore poenarum ad veritatem amplectendam cogi, cùm non defuerint, qui eam veritatem esse, quæ ostenditur, errorem verò qui abjici jubetur, liquidò docere possint. Itaque ubi & mens doctrinâ imbuitur, & voluntas potestate compellitur, prona est obedientia. Obedientiam consequitur pax illa, de qua alicubi Augustinus, cùm disputaret contra Gaudentium, qui nolebat Hæreticos, & Schismaticos Imperatoribus poenas dare: *Regibus (inquit) ea qua secundum Deum sunt religioso timore jubentibus quisquis obtemperat, timore incipiens, & dilectione proficiens, à Domino accepit pacem, non sicut pacem dat seculum. quoniam seculum dat pacem propter temporalem utilitatem: Dominus aetem propter aeternam salutem.* Verum, ut alibi docet idem sanctissimus Antistes: *Utitur etiam cœlestis civitas in hac sua peregrinatione pace terrena.* Cujus civitatis procuratio cùm Christiano Principi, praesertim Ecclesiastico, sit commissa, & ipse humanarum voluntatum compositionem, quantum salvâ pietate ac libidinosa

Lib. 3. contra Gaudentium circa finem.

Lib. 19. de civit. Dei c. 17.

Ibidem.

n reli-



religione conceditur, tuetur atque appetit, eamque terrenam pacem resert ad cælestem pacem: quæ verè ita pax est, ut rationalis dunt taxat creatura sola pax habenda, atque dicenda sit, ordinatissima scilicet & concordissima societas fruendi Deo, & invicem in Deo: Igitur, ut equidem Augustini orationem audio, Christiano Principi præcipuè propositum esse oportet, ut omnibus, quibus imperat, cum Deo atque inter se conveniat. Deinde hujus gratiæ, in iis quoque quæ ad hanc vitam degendam pertinent, pax est Reip. concilianda, atque tranquillitas: Hæc igitur, Princeps Illustrissime, cùm tui officii esse duces, quantum animo laboraris, ut omnis tui imperii regio otio ac securitate frueretur, nemo est in ea rerum omnium tam rudit, ac peregrinus qui ignoret. Quantis enim curis, atque impensis egisti, ne ardente finitimis terris civili bello, idem populos tuos afflaret incendium? quād sedulò semper honestam cum vicinis Principibus adversus prædonum vim, ac rabiem, societatem coire studiasti? quoties eorum ingentes copias, ne miserorum fortunas diripi, & corpora vexari patereris, pacto cum iis pretio, à finibus tuis arcuisti? quoties jam ingressos, & velut in hostili populantes omnia, atque vastantes, immissis copiis tuis cecidisti? quanto metu provinciam universam eo die liberasti, cùm tuis auspiciis, tuorum militum virtute, volitantia in conspectu hujus Urbis prædonum agmina, ad Benhusium vicum justis ultus es armis? Quid? cùm ad novam-Becam oppidum, equestres copiæ, ejus oppidi exitium, & vastitatem anhelantes, à tuis hominibus devictæ, hibernas nives suo sanguine cruentarunt? Quid ego ceteram tuam in omnes publicæ quietis perturbatores, auctoresque injuriarum justissimam severitatem commemorem? Itaque in ditionis tuæ terras aut tam validâ manu veniant oportet, ut pugnam non pertimescant, aut certè velut quendam prædonum scopulum devitent. Sed in primis studio tibi semper fuit, ut Paderborna tuæ provinciæ caput, omni civili motu vacaret. Nam cùm anno M D C I I. mense Februario gravis senatum inter, & non nullos

nullos cives exorta esset discordia, cùm senatus à civibus Reip. male gestæ accerferetur: cives quòd senatum in curia vi quasi in custodia tenuissent, indignisque modis affecis-
tent, insimularentur, operam dedisti, ut omni vi, ac tumul-
tu semoto, jure experiri mallent. Itaque vi. Kalend.
Quinæt. ejusdem anni de tuo consilio viros cùm natalibus,
tum juris scientiâ præstantes dedisti, qui caussam universam
cognoscerent. Interea verò cùm contestatâ jam lite is an-
nus esset in exitu, novorumque comitiorum tempus appe-
teret, ac senatus quidem se in officio fore profiteretur, cives
autem illi, duce, atque signifero Liborio Wichardo, homi-
ne ad res novas moliendas acri, atque versuto, neque ab
armis discederent, neque ullum senatus infectandi finem
facerent, sapienter vetuisti, ne quorum nomina ex utraque
parte delata essent, eorum in comitiis ulla ratio haberetur.
Ibi verò incertum fuit plusnetuis consiliis ad pacandam, an
illi furore ad perturbandam rempubl. incumberent. Ubi
enim dies comitiorum ineunte anno M D C I I I . adfuit, ac
de more in curiam viginti-quatuorviri, penes quos jus e-
rat renunciandi senatus, convenerunt, advolat cum arma-
ta suarum partium multitudine Liborius, atque intentato,
iis qui confederant, terrore, neminem, nisi ex suo suorum-
que voluntate, in senatum allegi sinit, & cuiquemque ma-
gistratum mandari oporteat, ipse nominatim edicit. Ve-
rūm non diu Liboriani hujus quoque, quem pro sua libi-
dine creaverant, senatus injuriis temperarunt. Necdum e-
nim eo mense elapso xvii. Kalend. Februarias is ipse sena-
tus, supplici dato libello, graviter de iis est questus. Sed
non defuit ei, qui illos contra morem, & instituta majorum
eligendos curarat, quemadmodum eadem miseros impor-
tunitate frangeret ac domaret. Ut enim sibi jam pridem
homines factiosos, audaces, egenos, ex ultima plebe devin-
ixerat, omni artificio allaborabat, ut hos omnibus in rebus
dicto audientes haberet. Illi simul atque signum datum e-
rat, cum telis veniebant in curiam: illi quæcumque ipse vel-

let assensu suo, & inconditâ vociferatione comprobabant: illi, si quis contrâ hiscere esset ausus, ad suum scilicet Catilinam deferebant, quos ille contumeliis, minis, atque interdum colaphis, & adacto cultro vel secum facere, vel certè obmutescere cogebat. Ira deterrium quemque sponte; qui plus aliquanto videbant, metu ad suas partes adjunxerat. Adhæc, ut omnia, vel invito senatu, pro arbitrio gereret, novum vigintiquinquevirum consilium, è suo illo grege, contra civitatis leges & jura creaverat, quorum operâ affequebatur, ut quæcumque ipsi placuissent, populus vellet jubaretque. Neque deerat homini, quamvis litterarum ignaro, populâris facundia, quâ in concionibus, quas frequentes ad suos habebat, utebatur, ut eum sui de cœlo delapsum hominem quandoque, ne ipso quidem dissentiente, clamarent. Hunc perturbatum civitatis tuæ statum, Princeps, cùm diutius ferre non posses, optaresque cives tuos, qui postremorum hominum dominatu premebantur, in libertatem vendicare, principiò vi. Kalendas Jun. ejusdem anni M D C I I I. Senatum ac populum jussisti illos vigintiquinqueviros, quos contra leges, & vetera pacta, ad alendum improborum civium furorem, crearant, omni illâ potestate privare. At illi scilicet annitentibus Liborianis, non potestatem eis ademerunt, sed nomen duntaxat commutarunt, ut qui antea vigintiquinqueviri, iidem postea Delecti è populo dicerentur. Quid erat sui Principis auctoritatem ludos facere, si id non erat? Neque tamen, ut eras accenso infelices adjuvandi studio, spem curamque abjecisti. Animadverteras è classibus in quas tota civitas est tributa, nonnullam integrum esse totius hujus perduellionis, & ex aliquot aliis complures, quos duntaxat cæterorum metus mutos effecerat. Spem igitur eras ingressus, hos, quibus aliquid reliquum erat sanæ mentis, ad divellendos sese, atque abrumpendos penitus ab omni facinorosorum societate posse impelli, si modò scorsim singulas classes alloqui, & sui officii admonere licuisset. Atque edixeras quidem, ut pridie idus De-

Decembres ejusdem anni classes omnes civium , urbe egressæ suo quælibet certo loco mandata sui Principis acciperent. Senserunt Liboriani quid ageretur , & disseminato rumore evocatos à Principe adversus cives , ex ea provinciæ parte , quæ trans montes dicitur , homines armatos , qui civibus audiendo Principis mandato occupatis , urbem invaderent , non modò effecerunt ne quisquam prodiret , sed etiam administrō , quem ad eos allegaras , præcisè negarunt , se , qui in eadem cauſa erant , posse disjungi. Quæ quidem à Liborianis , notis illis clamoribus jačabantur , cæteris interea , ut solebant , timore conticentibus. Addebatur in te , Princeps illustrissime , dicta acerba , & minæ : ac ne cui civium liceret ad arcem tuam commeare , quatuor ipsos dies portæ omnes civitatis clausæ , & custodiis septæ tenebantur. His cognitis , cùm inter omnes constaret horum omnium malorum opificem , atque architectum esse Liborium , ratus eò abstracto cæteros ad frugem posse corrigi , missis ad cenobium Abdinckhoffense gravissimis è tuo consilio viris , eo accito cùm veteri , tum novo senatu , illum vel noxæ dedi , vel dum in judicio objecta sibi crimina dilueret , ab ipsis haberi in custodia iustisti. Senatus cùm in tam æquis postulatis Principi reluctari non posset , essetque ipse à Liborianâ faetione creatus consul non obscurè homini iratior , tamen arctiorem custodiam , & vincula deprecati , censuerunt satis fore si in curia tantisper attineretur. Vocatus ille in curiam primùm tergiversari , deinde cùm iterarentur mandata , aperio capite illudere , & minas de more jacere. ad extremum cùm senatus , ut saltem in speciem mandata , quæ acceperat , exhausisse videretur , missis apparitoribus hominem ut imperata faceret , vellet cogere ; ille cùm domum suam armatis hominibus cinxisset , ac præter minora tela etiam ex ipsis urbis mœnibus advecta aliquot minora curulia tormenta , pro fenestris suis collocasset , non dubitavit in ministros Reipubl. explodere. Sed hoc quamvis indignum facinus in usitatâ quâdam audaciâ , atque impudentiâ haud multò post

n 3

cu-

cumulavit. Habebatur fortè senatus, cùm Liborius cum frequenti suorum manu, quorum singuli telis erant accincti sub pallio, in medium confessum venit. Præfatus, liquere sibi jam illud esse, quando consociari totius animos civitatis, & coalescere oporteat, orat senatum ut jam tandem aliquando decernat, velit necne suis, ac suorum consiliis parere. Cùm senatus cunctaretur, Liborius cum suis procumbit in genua, ac suos quidem jubet tertium orationem dominicam pronunciare, senatum vero interea statuere, quid sibi facendum putet. Et jam belli isti precatores, reductis palliis, tela ostentabant, quibus, nisi mos eis esset gestus, in senatorum cæde bacchari certum erat. Quid quæris? Senatus tam præsenti periculo perterrefactus obsignatis tabulis confirmat, se in omnibus, quæ ad Liborium, ejusque partes pertinerent, cum ipso esse facturos. Has tabulas cùm accepisset Liborius reverenter exosculatus, gratiis aëtis, ac decem taleris in vinum senatu, nomine populi donatis, ita discessit ut qui præclarè sibi rem gesisse videretur. Ex eo tempore in pejus omnia ruere cœperunt, eoque res evasit, ut Januario anni M D C I V. senatu ex Liborianis creato, ipse Liborius consul renunciaretur. Quid in eo consulatu ab improbis hominibus, Princeps Illustrissime, non pertulisti? Antiquissima paœta, Principumque constitutiones violatae: ademptum tibi per summam injuriam supremum in urbe rerum criminalium arbitrium: cives, qui aliquid contra consulis audaciam mutire essent ausi, inusitatis suppliciis vexati: interdictum severè omnibus ne ad te appellare, aut confugere auderent: conducti novi tribuni, signiferi, aliquie rei bellicæ administri: tormenta pro mœnibus posita, ut, quod dicere solebat Liborius, tibi Principi suo, vel ad menam accumbenti negotium faceſſerent. Quid quod non erubuit primariæ Ecclesiæ nobilissimo Canonicorum Collegio denunciare, ut alium sibi Antistitem providerent. Nonne eosdem Canonicos, ceterosque omnes Ecclesiasticos, ac religiosos homines, etiam cùm nihil urbi impenderet adversi,

pu-



publico edicto ad tympani sonitum, propositâ fortunarum, ac vitæ jacturâ, arma sumere, & in excubiis militari more agitare compulit? Nonne eosdem omnes, atque adeò tuos quoque, Princeps Illusterrime, consiliarios, & qui Reip. causâ ad provincialem conventum cum mandatis mittebantur, ipsum quoque totius provinciæ quæstorem, pedem ex urbe efferre suo injussu vetuit? Ac sperabas quidem ordinum totius provinciæ auctoritatem, qui v. Non. Mart. in conventu Dringebergensi adfuerant, aliquod apud eos pondus habituram, qui per idoneos homines, Paderbornenses etiam atque etiam admonuerant, viderent, ne quod eorum gratiâ tota provincia detrimentum caperet. At illi parum ab eis pacati retulerunt, neque obscurè cognoverunt delibera-
tum illis esse, & protec̄torem sibi asciscere, & cætera quoque hujus provinciæ oppida, si fieri posset, in societatem perduel-
lionis attrahere. Interea ipsis auctoribus rumor incessit, fo-
re ut urbs obsidione premeretur, quem eo consilio ferebant,
ut Ecclesiasticos in urbe retinerent. itaque circa idem tem-
pus, non est veritus Liborius primariæ, & Cathedralis Ec-
clesiæ Canonicis minari, si urbe excessissent, nullam maxi-
mi templi partem integrum esse mansuram. Nimurum jam
omnia in urbe poterat, cuius crudelitatem multi jam Eccle-
siastici, multi cives ut vitarent, ex urbe se eduxerant. cæ-
teri in perpetua formidine versabantur. Etenim cùm ipse
clandestinis habendis cœtibus omnia fermè perfecisset, ta-
men assicutus summum inter cives imperium, adeò non fe-
rebat eos coire, ut nullus paullò melior civis alium conve-
nire posset, quin si ad Liborium à suæ factioñis hominibus,
quos in hæc talia perquam intentos habebat, ejus nomen
esset delatum, compedes, gravesque poenas pertimesceret.
Circa idem tempus vulgato jam illo, de quo dixi, rumore,
quatuor-viri delecti, qui arma & præsidia Liborianæ do-
minationis curarent, unusque ex iis missus, qui pecuniam,
copiasque contraheret. Hæc circa Pascha anni MDCIV.
gerebantur, quo tempore propè jam sepulta erat, Princeps

Illu-

Ep. 50.
 Illustrissime, tuæ salus civitatis, nisi eam admirabili tuâ prævidentiâ, ac celeritate excitasses. Quam ad rem adjumento in primis fuit ille cùm regii sanguinis splendore, tum bellicæ virtutis gloriâ Illustrissimus Joannes Frisiæ Orientalis, & Ritbergæ Comes, Esenæ, Stedesdorpi, & Guitmundæ Dominus, in quem verè cadit illud S. Augustini de Bonifacio Comite, eum de virtute militari servire fidei, quam habet in C H R I S T O. Tametsi enim tota hæc, quam adhuc descripsimus, seditione, non religionis cauſâ präcipue erat exorta, quia tamen ejus auctores omnes Catholicam religionem execrabantur, jamque decreverant, nullum präterea Catholicum in senatum legi oportere, certum est eos suis illis, quæ commemoravimus, sceleribus eò intendisse, ut si res procederet, Catholica Religio his locis funditus interiret. Hoc cùm vir sapientissimus intelligeret, facile colligendarum copiarum, & seditionis opprimendæ provinciam suscepit. Itaque tametsi febri laboraret, quia tamen omnis mora perniciem potuisset afferre, silentio noctis profectus, ix. Kalend. Maii appositâ suis ipse manibus pulvilli machinâ, nîsus est, intimam urbis portam disturbare (nam duas jam & pensiles crates nullo negotio dejecerat), sed cùm ejus impetu effractis tantum aliquot asseribus, non esset aditus patefactus, excitique Liboriani, aliquot è militari turba, de moenibus glandibus plumbeis trajecissent, ingenti animi constantiâ Comes, cùm jam febris accessione conflictaretur, contempto manifesto vita periculo, suos à fuga retraxit. Hâc ejus constantiâ erecti bonorum civium animi, qui ad id loci Liborii oppressi dominatu tacuerant, ac divisâ in factiones civitate, induciæ tandem, & commeatus ad te illustrissimum Principem est postulatus. Interea majora tormenta advehi jussa, & ad acriorem obsidionem apparatus fieri, cuius metu ad extremum vi. Kalend. Maii Urbs, nullius effuso civis sanguine, est dedita, ipseque perduellionis auctor, à civibus hominis immanitatem detestantibus, Victori traditus. Non possum hoc loco committere
 quin

quān impudentia quorundam mendacia commemorem, quorum gratiā hēc ipsa, ex actis publicis, paullō pluribus sum persecutus. Etenim cūm is, de quo adhuc locuti sumus, Liborius Wichardus in carcere vinētus teneretur, ac Lutheriani Prædicantes, qui templum forense S. Pancratii antea tenuerant, fugā essent elapsi, ipsius rogatu quidam Cathedrales Ecclesiae Vicarius, & ē Societate J E S U P. Fridericus Wachtendunckius hominem adiit. Hujus colloquiis permotus, tandem ad Catholicam Ecclesiam se contulit, Catholicō ritu sua peccata confessus, & sacrā Eucharistiā munitus est, ac non modō pro tribunali, cūm jam latā sententiā damnatus esset, verū etiam cūm jam inibi esset, ut ultimum supplicium lueret, Catholicam fidem quam esset amplexus, usque ad ultimum spiritum retinere velle professus est. Hāc ejus vulgatā conversione irritati Prædicantes, eam apud rude vulgus incredilibus mendaciis obscurare conati sunt. Edidit enim contra P. Friderici de hac re commentarium quādam nugamenta, Joannes Nigrinus, ad D. Thomā Sufati Prædicans, quibus pro vestibulo apposuit Philippi Nicolai præfationem. Eā præfatione ex Gangulphi Hergundi, ut ait, libris quatuor de rebus Paderbornensibus hēc narrantur, ex quibus quām sit hoc hominum genus ingeniosum ad comminiscenda mendacia quivis intelligat. Prīmō igitur v. Kalend. Maii narrat detruso in carcerem, ac de pede suspenso, papillas abscisas, ac fervens oleum vulneribus, naribus verò liquoris, ē fæcum halitu, ardore ignis expressi, quem Germani vinum ardens, sive adustum, Itali aquam vitæ appellant, tres ampullas infusas. Atqui ex actis publicis certum est, Liborium consuetas quoque quæstiones deprecatum, omnia crimina fassum esse. Deinde refert Prædicans, Pridie Kalendas Maii, cūm se Liborius in judicio, magno animo defenderet, abs te, Princeps Illuſtrissime, per duos administratos jussum esse sine judicio, aut sententia evestigio foras ad supplicium rapi. Atqui constat Liborium viā & ordine, uti jura Cæſarea præcipiunt, interro-

o gatum,

gatum, auditum, omnia palam fassum, ac denique damnatum, supplicem factum, ut humari posset. Id quod plurimorum, qui judicio interfuerunt, testimonii compertum est, sicut & illud quod de professione Catholicæ fidei antea narravimus. Atqui Prædicans facit eum, cum duceretur, atque à duobus Jesuitis sollicitaretur, respondentem, non sentire se cum eis, fidem se habere, quam nemo sit erepturus. Addit illud quoque, Liborium cum sibi ultrò ad supplicium vestes detraxisset, ad te, Princeps Illusterrime, conversum, sic locutum esse: Adesdum Episcope THEODORE, & pota largiter sanguinem meum, quem tamdiu sististi. Nimirum Lutherianum magis hæc oratio decebat, quam salutatio Angelica, quam qui supplicio interfuerunt piè pronunciatam à Liborio, magno consensu testantur, atque etiam ad implorationem DEI matris adjunctum: Sancti Angeli, & omnes electi DEI orate pro me. Sed Prædicantibus majus flagitium est precari Sanctos, quam calumniari Principes. Queritur postremo Prædicans de mortuo hæc vulgari, qui de se nihil testari possit. At testari possunt tot viri honestissimi qui interfuerunt, & postremas morientis voces acceperunt. Scilicet unum hoc ipsis hominibus curæ est, ut rudem populum quibuscumque artibus sibi devincentum teneant: quid prudentes sentiant, nec flocci faciunt. qui facilè intelligunt, eis, qui audeant mentiri populo, hominem palam, audiente populo salutationem Angelicam pronunciantem, maledixisse suo Principi; eisdem non deesse artes, quibus infelici plebeculæ persuadeant sacras litteras aliquid dicere, quod Spiritui Sancto nunquam in mentem venerit. Certè id unum suo illo libro egit Nigrinus, neque tamen eo contentus, cum metueret, ne parum esset in Bibliis præsidii, opem quoque à famosis libellis accersit. Prædicantibus enim pluris est Pasquillus, quam S. Jacobus Apostolus. Itaque si quid è S. Jacobo eis objicias, in promptu est illud Lutherianum: Non est in canone: fin autem è famoso libello mentiaris Henricum Jesuitam Antverpiæ MDCI. XII. Aprilis publicè exustum,

Nigrinus
p. 174.



stum, nefandi flagitii pœnas dedisse, id nimirum perinde atque Euangelium credi oportet, tametsi Senatus Antverpiensis obsignatis, & palam editis litteris, adeoque tota civitas testetur, nullum unquam Jesuitam Antverpiæ reum auctum esse, nullum supplicium luisse. Sed quid ego hujus diei candorem atque lætitiam Nigrini mentione infusco? Ad te redeo, Princeps Illusterrime, quem dicere institueram, condendâ Academiâ, paci & tranquillitati publicæ consuluisse. Docuerant enim te civiles hæ turbæ, eos qui rebus novis studeant, hominibus ferè rerum omnium ignaris uti, quod ii ferè impetu quodam animi, & furore ad deteriora rapiantur. Qui verò docti sunt, præterquam quod liquidius res omnes intelligent, longèque quid ex quaue oriri possit incommodi prospiciunt, tum verò certissimum est, quod ab Agellio scriptum est, qui bonas artes sinceriter cupiunt, appetuntque, eos esse vel maximè humanissimos. Itaque Liborius noster hominum legendi, scribendi rudium operâ plurimùm utebatur, quem compertum est palam in suis illis coetibus concionantem, veteres quasdam litteras, quas nescio quid ad dignitatem, & libertatem civitatis pertinere diceret, palam plebi recitasse, ac subinde gratulatum esse, ea tempora obtigisse huic urbi, ut non minus litterarum imperiti, ac Doctores intelligerent. Tum verò nominatim quempiam percunctabatur omnium abjectissimum, ecquid hæc intelligeret? cui ille, tametsi postea apud alios, si seorsim interrogaretur, se nihil intellexisse fateretur, tamen in illo conventu annuebat. Ita homines ignaros assuefaciebat, ut quicquid ipse protulisset, licet cujuſmodi esset ignorantem, tamen continuo suā acclamatione comprobarent. Qui verò erant eruditæ, quia numero vincebantur, ne alios sui erroris admonearent, vulgaris furoris formido retardabat. Quare, si unquam alias, eo tempore cognitum est, ex usu esse Reip. ut abundet hominibus doctis, atque intelligentibus, ut inscia plebs eorum & doctrinæ informetur, ne erret, & multitudine reprimatur, ne insaniat. Faciunt verò ad id plurimum ea gymna-

*Noit. Att.
lib. 13. c. 15.*

sia quæ intelligendi vim, ac prudentiam plurimum exacuant, atque adolescentum animos quām longissimè à temerario & furioso vivendi more, ad rationis leges & instituta traducent. Deinde quæ cum honestissimis litteris, veræ religiosis, & sanctimoniac curam, quām arctissime copulant. Ubi enim sunt de religione lites, atque dissidia, diuturna pax esse non potest. Ac ne quidem ubi falsa aliqua disciplina, verâ religione abjectâ, sola retinetur. Proprium enim est falsæ doctrinæ, ut constare sibi non possit, neque leviores solent esse errorum inter se, quām cum veritate conflictus. Quæ igitur in urbe omnes idem inter se, & cum iis, qui toto orbe, omnibus æstatibus pietate floruerunt, de divinis rebus sentiunt, habetque magnam eruditorum hominum facultatem, eam certum est præstantibus conservandæ publicæ quietis, & colendæ concordiæ adjumentis abundare. Iccirco Liborius noster, quo tempore maximè perturbandæ atque pervertendæ civitati erat intentus, severo edicto vetuit, ne quis adolescens, qui ad Collegium Societatis J e s u , descenditcausa, itaret, cujusquam civis hospitio uteretur, neve cives eò liberos suos mitterent. qui contra fecisset, is quinquaginta taleris multaretur. Nimirum ingens erat inter illa quæ rudi plebeculæ, in seditionis illis conventibus venditabat, & hæc quæ in Catholicis, & bene institutis gymnasiis juventuti præcipiuntur intervallum. Ibi enim popularis licentia, effrenata peccandi impunitas, & rerum omnium perturbatio quærebatur. Hic D E I timor: magistratum veneratio, atque observantia: modestia, & pacis amor, teneris mentibus inseritur. Sed non providebat infelix, quod adolescentes ipsius minis, atque edictionibus prohibiti, in scholis à magistris non didicissent, id è tristi ejus exitu, & justissimo supplicio esse cognituros. Quando enim liquidius demonstrata est furiosarum ejus concionum vanitas, quām cum stans ad infamem columnam, omnia sui consulatus probra objectantibus, os præbebatur: cùm clausi meenibus, & sine sua tessera portis egredi vetiti Ecclesiastici: cùm excruciatihiber-

hiberno cœlo, gravissimo gelo cives: cùm mulier quæ uterum ferebat, in publico, ubi ad ludibrium vulgi erat exposta, abortire coacta jaetabatur? Quid? ipsum ejus supplicium nonne conjunctum fuit cum evidenti testificatione divinæ de his rebus voluntatis? Etenim Liborius, qui, ut demonstravi, Prætore, quem à Principe creari mos est, excluso, summam sibi in puniendis delictis potestatem arrogabat, **vii.** Kalend. Martii anni **M D C I V.** in opem civem Paderbornensem Jodocum Dulmanium, miserrimè, & obscenissimè tortum, præcipiti sententiâ, de infelici ligno, quod nuper ipse posuerat, suspendit. Altero post mense, pridie Kalend. Maii, cùm Liborius meritas poenas daret, hic ipse suspensus, manare palam ubertim ex ore, naribus, manibus, pedibus, oculis recentem sanguinem, ipsum sesquidiem, clarè à tota multitudine est visus. Acceslit quoque ad spectaculum Illustris Frisiæ & Ridbergæ Comes, tantæ rei gravissimus testis, tuque ipse, Princeps Illustrissime, adhibito tabellione, & idoneis testibus, rem publicis tabulis mandari jussisti. Quæ res documento sit omnibus, ne aduersus magistratus legitimos, & Principes temerariam plebem commoveant: ne alieni sanguinis sint appetentes: ut suo dolori, & insolenti vindictæ cupiditati frenos injiciant: ut homines se meminerint, inter homines versari. Sed nimirum, Princeps Sapientissime, grave tibi & lucretiosum visum est, hoc, è tam tristibus, & cruentis exemplis, tardum nimis discendi genus. Mavis jam indè à prima pueritia sic informari cives tuos, ut **D E O**, Rationi, Magistratibus, Legibus, Parentibus morigerari, comprimere appetitiones, domare iracundiam, omnibus se virtutibus & bonis artibus ad Reip. salutem, commoditatemque exornare consuescant.

CAPUT V.

Illusterrimum Principem, in Academia instituenda, Ecclesiasticorum, & Religiosorum hominum commodum & dignitatem spectasse.

Præcipuum verò tibi, Princeps Illustrissime, studium semper fuit, ne ea pars gregis C H R I S T I, quæ eximiam quandam vitæ sanctimoniam profitetur, nullis, quæ quidem cum suo more & instituto congruerent, commodis, vel ornamenti careret. Quoniam verò omnes Ecclesiastici ordinis viri, in eo præcipuum quandam sunt gloriam adepti divinitus, quod divinam illam mensam, in qua Agnus D E I qui tollit peccata mundi, situs est, circumstant, atque, ut alicubi loquitur D. Gregorius Nazianzenus, *appropinquant ad appropinquantem Deum*, propterea magnis largitionibus, & impensis eos ad dignitatem tanti sacramenti complectendam animo, & dignâ pietate colendam excitare studiasti. Itaque constituto annuo vestigali in primis lauto & magnifico, solennem ejus pompam, quæ post Pentecosten quotannis instituitur, celebriorem augustioremque reddidisti. Neque eo contentus, nullum prætermisisti in tota tua diœcesi coenobium, quod non perpetuis vestigalibus auxeris, eo pacto, ut quoniam à plerisque hâc tempestate non, quanti par est, fieret illa victimâ sancta, quâ deletum est chirographum, quod erat contrarium nobis, ipsis curæ esset certis eam, statisque honoribus prosequi. Nullus porrò honor videtur tantum Sacramentum perinde deere, atque ipsorum Ecclesiasticorum, qui ejus administrationi sunt consecrati, morum integritas, atque scientia. Si enim recte & ordine fit in Ecclesia, quod sine lumine nunquam Eucharistia deferatur, ut nempe profiteamur in ea verè esse præsentem eum, qui à sapiente dicitur, *can-dor lucis aeternæ*, ut ait Honorius III. quanto magis elabo-rant. *Sapient. 7. v. 26. Can. Sanè cùm olim de cel. b. Mif.*



randum est, ne qui eam conficiunt, aut certè conficientibus ministrant, Sapientiā, de qua ibi est sermo, vacent? Nam, ut ibidem legimus, *Neminem diligit Deus, nisi eum qui cum Sapientia inhabitat.* ^{Ibid.} *Est enim pretiosior sole.* Qui locus aliquanto est in Græco illustrior, ubi legimus τὸν σοφίαν συνουηδύντα, id est, qui cum sapientia, velut conjugē, habitat. Licet autem nemo justus, quamvis litterarum rudis, sapientiæ sit expers, docet tamen Apostolus, quis sit ille, qui ardentiore quodam amore diligat Sapientiam, nempe: *Qui sine uxore est, solitus est, quæ Domini sunt, quomodo placeat Deo.* Quantum enim cæteri otii in obsequio feminæ, in educatione liberorum, in procuratione rei familiaris consumunt, tantum ei suppeditat ad serviendum præcepto Apostoli: *Attende tibi ipſi, & doctrina.* <sup>1 Cor. 6.7.
v. 32.
1 Tim. 4.</sup> Quemadmodum enim lumen & in se purum quidam atque præclarum est, & naturā suā factum ad alia quoque illustranda: ita hominem Ecclesiasticum, quem C H R I S T U S Dominus lucem mundi non dubitavit appellare, dicit non modo omni erroris, aut flagitiī notā carere, sed etiam vitaे innocentis exemplis, & præstantis scientiæ luce cæteris omnibus viam ad Sapientiam ostendere. Igitur qui sic comparatus est, is demum est, qui sapientiam sole longè clariorem, quasi quibusdam sempiternis nuptiis desponsam, atque devinētam habet. Eiusmodi si omnes essent, qui altaria Christianæ Ecclesiæ circumstant, ejusque opibus aluntur, quis superiorum temporum felicitatem desideraret? Quid enim tot homines tenebrarum, & errorum non discuterent, si cum æternæ sapientiæ luce perinde atque sponsa essent copulati? quis talibus ducibus non omni celeritate ad veritatis arcem convolaret? quis tam abhorrens ab omni studio virtutis, qui non se ipse retexeret? Talium hominum copiam ut haberent majores nostri, sedulò curabant, ut qui ad tam excellens degendæ vitæ genus à D E O vocarentur, it omnibus, quæ cum eo non discrepant, liberalibus artibus expolirentur. Audi enim, Princeps Illustrissime, quid præcipiat Concilium Aquisgranense, sub Ludovico Pio Cæsa-

re,



re, in quo Canonicis vivendi regula è sanctorum Patrum monumentis est proposita, quæ regula cùm in aliis Ecclesiis Germaniæ aliquot sècula, tum in Paderbornensi usque ad Bernardum IV. ejus nominis Antistitem, id est, usque ad annum M C C X X V I I I . viguit. In ea igitur cap. cxxiiii. sic habetur: *Religiosissimè ordinem canonicum servent, & Pralatis suis, ac Magistris honorem debitum humiliter impendant: ut horis canonici divinum officium devotissimè expleant: intus forisque non solum habitu, & actu, sed etiam ipso incessu irreprehensibiles existant: ut non otio vacent, non vaniloquio inserviant, non detractionibus, & cateris vitiorum illecebris incumbant, sed potius aut orationi, aut lectioni, aut quibuslibet Ecclesiæ, aut certè propriis utilitatibus vacent, aut etiam doctrinis sanis, & diversarum artium erudiantur disciplinis, ita videlicet, ut nullus in congregazione inutilis aut otiosus existens, stipendia Ecclesiæ in officio accipiat: ut quotidie ad collationem veniant, ubi & hanc institutionem, & aliarum scripturarum sanctorum lectiones perlegant. De cœnobiosis vero, quis ignorat ea fuisse, quod de Corbeia nostra nominatim legimus, diversoria, & habitacula doctorum, & piorum virorum? qui, ut loquitur D. Augustinus, contemptis ac desertis mundi hujus illecebris, in communem vitam castissimam, sanctissimamque congregati, simul atatem agebant, viventes in orationibus, in lectionibus, in disputationibus: nullâ superbâ tumbidi, nullâ pervicaciâ turbulenti, nullâ invidentiâ lividi; sed modesti, verecundi, pacati concordissimam vitam, & intentissimam in DEUM, gratissimum ipsi munus offerebant, à quo ista posse meruerant. At nostrâ tempestate, postquam Ecclesiasticorum hominum ad alia traductis animis, illæ laudabiles Pietatis & Doctrinæ exercitationes obsoleverunt, nihil est quod mirum, tantam vitiorum colluviem in Ecclesia DEI extitisse. Ubi nunc veteres illi Religionis vindices, & fatores? ubi sacri oratores? Ubi experientes animorum medici? Ubi divinarum litterarum periti? Ubi illi cœlesti quâdam caritate prædicti Antistites? Sed quid hæc sublimiora commemo-ro? quis non totum se fluxis commodis? quis non nefariis volu-*

Gobelinius
stat. 6.
cap. 64.

*Lib. 1. de
morib. Ecc.*

voluptatibus dedit? Quid caussæ esse existimamus? num
eam, quam imperitè & stultè blaterant non minus perfec-
tæ sanctitatis, quām salutaris doctrinæ adversarii Prædi-
cantes? Clamant illi observari non posse cælibatum: plus im-
poni Ecclesiasticis viris, quām corum humeri ferre possint.
Non est ea profectò, non est. Si enim D. Augustini tempo-
ribus, quando, ut ipse narrat, plerumque ad continentiax
clericorum sarcinam subeundam capiebantur inviti, eam
susceptam usque ad debitum finem, Domino adjuvante, per-
ducebant; cur desperent, qui sponte hoc vitæ genus dele-
gerunt, idem sibi proclive fore, si eandem, quam viri illi
sancti, viam insistant? Da mihi hominem à prima pueritia
pietatis officiis, & eruditione omni excultum, cui dulce sit
inhærere contemplationi veritatis, eamque cùm in rerum
naturalium scientia, tum in diviniore, & de cœlo delapsa,
omnibus vestigiis indaget, ac denique eam cognitionem,
non ad quæstum auramve popularem, sed ad unius D E I
Immortalis inflammandum cùm in suo, tum in ceterorum
mortaliū peccatoribus amorem conferat: nego huic homini
otium futurum ad ea cogitanda, sine quibus hi mortaliū
infelicissimi se vivere posse diffidunt. Jam verò, quoniam
aliud mortales in nostrorum temporum moribus intuentur,
nimirum supra fidem eis videntur, quæ de majorum nostro-
rum incredibili sanctitate memorantur. Postquam verò hæc
exempla desierunt, religionis quoque ipsius auctoritas, quæ
plurimum apud rudes animas illis sustinebatur, in dubium
vocari, aut certè non tanti aestimari cœpta est. Ideò vir do-
ctissimus, atque optimè de re Catholica meritus Fredericus
Staphylus Osnaburgensis, negat, præter rectam juventutis
institutionem, aliam superesse, exortas de religione lites sc-
dandi, viam. Adjungam ejus verba, quòd die natali primæ
in Westphalia Academiæ, hominis Westphali, tantâ gloriâ
in Academia Ingolstadiensi nostro sæculo versati non memi-
nisse, nefas propemodum esse videatur. Is igitur in episto-
la, quā Marci Anachoretæ aureos libellos, è Græco ab fe-

*Lib. 2. de
adult. con-
jugiis c. 20.*

p

in



in Latinum conversos, inscribit, & dedicat Petro Canisio Societatis Iesu celebri Theologo, postquam est questus cæteris in artibus non nisi peritorum judicia requiri, in rebus divinis indoctissimum quemque, quod commodum sit, sequi: ad extremum hæc addit. Unicum fuit olim, & satis efficax his malis remedium, auctoritas conciliorum: qua quondam pie-tate sacerdotum apud omnes sacrosancta habebatur, jam propter peccata nostra labefacta est, bellisque in dies magis vilescit, penique deletur apud universos. Sola spes ferme est in puerilibus scholis, ut seminarium Ecclesia, quod in senibus jam emarcuit, in pueris resuscitetur. Hoc adeò consilio, Princeps Illustrissime, non modò jam olim pueriles scholas, verùm etiam hanc Academiam tuis opibus condidisti, quam iecireò iis solis disciplinis consecrari voluisti, quæ Canonicis institutis Ecclesiastico homini sunt permissa. Notum enim est iis juris civilis, & Medicinae tractationem interdici. Fuit scilicet tibi curæ ea studia excitare, ad quæ colenda, refrigerante indiest cælesti caritate, omnibusque questum, & popularem auram spectantibus, pauci sponte appellunt animum.

CAPUT VI.

Propriè dictam Academiam sine Iurisprudentia esse posse.

Verum, Illustrissime Princeps, hic ego, quod pace fiat tuâ, cogor nonnullis rerum imperitis respondere, qui cùm audiunt, necdum tradi in Academia tua Jurisprudentiam, opinantur aliquid ei ad Universitatis nomen deesse. Eos ego non meis, sed hominum juris peritorum verbis hunc errorem dedocebo. Igitur Jacobus Middendorpius Westphalus, Theologiae & Juris scientiâ clarus, libro, quem de Academiis edidit, cùm nomina investigaret, quibus rectè hæc nostra publica gymnasia afficiantur, principio ingressus sermonem.

monem de nomine Universitatis: Recentiorum, inquit, " quidam Scholas publicas, quod auctoritate publica, sive " quod idem ferè est, publicè instituuntur, quidam Univer- " sitates appellare malunt. Non tam quod omnes liberales ar- " tes in eis doceantur, (multæ enim ad certarum tantum disci- " plinarum professionem eriguntur) sed quia Professoribus & " Studiosis litterarum collegium, atque universitatem habere " licet, quod alioqui jure prohibitum est. Petrus item Tolo- " fas doctissimus Jurisconsultus, libro xviii. de Rep. cap. vi.

Sunt, inquit, arbitraria Principibus Ecclesiasticis & secularibus ut *Vide copiosè
Rebus. de
loca, in quibus velint scholas privilegiatas constitui, ita & quas ibi tract. no-
velint tradi scientias, sive omnes, sive certas. Quanvis enim omnes min. q. 6.
habeant commune vinculum, & constituant Encyclopædiam, non ta- n. 13. & in
men sequitur debere in uno eodemque loco simul tractari vel doceri. Possunt enim in diversis disci- §. statui-
ritas privilegiata in Gallia, aut alibi dicetur, si modo privilegia con- mua 2. ad
cessant, quia ibi omnes artes vel studia omnia non tradantur. Sunt in concord.
enim Scholastici & Doctores qui faciunt universitatem, & non di- veritas scientiarum. Possunt adjungi semper scientiarum diversa- rum professores, jam introduc̄tis professionibus, ut iisdem potiantur privilegiis, quibus jam fundatae, non secus quam nova studia aliis locis cum iisdem privilegiis, quibus jam potiuntur antique Academia. Sunt quippe hæc juris positivi, qua mutari & augeri vel tolli possunt arbitrio eorum, qui potestatem habent, maxime novâ ortâ justâ caussâ. Quemadmodum Theodosius & Valentinianus professo- ribus artium liberalium privilegiatis, qui in civitate Romana, & Constantinopolitana docebant, addiderunt professores Philosophie, & legum doctores, & Clemens V. conciliumve Vienense, aliis addi- derunt professores linguarum Arabicæ, Græcæ, & Chaldaicæ. De- nique quoties à Pontificibus, & Conciliis Parisiensiegymna- sium Universitas dicitur? & tamen audi quid de ea narret Bartholomæus Cassanæus in Catalogo Gloriæ mundi: Apud Part. 10.
nos, inquit, tenetur pro prima, & principaliori totius Gallie uni- versitate, quoad Philosophiam, Theologiam, artes, medicinam, & ceteras artes, sed non quoad leges. Quoniam in ea non docentur le-*

ges. Quoniam in ea non docentur leges, nec jura civilia, ut est text.
 in c. super specul. extra de privileg. Quis igitur audeat Paderbor-
 nenfi Gymnasio propterea Universitatis nomen adimere,
 quod ad eundem modum nonnullas Ecclesiasticis personis
 minus consentaneas disciplinas non tractet? Meliusne illi
 norunt cui Universitatis, five Universalis studii nomen tri-
 bui possit, quam Pontifex, & Imperator? Certe Paulus V.
 Pont. in suo diplomate testatur se hoc Gymnasium Pader-
 bornense in Universitatem studii generalis perpetuo erige-
 re & instituere, vultque eam omnibus privilegiis non so-
 lùm ad instar aliarum Universitatum, sed pariformiter, ac
 æquè principaliter in omnibus, & per omnia uti, potiri, &
 gaudere. Ad idem exemplum Imperator, in gymnasium, &
 studium Universale erigit, & decernit, ut in ea gradum seu
 honorem assumentes, gaudent privilegiis quibuslibet, qui-
 bus Universitas Heidelbergensis, Tubingenis, Friburgensis,
 Ingolstadiensis, ac alia studia privilegiata, ac Doctores, Licen-
 tiati, Magistri, Baccalaurei, & Scholastici istic promoti, aut ali-
 quæ dignitate seu gradu insigniti gaudent, utuntur, fruuntur,
 & potiuntur. Qui igitur Paderbornæ negant Universitatem
 propriè dictam esse, ii Jurisperitorum, & summorum Princi-
 pum inscientiam dum videntur fugillare velle, demonstrant
 suam.

C A P U T VII.

*Illusterrimum Principem, condenda Academia, eximiam
 suam in Societatem Iesu voluntatem declarasse.*

Hanc igitur Universitatem (sic enim ipsis quoque Jurif-
 consulis approbantibus, appellemus) Ecclesiæ potis-
 simum commodo, & dignitati institutam, Princeps Il-
 lusterrime, curæ, atque potestati Societatis J E S U commit-
 tendam, tradendamque judicasti. Sic enim tuo rogatu de-
 cernit in suo diplomate Pont. Max. Ipsam Universitatem,
 ac studium generale sic erectum & institutum, curæ, regimi-
 ni,

ni, & administrationi dictæ Societatis, & illius Præpositi Generalis, seu ab eo deputandi, qui totius Universitatis Rektor existat, præfatâ auctoritate (*Apostolicâ*) etiam perpetuò supponimus, & submittimus. Eodem spectat, quod Cæsar jubet eam gubernari, juxta formulam Dilinganæ, aliarumque Academiarum in constitutionibus ejusdem Societatis comprehensam. Etenim B. Ignatius Societatis J E S U Fundator non modò putavit è republ. fore si sui homines unà cum aliis in publicis Academiis versarentur, sed etiam, si ita Deo cordi esset, ut ab aliquo Principe, vel Rep. alicujus Academiæ administratio Societati crederetur, non commisit, ut posteri certas ab eo leges, & instituta desiderarent. Ejusmodi Academiæ sunt non paucæ toto orbe excitatae, quarum primam fuisse accepimus Gandensem à Francisco Borgia ejus loci Duce, qui deinde Societati se adjunxit, primis illis ejus incunabulis fundatam. Secuta est Mamertina in Sicilia, à Joanne Vega Prorege, Caroli V. Cæsaris auspiciis condita. Tum Eborense in Lusitania, fundatore Henrico Cardinali, qui ultimus suæ stirpis Rex postea fuit. In Gallia, ut alias omittam, maximè illustris est Flexiensis, quam Rex Henricus IV. cognomento Magnus, ea in domo, quæ infanti ipsi domicilium fuerat, erexit, ejusque in templo Cor suum condi justit. In Germania nostra primus Otho Truchses Cardinalis Augustanus, Dilinganam Academiam ab se fundatam totam Petro Canisio, Societatique permisit. Eum secutus est Serenissimus Carolus Austrius Archidux, Ferdinandi I. filius, Maximiliani II. frater, qui anno M D L X X X V I . Græcii in Stiria, Academiæ ab se munificè institutæ, ac locupletatæ Societatis homines rectores, & magistros delegit. Quem nuper imitatus est ejus filius Leopoldus Passavensis, & Argentoratensis Antistes, posito Molleshemii in Alsacia publico Societatis Gymnasio. Horum tantorum Principum exemplo, Princeps Illustrissime, cùm hanc Academiam, quæ populis ditionis tuæ æternæ salutis præsidium, & immortale ornamentum esset, meditareris, fecit vetus illa,

*4. Parte
conf. c. 11.
E. seq.*

totque illustribus promeritis testata in hujus Societatis homines benignitas, & gratia, ut non alios ei præficiendos putares. Nimirum ut flumina à modicis orta principiis, quo longius à capite recedunt, hoc majora sumunt incrementa: ita, Princeps Illustrissime, conceptam jam inde ab anno M D LXXX. quo primùm in hanc Urbem pedem attulit, in hanc Societatem benevolentiam majoribus quotannis beneficiis cumulare non desinis. Cujus quidem benevolentiae perpetuos socios, atque confortes habuisti admodum Reverendos, ac Prænobiles Cathedralis Ecclesiæ Canonicos, quibus hæc Societas suorum in hac Urbe commodorum originem, ac progressum, cum summa grati ac memoris animi significatione acceptum se ferre profitetur. Illi enim sunt, qui eam primùm ad spem religionis Catholicæ, vehementer eo tempore laborantis, erigendam huc, ad conciones primùm, deinde ad scholas quoque habendas advocarunt. Illi domum, quæque ad viatum, & cultum pertinent tot Sociis, ac Patribus, quot ante hic versati sunt, quam ad Collegii formam redigerentur, certis vectigalibus, perpetuis attributis, liberaliter & abundè providerunt. Illi gravissimis decretis Societatis famam, & commoditatem contra adversarios, atque adeò, anno M D LXXXIII. contra ipsum quoque Principem, aliter, ac nos de religione sentientem, qui missis legatis, Patribus scholas interdici cupiebat, gravissimis sententiis, decretisque tutati sunt. Denique illud natalibus, & dignitate amplissimum Collegium nunquam desit, societati ara quædam esse atque perfugium: nunquam favere studiis: nunquam labores sublevare: nunquam gratiam, & patrocinium impendere. Itaque hoc natali Academiæ nostræ, Princeps Illustrissime, intelligis opinor officii nostri esse, horum quoque, quibus illa primam quasi stirpem suam debet, amplissimorum, ornatissimorumque Procerum, non sine gratiis, & beneficentiae laude meminisse. Atque cùm omnium semper erit dulcis, ac jucunda memoria, tum verò præcipue illorum, qui primis illis temporibus plurimùm in

accer-

accersenda, fovenda, tuenda Societate laborarunt. In his familiam ducebant Henricus de Meschede Decanus, Melchior à Plettenberg Camerarius, Guilielmus Schilder Scholasticus, quos precamur, ut D E U S immortali felicitate remuneretur. Ex iis verò, qui etiamnum suam nobis lucem impertunt, occurrunt duo hujus Ecclesiæ lumina admodum Reverendi & Nobiles DD. Walterus Brabeck Præpositus, & Arnoldus ab Horst Decanus, qui, ut sunt omni eruditioñis & prudentiæ laude florentes, ita nullum faciunt finem præclara studia suis opibus, & favore adjuvandi, ac propagandi. Ejus adeò rei in Academia, monumentum semper erunt duæ turres, magnis utriusque impensis ita extructæ, ut Academicæ juventus ne pedem quidem inferre possit in Gymnasiū, quin horum præstantissimorum Ecclesiæ Procerum recordetur. Meministi enim, Princeps Illusterrime, ejus dicti, cùm primùm hujus novi gymnasii fundamenta sunt jacta. quo die hi duo Ecclesiæ nostræ summates, in amplificando D E I honore, dignitate Patriæ, commodis juventutis, Principem suum, & Antistitem honesto, jucundoque certamine æmulantes, perpetuum hujus suæ in bonas litteras voluntatis in ipsis quoque saxis, & muris, his turribus ædificandis, monumentum extare voluerunt. Video me jam pridem, Princeps Optime, abuti patientiâ tuâ, qui orfus tibi gratulari, ad Canonicorum coetum deflexerim. sed nimirum non decebat hodie Academiam THEODORIANAM, hoc suo natali, illius splendidissimi Collegii obliuisci, cuius suffragiis factum est, ut Theodorus Theodorianæ Academiæ parens esse posset. Nam cùm inter eos tot essent præstantissimi viri litterarum, Societatis, avitæ religionis omnes amore inflammati, videntur singulari D E I nutu eum Principem elegisse, qui unus cum omnium ardore, ac zelo paria facere posset. Quid enim illi collato studio, communicatisque consiliis ad amplificationem bonarum artium optare potuissent, quod non sit in tuo principatu perfectum? Dolebant quidam arctius Societatem habitare, quām ut plures libe-

liberalium disciplinarum magistros, aliosque divinæ rei operarios capere posset. Tu, Princeps Optime, simulatque ad Ecclesiæ gubernacula accessisti, dedisti operam, ut hunc idoneum maximè sacris functionibus locum nanciseretur. Dolori erat multis piis hominibus hoc D. Joannis Apostoli templum, quod antea fuerat quedam exquisitæ pietatis officina, duodecimum jam annum profanorum artificum strepitu personare. Confestim magno ære ab iis, quibus venundatum erat, redemtum vi. Idus Quinæ. anni MDXCII. Societati tradidisti, eamque donationem Clemens V III. Pont. Max. eodem anno ix. Kalend. Novemb. confirmavit. Desiderari quoque videbatur à nonnullis, ut Societas, in hac Urbe non temporariam duntaxat sedem, sed stabile justumque Collegium haberet. Id verò, insigni accessione ad priora vestigalia factâ, cùm ejus quoque fundationis Clemens Octavus auctor factus esset, non longo intervallo perfecisti. Quid quòd, dirutis veteribus ædibus, quæ erant circum hoc templum, novas, laxas, firmas, & propè, quām ferat religiosorum hominum captus, augustiores, maximis impensis ædificare es aggressus? Itaque cùm hæc Urbs, si ulla alia, sepe vastata, ac fœdata incendiis, veteres illas magnificas, cuiusmodi olim fuisse accepimus, jam pridem desideret, coepit ab hac præsertim excelsa, & quadrata turri, qua Collegium ornasti, nonnihil pristini recuperare splendoris. Nihil dico de bibliotheca cùm aliis, tum præcipue sanctorum Patrum voluminibus perquam ornata: Nihil vel de Organo non minus oculis, quām auribus jucundo: vel de hoc marmoreo pietatis tuæ in ara maxima monumento, quibus rebus hoc templum mirificè decorasti: Nihil de suburbano facello B. Virginis quod Romanum vocant, quod, ut sodalium ejusdem Divæ pietati faveres, tuamque quæ sanè est in Matrem DEI eximia, demonstrares, tuis opibus instauratum, & locupletatum Societati possidendum, curandumque tradidisti. Mihi certè videtur, Princeps Optime, adhuc fuisse inter DEI in te, & tuam in nos benignitatem, jucundum quodam,



dam, decorumque certamen. Nam cùm ille plures, ac plures usque ad hanc ætatem annos tibi largiretur, neque ullum effluere sineses sine aliquo vel in res divinas, vel bonas litteras liberalitatis documento, nimirum diu vivendo, diu vive re meruisti. Inter alia verò gratissimum Societati, & Ecclesiæ in primis salutare illud munus accidit, cùm domum Probationis in hac Urbe Societati, idoneis vestigialibus instituisti, ubi religiosæ militiæ tirones rudimentum ponerent, eamque pietatis ubertatem combiberent, quæ deinde cum bonis artibus conjungentes, ad plurimorum mortalium salutem longè latèque derivarent. Jam videbantur tua in nos beneficia ad id fastigium pervenisse, ut nihil accedere posse videretur, cùm tu, Princeps Optime, ordiris novæ molis fundamenta jacere. Nova sublimiorum doctrinarum professibus alendis perpetua vestigalia constituis: das litteras ad Pont. Max. atque Cæfarem, quibus jus condenda Academiæ flagitas: extruis hoc elegantissimum, commodissimumque gymnasium: quod D E U S bene evenire jubeat: Societati J E S U Academiam Theodorianam tradis atque commendas. Pro quo intelligit illa quidem quantas tibi, Princeps beneficentissime, gratias debeat, sed quoniam hoc ejusmodi beneficium est, quod non solis verborum officiis compensari possit, sed quod acrem industriam, assiduos labores, continuas propè lucubrationes, atque vigilias desideret, D E U M immortalem orat & obsecrat, ut qui tibi hujus instituendæ Academiæ est auctor, idem omnibus qui sunt, quique post aliis erunt in annis, Societatis Professoribus, & magistris eum studendi, docendique ardorem injiciat, eam constantiam, roburque tribuat, eam vim & lumen ingenii, & quod caput est, eas pietatis virtutisque copias, ut semper huic tuæ in divinum honorem, Reip. utilitatem, juventutis commoda præclaræ voluntati aliqua ex parte respondeant.

C A-



C A P U T VIII.

Gratiae Academicæ juventutis nomine.

Quid verò, Princeps Illustrissime, huic florentissimæ
juventuti hodie animi credis esse? quantis incedere
lætitiis? quām faustis te precationibus prosequi? Pa-
lam enim iis litteris, quibus hodiernæ celebrati diem di-
xisti, professus es, eorum præcipuè te utilitati in instituen-
da Academia consulere voluisse. Ubi illud etiam pronun-
cias: Spem omnem instaurandæ, atque ad pristinum decus “
revocandæ Reip. hoc quidem tempore in recta tenerioris “
ætatis educatione positam esse. Quod tametsi aliorum quo-
que sapientum hominum sit judicium, putant sibi tamen in
quodam eximii honoris loco ducendum, quòd à tam laudato
Principe tanti fiunt, ut redintegratio salutis, ac dignitatis
publicæ, ab se potissimum expectetur. Quod si dictum dun-
taxat abs te esset, deberet sanè cuiuslibet quamvis remissi ac
desidis adolescentis animum ad teneram suam ætatem, o-
mnibus, quibus optas, bonis artibus excolendam permovere.
Jam verò postquam perpetuā triginta annorum liberali-
tate, & curā id egeris, ut juventutis studia inflammares, at-
que adjuvares, qui his non movebitur eum meritò lapidem
habendum arbitrantur. Hodiernus sanè dies satis ostendit,
quām sint cùm præteritis tuis meritis, tum hujus Academiæ
fundatione ad omne laudabilem studiorum decus eretti.
Quanquam enim ingenuè confitentur nihil se dignum hâc
tuâ Celsitudine, nihil tuis virtutibus, nihil tot beneficiis præ-
stare posse, tamen non ignari ab arbore, quam nunc primum
plantaveris, ante flores esse repetitum quām fructus; at-
que adeò voluptatem, quām olim fructus sunt allaturi, jam
ex ipsis floribus præcepturum; confidunt fore, ut sua studia,
quamvis tenuia, & quasi immatura, jucunda tibi accident.
Certè parietes, nisi quid me fallit, omni versuum genere con-
vestiti: arcus, atque emblemata plena ingenii: scenæ appa-
ratus:

q. 2

ratus:

124 LIBER III. PANEGYRICI.

ratus: Astronomicæ concertationes à nobilissimis adolescentibus, & Mathematicarum disciplinarum amantissimis suscepimus: Theses de Philosophia naturali propositæ, aliaque de codem genere, illustria quædam emolumenta brevi hanc Academiam allaturam esse Reipub. pollicentur. Atque utinam fieri posset, ut dum stabit, perpetuò te salvo & incolumi frui posset. Sanè experiremur verum esse, quod ab agricultoribus dicitur: *Fertilissimum in agro esse oculum domini*. Nunc, quod proximum est, vota affiduo faciemus, ut Deus immortalis maxima, atque uberrima apud cælestes tuis beneficiis præmia jam nunc comparet, sed quod diutius cum Ecclesiæ, tum huic novellæ Academiæ profis, serò te ad ea fruenda discedere patiatur. Apud posteros verò tuam vicem obibit hæc tua effigies in Gymnasii atrio posita, cui ascribi voluisti: Te affectu, zeloque boni publici quæ Religione, quæ Sapientiæ procurandi, propagandique, Religioni quidem Templum, Sapientiæ verò Gymnasium Academicum, Collegium porrò Patribus Societatis Jesu tanquam fidis utriusque thesauri dispensatoribus aeternum consecrasse. Ex quo cum ea quæ nunc in Gymnasio litteris operatur, tum ea, uti confido, quæ post futura est juventus intelliget: si hanc Academiam florentem videre, si tuæ optimæ voluntati obsequi, si beneficiis gratam gratiam referre volet, nunquam ab officiis religionis ac pietatis, nunquam à doctrinarum studiis, nunquam ab obsequio majorum esse discedendum.

FINIS.



Reverendissimo & Illustrissimo

P R I N C I P I,
T H E O D O R O,

Præfuli vigilantissimo, Domino clementissimo,
Vindici fortissimo, Instauratori munificen-
tissimo, Pio, Felici, Pacifico,

P A T R I P A T R I A E,

*Diœcesis Paderbornensis per annos triginta & quod excurrit
sapientissimè gubernata, bonisque omnibus cumulata*

L. B. M. GRATIAS AGIT.



ARE PATER PATRIÆ (sit enim fas no-
mine vero
Sive tuum studium sive vocare meum)
Jam dudum, Oceano meritorum mersa tuo-
rum,
Et tam multimodis facta beata bonis,
Gestio conceptis testari gaudia verbis,
Quæ memori pridem condita mente gero,
Utque pio meritas promam Tibi pectore grates,
Ingenii totos explicuisse sinus:
Postera ne sæclis olim labentibus ætas
Arguat ingrati criminis esse ream.
Sed simul ac dictura oculos attollere cœpi,
Castra verecundus purpurat ora rubor,
Mens hebet, ars hæret, refugit vox, ora gelantur,
Vincta repantino frigore lingua stupet.

q 3

Qua-

Qualis in angustis luctans siphonibus humor
 Festinando suum saepe moratur iter,
 Fervet in obstructis lymphæ vis incita venis,
 Egressumque sibi, dum petit, ipsa negat.
 Perque arcas magno nitens molimine fauces,
 Unda sibi ipsa moram, non patiendo, facit.
 Sic mihi denfa seges, sic torrens undique laudum:
 Angustum vocis copia claudit iter.
 Nam quæ prima sequar tantarum exordia rerum?
 Quod mihi principium, quis mihi finis erit?

Orthodoxa
Religio in
integrum,
restituta.

Anne quòd errorum spissis erepta tenebris
R E L L I G I O victrix tollit ad astra caput?
 Rellgio liquidis quæ cœli è fontibus hausta,
 Sidera non dubiâ dicit ad alta viâ.
 Lingua mihi intonuit **M A G N I** quam ferrea **K A R L I**,
 Dum pia pro **C H R I S T I** numine bella gerit,
 Indomitosque sacris compellit Saxonas armis.
 Barbara cœlesti subdere colla jugo.

M'fera re-
rum facies
eum ad gu-
bernacula
Principis
vocaretur.

Quam mihi inhumanâ profugus feritate **Quiritum**
 Tertius, clingui tradidit ore, **L E O**.
 Hæresis at dudum Stygiis prorupta cavernis
 Impia in adversum fumpserat arma **D E U M**.
 Monstrum horrendum, informe, cui **I G N O R A N T I A** mater,
 Et **F A S T U S** Pater est, **S E D I T I O Q U E** Soror,
L I B E R T A S nutrix, **R I X A E** comitantur euntem,
J U R G I A Q U E evulsis sanguinolenta comis:
 Illius armigeri **F R A U D E S**, **M E N D A C I A**, **T E C H N A E**,
 Et sacris inhians fæda **R A P I N A** bonis.
 His illa auxiliis, illâ succincta phalange
 Ausa erat æterno bella movere **D E O**:
 Hinc fera barbaries, ruptisque licentia frenis
 Fas omne in vita miscueratque nefas.
 Plebs miseranda sui Pastoris prodita fraude,
 Errabat sevis obvia præda lupis.

Nec



Nec soliti templis indicebantur honores,
 Festaque desierant ritè vetusta colli.
 Calcabat sanctas viætrix audacia leges,
 Jura dabant cæcus pro ratione furor.
 Verum ubi T e votis hominum expugnata piorum
 Admorunt Sacrae fata benigna M I T R A E,
 Cana F I D E S rediit, rediit P I E T A S Q U E, P U D O R Q U E,
 Et malè neglectis debita cura sacriss,
 Ornatus templis, dignatio reddita Mystis,
 Moribus integritas, Legibus obsequium.
 Ad sua palantes revocatae signa K A L E N D A E,
 Certior ut sacrum curreret annus iter.
 Impia Libertas rigidis compressa lupatis,
 Præmia fas, dirum est poena secuta nefas.
 Ferrea inaurescens studiis melioribus ætas
 Falcigeri retulit tempora prisca senis.
 Atque, ut ubi rosei tenerum jubar exserit oris,
 Et sola lucifluo terrea fonte rigat,
 Humida decedunt venienti nubila Phœbo,
 Complicat & furvos nox inamœna sinus.
 Monstraque per cæcas impune vagata tenebras
 Cogit in assuetos lux rediviva specus:
 Haud aliter simulac T u R e lligionis avitæ
 Ætheream celsa promis ab arce facem,
 Concita diffugiunt bipedium portenta luporum,
 Sive tuo gladio territa, sive pedo.
 Hic se præcipiti deturbat ab aggere saltu,
 Et pavidus, nullo terga premente, fugit.
 Ille parum pedibus tanto in discrimine fidens,
 Lassa per obstantes brachia jaçtat aquas.
 Thesea magnanimum plenis veneratur acerris
 Attica probroso libera terra jugo,
 Qui Labyrinthaeos ausus penetrare recessus
 Semivirum forti percultit ense bovem.

*Prae*vorum
dogmatum
satores iussi
faceffire.

Ast

Ast ego, funestis, te Vindice, libera monstris
 Ægiden veneror T E T H E O D O R E meum,
 T E primum rabiem caulis arcente lupinam
 Desuit innocui carnificina gregis.
 Tu sparsos artus laceri conquiris ovis,
 Tu per tesqua vagas devia cogis oves.
 Pascua Tu monstras riguis latissima lymphis
 Hic ubi perpetuo gramine vernal humus.
 Tu rapidos æstus viridi defendis in umbra
 Torrida fiderei dum furi ira canis.
 Tu mala Pœoniis cohibes contagia succis,
 Saucia Tu medicâ corpora mergis aquâ.
 Nec pudor est ægram manibus tractasse bidentem,
 Nec collum fessæ supposuisse pudor.
 Nempe ille ante oculos Pastor T I B I semper oberrat,
 Qui propriâ caras carne saginat oves.
 Illa T I B I vacuam crebro vox personat aurem
 Et nunquam oblio labitur ex animo:
 Si quis amor nostri memori tibi pectore flagrat,
 Hunc pascendo meos exere Petre greges.
 Ergo dum stabili fundata Ecclesia rupe
 Ridebit Stygias non labefacta minas,
 Dum C H R I S T I assertus Numen venerabitur Orbis,
 Dum quis erit veræ religionis honos,
 Hæremon hostem, Fidei T H E O D O R E Patronum
 Te canet æternâ postuma fama tubâ.
 Hæc tua inocciduâ florebit gloria laude
 Clara futura solo, clara futura polo.
 Pax & pu-
 blica tran-
 quillitas
 omni ope
 conservata.

Longevamne canam per terna decennia P A C E M ,
 Copia quam cornu divite larga beat?
 Haud procul hinc ferro Mavors bacchatur & igni:
 Nulla mihi somnos classica pulsâ fugant.
 Squalent finitimi feedis populatibus agri:
 Me tamen in dulci Pax fovet alma sinu.

Flava



Flava Ceres fortis cogens ad signa colonos
 Militia ferrum distinet omne suâ.
 Densa per incanas cædes grassatur aristas,
 Prataque gramineâ florida strage natant.
 Caslide in emerita molitur aranea casles,
 Frugiferam placidus vulnerat ensis humum.
 Splendent attriti glebâ stridente ligones,
 Martiaque in tenebris exedit arma situs.
 Neve quies ullo violetur publica motu,
 J U S T I T I A exerto pervagil enfe cavet.
 Latrones procul hinc, procul hinc vos tollite fures,
 Et quisquis rapto vivere dulce putat.
 Nil vobis, moneo, **T H E O D O R O** Principe, tuti est:
 In vos mansuetas non habet ille manus.
 Ille mei ad clypeum qui Principis excubat ensis,
 Sontibus exitio est, præsidioque probis.
 Nec vos vel precibus, pretio vel fidite, culpam
 Strenua non tardo mox pede pœna premet.
 Hoc vetera, hoc vobis monumenta recentia narrant,
 Quæ passim medio plurima rure patent,
 Pendula ab arboribus radiisque implexa rotarum,
 Debita carnivoris corpora vulturibus.
 At si quis tardas monitis adverterit aures,
 Sentiet illa suo vera fuisse malo.
 Testis **B E C A N O V A** est, tuus est **B E N H U S I A** testis,
 Nunc quoque prædonum sanguine pinguis ager.
 Cùm grassatorum florentes ære catervas
 Lux improvisæ dedidit una neci.
 Ipse adeò è cælo sumptis Vincentius armis,
 Tam pia præsenti prælia juvit ope.
 Ille & limphatos egit terroribus hostes,
 Et rexit nostrâ spicula missa manu.
 Mutant fata vices, & amico Numine, præda,
 Qui prædaturus venerat, ipse fuit.

*Justitia
pacis publi-
ca, inexora-
bilis Vim-
dex.*

*Pœna de
turbatori-
bus publica
tranquilli-
tatis sum-
pta.*

*Anno 1601.
ipso S. Vin-
centii Pra-
donum co-
pia eæ ad
vicum
Venhusen.*

Plu-

r

Plurima viætrici sternuntur corpora ferro,

Plurima Justitiæ victima cæsa litat.

Impia pullati duxerunt funera corvi,

Et saturi lessum concinuere canes.

Nunc quoque transversim cerealibus obvia fulcis

Sæpius agricolas ossa morantur equos.

Inde tibi, PRINCEPS, plaudunt Urbesque Viæque

Ruraque, quod sævo cuncta timore vacent.

Te canit intrepidâ nocturnus voce Viator,

Obscurum tuto cùm pede carpit iter.

Te recinens patula pastor resupinus in umbra

Securas longo carmine mulcet oves;

Te canit in molli projectus gramine messor

Ad vitreas Paderæ lenefluentis aquas.

*Bonarum
artium
studia exti-
tata.*

Ergo iterum pacis PAX aurea suscitat artes,

Et reddit ad solitos musica turba choros.

Ergo iterum, Phœbo restim ducente, Camœnæ

Ad numerum saliunt, ad numerumque canunt.

Westphala Pierias pubes operatur ad aras,

Et litat, Aonio vota probante DEO.

Quæ modò singultim parco lacrymaverat imbri,

Nunc fremit immenso Castalis unda lacu.

Tu, PRINCEPS, Cyrrhæ longæva silentia rumpis,

Ne seneant tacito squalida plectra situ.

Invia Tu nobis Heliconis tfsqua recludis,

Culmina tu facilem sternis ad alta gradum.

*Gymnasium
acadifica-
tum.*

Tu pridem exulibus, Meccenas optime, Musis

Principe magnificam condis in urbe domum.

Tu primùm SOPHICO palmam proponis AGONI

Cingat ut emeritum laurea ferta caput.

*Gradus &
honores A-
cademicæ.*

Per te, quo stimulet Virtutis amantia corda,

Nobilis ingenuum gloria calcar habet.

Tu vastum ingenii aperis felicibus æquor,

Tota ubi dent placidis vela ferenda Notis.

Per

Per T E Naturæ cæcos tentare recessus,
 Et licet ignaras lucis inire vias.
 Quænam cœlestes æternet regula cursus ,
 An supra aſſiduo templo canore ſonent.
 An vaga nocturnis diſcurrant aſtra choreis ,
 An ſiſtant moto ſidera fixa polo ,
 Quam variæ cæli cingant præcordia zonæ ,
 Et ſua quo ventos ubere mater alat.
 Anne Cyteinis pudeſiat Cynthia rhombis ,
 Queiſve ſui maculis inquiet oris ebur.
 Cur falsoſ pelagus fluſtus , cur flumina dulces ,
 Perpetuas fontes ejaculentur aquas.
 Aut quis , ne infestis terras ſuperobruat undis ,
 Temperet undofi cœrula fræna maris.
 Cur gravis excuſis immugiat ignibus æther ,
 Miſtave cum liquido ſanguine ſaxa pluat.
 Aut quæ perpetuent Ætnæas pabula flamas ,
 Quidve flagrans rutilo crine cometa vehat.
 Quid quòd & arcanæ penetralia Theologiae
 Aupſiciis , Princeps , ſunt reſerata tuis ?
 Quid quòd Westphalicas duce Te remeavit in oras
 Sancta Palæſtino cognita lingua Syro ?
 Et ſacra diviniſ intexta oracula libris
 Dulcius ex ipſo promere fonte licet ?
 Quid memorem celiſ ſpectandas turribus A R C E S ,
 Et tantum Domino tecta minora ſuo ?
 Ornamenta olim pacis , munimina bellī ,
 Sumptibus ad cælum ſurgere juſſa tuis ?
 Hinc N o v a deterso veteris ſqualore ſeneclæ
 Jamque ſuo demum nomine digna D o m u s ,
 Regalem teclis immanibus explicat aulam
 Laxaque formosiſ atria porticibus.
 Quas circum , virides ventis crifantibus undas
 Plaudit laſcivis ſquamea turba choris .

*Philosophi-
ca Mathe-
maticaque
discipline ,
ad huma-
nores artes
adjuncte .*

*Theologia ,
& Lingua
Hebreæ .*

*Dioceſis
ſumptuſis
edificiis &
operibus
communita-
& ornata .
Newhaun
Arx edifi-
cata , horti
non amœni
minus quam
frugiferi
conciuati .*

Flora favet, favet attiguis Pomona viretis,

Certatimque suas utraque promit opes.

Utraque certatim vernantes divitat hortos,

Floribus illa suis, fructibus ista suis.

W e v e l s b u r g *I* solidus domus ardua saxo

Nubila sublimi culmine celsa ferit.

A r x m a- *Hæc olim à priscis (famæ si credimus) Hunnis*

gnificè con- *Post varios Dominum T e sibi legit heros.*

struēta. *Nunc te digna domus, sed erant magalia nuper*

Penè ruinoso semisepulta situ.

Circum Chaoniae texunt umbracula quercus,

Sylvaque vicinas occulit alta feras.

Quasque sub hospitiis celat frondentibus arbos,

Plurima lascivo gutture vernat avis.

* *Colle-* *Nam quid Collegi sacras venerabilis ædes **

gium Socie- *Templaque sublimi conspicienda tñolo?*

tatu Jesu *Quæque statas numeris edis vocalibus horas*

à funda- *Niliacas T U R R I S vincere digna Pharos?*

mentis ex- *Tecta quid augusti memorem visenda Lycae?, †*

citatum, *Et P A T R I A E, & vero tecta dicata D E O?*

Templum *Hanc divina sibi legit Sapientia sedem,*

instaura- *Incolit hos virtus Relligioque lares;*

tum, & vi- *Hic Sophici crebrâ celebrantur gymna de ludi,*

fendis operi- *Docta que nullo bella cruento madent.*

bus orna- *Hic agiles poliunt ad bella forensia lingua,*

tum. *Hic salit à volucris fons pede factus equi.*

† *Ædi-* *Illic facundi splendent Demosthenis arma,*

cium Aca- *Suadaque germano Cecropis ore sonat.*

demicum in *Hic Juvenum ingenuas animi formantur ad artes,*

suis exte- *Hic facilis discit prima elementa puer :*

dras apò *Quamque olim Patriæ præstantibus approbet actis,*

descriptum. *Virtutem à teneris combibit unguiculis.*

statua *Hic T U A Palladii superastans limina Templi*

Principis in *A Polycletæ spirat imago manu.*

Scholarum

vestibulo

eius in bonas litteras voluntatis monumentum.

Prin-

Principe digna sacri majestas eminet oris,
 Ambit honoratas aurea mitra comas,
 Flexile Saranum marmor rugatur in ostrum,
 Et trabea ex humero pendula utroque fluit.
 Quæque tibi vivo est, eadem quoque marmore sculptum
 Pascendi sequitur sedula cura gregis.
 Nam manus una pedum præfert, manus altera librum,
 Ut regat illa pedo, quos docet ista libro.
 Illam post multos aliquis venerabitur annos,
 Verbaque non siccis proferet ista genis:
 Furstenbergiacā, THEODORUS origine, Princeps,
 (Namque illum memini cernere) talis erat,
 Talis erat, neque multum à vivo abludit imago,
 Eheu quod fas sit dicere, talis erat!
 Mente sagax, vultu facilis, cultuque modestus,
 Manabat comi multus ab ore lepos.
 Tum quoque, cùm seris natura fatisceret annis,
 Temporis antiqui gesta referre memor.
 Pacis amans, rectique tenax, nec prodigus æris,
 Et tamen in Patriæ commoda largus erat.
 Oderat immodicos fastus, sed & oderat astus,
 Non affectatæ simplicitatis amans.
 Moribus antiquis, cultor Pietatis avitæ,
 Certus in antiqua Religione mori.
 Non fuit impositis populo gravis ille tributis,
 Aula sed infletas sobria parsit opes.
 Non sibi sed Patriæ genitum se credidit esse,
 Communemque suis civibus esse Patrem.
 Nunc cœlum colis, ô cœlo dignissime Princeps,
 Aspectu frueris nunc propiore D E I.
 Cunctaque Lunai varium subiecta sub axem,
 Despectas oculis inferiora tuis.
 Virtuti imperium si par tibi fata dedissent,
 Tot meritis Orbis vix satis unus erat.

Ingenium
& mores
Principia.

Vir-

r 3

Virtuti si par ævum tibi fata deditissent,
 Sæcula tot meritis vix satis ulla forent,
 Sed nos indigni qui te frueremur eramus,
 O semper magnis Livor inique viris !
 Sic, nisi quæ sero nobis erecta dolemus
 Nos bona, fatali nostra stupore latent.
 At tua nunc pennis peragrat viætricibus orbem
 Gloria non ullo præmoritura die.
 Et si quem vivo Livor subtraxit iniquus
 Post obitum duplici scenore crescit honos.
 Donec sidereis gemmascet floribus æther
 Et peragent solitas noxque diesque vices,
 Dum mare consuetis repetent anfractibus amnes
 Et dubio venti prælia marte gerent.

PASTORIS THEODORE BONI, PATRIÆQUE PARENTIS,
 A grata titulum posteritate feres.
 Hæc & plura tuæ spectator imaginis olim
 Non tacito, Princeps, verba dolore dabit.
 Quo feror? unde abii? quæ me via? quo ve reduceret?
 Quo ruis in vasto cymba minuta salo?
 Ante pererrato lucis pater aureus orbe
 Frena fatigatis ignea demet equis,
 Singula quæm memori liceat destringere versu
 Condita vel sumptu, vel reparata tuo.
 Tu me marmoream quandam THEODORE relinques,
 Testea quæ mihi cum præficereris eram.

* Karol.
 Mag. fund.
 S. Henricus
 benef. pri-
 marius,
 Meinwercus
 & Imadus
 laudatissimi
 præfules
 Ecclesia
 Paderb.

Aurea Tu magni revehis mihi tempora * Karli ,
 Cæsaris Henrici tu benefacta refers.
 In te Meinwerci pietas operosa revixit ,
 Tu verum Imadi præfulis instar habes.
 Ergo quod Henrico Meinwerco, Karolo, Imado,
 Debeo promeritis hoc THEODORE tuis.

I N D E X
I N
P A N E G Y R I C U M.

A.

- A**cademia Paderbornensis fundator Theodorus Episcopus & Princeps Paderbornensis. pag. 1, 2, 85
 Academia Paderbornensis auctoritate Pontificia & Cesarea erecta. 2
 Academias non licet absque summi Pontif. & Imperat. Romani auctoritas condere: quo consilio id constitutum. 23
 Academia Paderbornensis lumen mensque Westphalia. 83
 Academia complures directioni P.P. Soc. Jesus u commiss. 117, 118
 Academia fundationem Episcopum maximdecre. 36
 Academie Germaniae recensire. 29
 Academiam propriè dictam sine jurisprudencia esse posse ostensum. 115, 116
 Academia non magis sine veritate, quam mundus sine sole constare potest. 26
 Adolphus Comes Schaumburgius Archiepisc. Coloniensis discipulus Goelenii. 9
 Agger ab Alisone usque ad Rhenum ductus, à Domitio Abenobarbo structus. 62
 Agrigentini juvenes: vino ebri, tabernam putant in trivem versam. 19.
 Alisonis antiqui Romanorum Castelli situs & descriptio. 60
 Aliso castellum à Romanis contra Tenetos, Uspetas, Bructeros, Marsos, Tibantes, Chattos, &c. constructus. 62
 Aliso primum in potestate fuit Romanorum, dainde Sicambrorum, tum Saxonum, ac denique Francorum. 79, 80
 Aliso à Romanis desertus in Germanorum rursus potestatem venit. 69
 Aliso vigesimo post Varianam cladem anno in potestatem Germanorum venit. 66
 Alisone clima liberna Romanorum. 60, 61
 Alisonis Romanorum castelli amplitudo. 61
 Aliso instauratus à Carolo M. 77, 78
- A**liso castellum & civitas olim, ubi nunc Arz Neukusum sedes Episcopalis. 61
 S. Altmanus primum Scholasticus Paderbornensis, deinde Propositus Aquieragenensis, postrem Episcopus Pataviensis. 45
 S. Altmanus Episcopus Pataviensis una cum Sigebaldo Patriarcha Aquileiensis vice Gregorii VII. Pont. Max. presides Concilio Triburienſi. ibid.
 Andreas Carolistadius & Philippus Melanchthon iudicent juventuti studioſe, ut combustis libris, ſpertoque gymnaſio in opificium diſciplinam ſe dedant. ipſi exemplo preuent. 18
 Angricarius. 74
 Ansgarius, Rembertus, Adalgaricus, Unno, Siegerbertus aliquique Corbeienses monachi Apostoli Borealiū nationum. 5
 Anna Westphal mater Theodori Episcopi & Principi Paderbornensis. 89
 S. Anno Archiepiscopus Colonienſis cum Imago Episcopo Paderborna educatus. 44
 S. Annonis eloquentia in permovendis ad pietatem animis. ibid.
 Aribo Archiepiscop. Moguntinus Paderberna concionatur. 51
 Arminius & Segimerus infidiles Vario ſtruunt, Legiones cadunt. 68
 Arnoldus Burenus Novator, quenam dogmata Apoſtolica fidei per summam injuriam somnia appelle. 16
 Arnoldus ab Horſe Decanus Paderbornensis. 119
 Antonius Liber Susatenſis primus literas in Bataviam invexit ejus discipulus Alardus Amsterodamus Theol. Lovan. 10
 L. Affrenas legatus Vari Alisoni propositus. 66

B.

- S. Bardo Archiepiscopus Moguntinus, Paderborna in feſto Pentecostes fermonem

I N D E X

- vem ad populum faciens , mortem suam
pradicit. 51
- Bellum inter Chernicos & Maroboduum. 68
- Bonifacius, Suibertus, Ewaldi, aliquae discipuli
Theodori Archiepiscopi Dorovernensis. 40
- C.
- C**apituli Cathedralis Ecclesie Paderbor-
nensis in juvandis Soc. Iesu Patri-
bus studium. 113
- Carolus M. partem devita Saxonia offert
Deo institutu Adriani Papa. 81
- Caroli M. castra propè Luppia fontes. 79
- Carolus M. restaurat Eresburg. 77
- Carolus instituit Osnabrigi Gymnasiū , in
quo Latina Gracque litera continuo do-
cetur. 4.5
- Carolus concilium Paderborna celebravit,
Leonem III. PP. ibidem except. 49
- Carolus IV. Imp. hospitio exceptus ab Henrico
Spiegelio Episc. Paderborn. in arce Neuhus-
sana anno 1375. 81
- Caspar Furstenbergius duorum Electorum
Moguntinorum, & Colonensis consilia-
rius. 92
- Conradus Episcopus Monasteriensis, ex fami-
lia Rittergicorum Comitum. 8
- Conradus Goetelius Paderbornensis, Professor
Lovanii in collegio trilingui. 9
- Concordia Academiarum à novatoribus tur-
bata , quarum antea erat mirificus conser-
fus. 22.23
- Constantiensi Concilio interfuerūt Colonensis
Academia Theodoricus de Monasterio
Theologia Doctor ; ex Heidelbergensi
Gymnasio Conradus de Susato , Westphali. 7
- Corbeia olim Gymnasium fuit eorum , qui
ulteriorem Saxoniā , Vandaliam , Da-
niā Christiana fidei praeceptū imbuerunt. 5
- Cordula à Galen , conjux Wenemari Fursten-
bergii, Matrona mira pietatis. 88. ejusdem
devotio erga Christum patientem. 89
- Causa ob quas expedit plures in orbe institui
Academias. 29
- D.
- D**elbrugia Bructerorum ultima sedes. 67
- Discordia gravis senatum inter ac cives
- nonnullos Paderbornenses. 99
- Dogmata quadam fidei ac Theologica sine ad-
miniculo Philosophia bene explicari &
contra hostes Christiani nominis commode
defendi nequeunt. explosi qui id negant. 21
- Druſus Alfonſi conditor ad Albim fluvium
nomen Romanum protulit. 62
- Druso aia in vicinia Neuhausi à Romanis e-
recta , postmodum à Germano milite dis-
iecta. ibid.
- E.
- E**Cclesiam unam duxxat , Academias
plures esse posse ac debere. 28
- In vera Ecclesia solum stabilis veritas , extra
eam falsitas. 23
- Ecclesiastici ordinis dignitas. 110.111
- Elſen vicus non procul Neuhusio , veteri Ali-
fonſi nomen hodieque retinet. 60
- Episcoporum Paderbornensium domiciliū
primum fuit in Urbe Paderborna , postmo-
dum ob discordias cum civibus Neuhausium
translatum ab Episc. securitatis causa. 80
- Equeſter Ordo Teutonicus armis Livoniam
Chriſto subdiuit. 6
- F.
- F**ontium miracula prope Novam Becam ,
Liechtenawum , Veterem Becam &c. in
Dioecesi Paderbornensi. 55
- Formate & litera. earum usus & antiquitas.
unde iis auctoritas aſſici debeat. 25
- Franciscus Episcopus Monasteriensis novatori-
bus favens interceſſione Collegii Cathedra-
li in Episcopatu toleratur à ſummo Pon-
tifice. 16
- Francorum gens unde originem nomenque tra-
xerit. 72.73
- Franci circa Gallieni tempora primū inno-
tuuerunt. 73
- Franci quas terras occupaverint. ibid.
- Franci & Saxones juriſtis viribus epibusque
piraticam exercuerunt. ibid.
- Fridericus Monasteriensis Episcopus Paderbor-
nenſi in gymnasio condiscipulus S. Amonis
& Imadi. 45
- Fridericus Episcopus Monasteriensis fundator
Collegiate Ecclesia S. Mauritii in suburbio
urbis Monasteriensis. ibid.
- Fridericus Furstenbergius Canonicus Mogun-
tinus.



I N D E X.

simus.	92	Hujus avisectorii (prater Anabaptistas) ab-
Fridericus Furstenbergius Satrapa Werlensis.	89	fecerunt Lutheri Academis maladcentis
		infiriam.
Fridericus Furstenbergius Satrapa Bilsteinen-	ibid.	I.
sis.		
Furstenbergica familia origines suas ad Comi-	91	Ignorantia plurimorum malorum causa. 57
tes Oldenburgicos refert.		Ignorantia satellites rebellio, temeritas, fu-
Furstenbergica familia virtutes, & avita de-	88	ror. 83
cora.		Imadus Episcopus Paderbornensis B. Mein-
G.		merci è forore nepos liberales artes Pader-
Ebbardus Truchſtissus Archiepiscopus Co-		borna fuit promovitque. 42
loniensis à fide catholica decifit. 93		Imperatorum Principumque domicilia eadem
Germanicus Drusi filius Alfonsem restaurat.	67	quoque Musarum digna sedes. 48
Germanicus victoriam reportat de Arminio,		Joannis Comitis Ritbergenis zelus fidei, &
non longè à Mindæ. 68		virtus militaris. 104
Godeſchalcus Grefemundus Melschedensis		Joannes Furstenbergius Abbas Sibergensis Or-
Theologus, ejusque frater Theodoricus Me-	7	dinus Clarissimus, Westphali. 89
dicus Clarissimus, Westphali.		Jon. Nigrini Pradicantis Sofatiensis de ſu-
Gratia aetæ Theodoſo Episcopo & Principi Pa-		picio exituque Libori mendacia. 105
derbornensi fundatori Academia Paderbo-		Jordanes Canonicus Osnabrugensis unam in
ne, nomine juventutis Academica. 121.	122	orbe terrarum Parisiensem Academiam
Guilielmus Furstenbergius Ordinis Equitum		eſſe volebat, ſicut unam Eccleſiam Roma-
Tentonicorum S. Maria in Livonia magnus		nam. 27
Magister. 90. ejusdem Principis adverſa		Julianus Imp. vetat Christianorum liberos in
fortuna, captivitas, conſtantia, pietas.	90. 91	Scholis publicis admitti. 25
Guilielmus Schilder Scholasticus Paderbor-		Juventutis recta iſſitutio unicum remedium
nensis. 119		ſedandi exortas de religione lites. 113. 114
Gymnasium Paderbornense Soc. Iesu Pa-		K.
tribus committitur. 96		S. K Unigunda Virgo S. Henrici Imperatoris
H.		conjuſ à Willigis coronatur Pader-
Atumarus & Badurades Episcopi Pa-		borne. 50
derbornensis ex illis obſcibis fuere,		L.
quos à Saxomibz Carolus M. accepit. 5		Iborius Wichardus homo turbulentus &
Hermannus in campo. 7		verſutus faſionis Liboriane caput. 99.
Hermannus de Soldis Osnabrugensis. ibid.		Cum faſcioſis ſui curiam armatus irrum-
S. Henricus & Conradus Imp. Paderborne		pit. 99. 102, & perditionum hominum col-
frequenter ac libenter commorati ſunt. 50		luvie xxv. viriū confiſcum legit. 100
S. Henrici Imp. ſtate magna fuit inter Eccleſias		Iborius popularis facundia & verſutum inge-
Paderbornensem & Bambergensem ami-		nium. 107
citia & coniunctio. 44		Iborius contemnit mandata ſenatus. 101.
Henricus de Coeveldia. 7		Contra appariſores ſenatus viam parat, do-
Henricus de Hervordia. ibid.		mum ſuam armatis hominibus, & machi-
Henricus Meschede Decanus Paderbornensis.	119	nae curulibus iſſruit. ibid. extorquet de-
Henricus de Werlie. 7		cretum à ſenatu. 102. Consul creatur, que-
		rela ejus contra Principem, quem & cupiſ-
		amorem, ibid. Principum aliorum prote-
		ctionem reſpectat, ejus tyrannis. 103
		Iborius vetat frequentari Gymnasium PP.
		Soc.

I N D E X

SOC. JESU.	108	Neubusium à Paderbornensibus civibus in-	
Liborii sclera.	109	cenjum restituit Henricus Spiegelius Episc.	
Liborius dedit à Paderbornè, à Civibus tradi-		& Princeps Paderborn.	
tur Principi. 104. Civem innocentem sus-		80	
pendio necat.	109	Novatores cum ebriosis Agrigentiniis juveni-	
Liborius moritur Catholicus.	106	bus comparati.	
Lovanienstum asperiora olim ingenia à Joann-		20	
ne Brabantia Due qua ratione mitiora		Novatores Francisco Episcopo Monasteriensi	
reddita.	57	persuadere conantur, ut Scholas aperiat	
Ludovicus Pius Casar Haroldum Danorum		Lutheranis.	
Regem à suis amulis regno pulsum Pader-		15	
borna excipit, ibidem generalem conveni-		Novum evangelium cum summo Academia-	
tum instituit.	50	rum odio natum.	
Ludovicus Dringebergius à Paderbornensi		16	
Dioecesi Selestatii in Alsacia Joannis		O.	
Reuchlini, Beati Rhenani, Jacobi Wimphel-		Tho Truchses Cardinalis Augustanus.	
lengii &c. Professor.	10	117	
S. Luderus Erero-episcopus Monasteriensis		Otto Ritbergensis Episcopus Neubusium jam	
discipulus S. Gregorii Traiectensis.	40	tum anno MCCLXXVII. incoluit.	
S. Ludereri epistola de S. Sniberto.	74	80	
Luppespringa oppidum Luppii ortu celebre.	55	P.	
Luppii & Padera unus idemque fluvius.	77	Padernum à Pado dicta.	79
Lutherus Academiarum hostis, illas Anti-		Pader in urbe Paderbornensi diversis	
christi lupanaria, diaboli tabernas, &c.		fonsibus scaturientis descriptio.	54
vocat.	17	Paderborna situs & amoenitas.	53. 54
Sub initia nascentis Lutheranismi gynmasia		Paderborna an vetus Teaderium.	74
nomnulla locis clausa sunt, ac iustitium li-		Paderborna vera origo.	75
teris indictum.	18	Paderborna a Saxonibus condita.	ibid.
Ubi regnat Lutheranismus, ibi literarum est		Paderborna nomen antiquius Carolo M.	74
interitus.	19	Paderborna in vita S. Heimeradi appellatur	
M.		Seedes Regalii.	51
M elchior à Plettenberg Camerarius Pa-		Paderborna aeris salubritate à lue pestifera	
derbornensis.	119	immunis.	56
Monasterium urbs Westphalia ab Anabapti-		Paderbornensis agri fertilitas.	53
starum deliramentis repugnata.	15	Paderborna olim atate B. Meinmerci omnes	
Monumentum Drusi Moguntie, Drusenloch		humaniores litera floruerunt.	43
appellatum.	63	Paderbona hodieque monstrantur ades, in qui-	
N.		bus fama est Leonem PP. à Carolo M. ex-	
N eubusium, Paderborne vicinum, domi-		ceptum.	51
cium Episcoporum & Principum Pa-		Paderbornensis in Synodo totius Westphaliae con-	
derbornensium.	58	senſu Christi fiducie suscepit et.	41
Neubusum eo loco situm, ubi olim Nero		Paderbona grata Caroli M. statio.	48
Claudius Drusus Auguli Privignus ca-		Paderbona Imperatorum in Westphalia do-	
scellum Alissonem contra Sicambros condi-		micilium & grata sedes.	47. 48
dit.	59. 60	Paderbona commoda Academia sedes.	36
Neubusana arcis comparatio cum veteri ca-		Paderbona omnibus illis commoditatibus	
scello Alissonis.	81	abundat, quae ad Academia splendorem	
		requiruntur.	53
		Paderbornensis Ecclesia inter Westphalias Ca-	
		thedrales facile princeps.	37. 38
		Paderbornensis Ecclesia idcirco rubra crux pro	
		insigni relieta, quæd in ea primùm Saxones	
		& Westphali eruentis Caroli præliis com-	
		pulsi,	



I N D E X.

pulsi, sub hoc Christi signo militare coper- runt.	38	Romana fidei desertores, ab uno errore secta- que in alias atque alias subiunte partes opti- monum diversitate rapuntur.	23
Paderbornensis Ecclesia a cateris Westphalia ca- thedralis antiquitate, opibus & provincia- riani amplitudine, clientelisque minime con- cedit.	38	Rodolphus à Langen Eques Westphalus Cano- nicus Monasteriensis cum Mauritio comite Spiegelbergio Canon. Colonensi, & Rodol- pho Agricola literis liberalibus operam dant in Italia sub Francisco Philelpho & Theodoro Gaza viris clariss.	8
Paderbornensis Ecclesia Clerici quo vivendi olim norma usi. 112. Multi viri doctrinā & sanctitate celebres è gymnasio Pader- bornensi prodiere.	43	Rodolphus Langius Canonicus Monasteriensis promotor bonarum literarum.	9
Paderbornensium ciuium in Principem suum inurbanitas excusata.	36	S.	
Paderbornensis diaecesis rebus iis omnibus abundat, que ad humana vita necessita- tem desiderantur.	53	Alentinus Elector Coloniensis studia litera- rum Paderbornea nomihil erigit.	95
Paderbornensis post foundationem Academia erga Principem suum reverentiores.	57	Saltocena oppidum, aquā, unde Sal coquitur, nobilis.	55
Paderbornensium indeos laudata.	57. 58	Saxones Paderbornea sacra Christiana am- plexati sunt.	49
Paderbornensis cerevista præstantia.	53	Saxones baptizati ad Luppia capit.	77
Paderborna obsidione cinguit à Comite Rit- bergico. post triduum deditur.	104	Sicambrorum olim sedes in Diaecesi Pader- bornensi.	60
Parisenis Academie fundatores è Britannia in Galliam à Carolo M. evocati, quid re- quiserint ad locum condenda Academia opportunitum.	52	Sicambrri Rhenum transgressi & ad Vahalim ēn Moſam latè dominati, tandem subju- gata Gallia Francorum regnum condide- runt.	71
Parochorum ignorantia hereticorum insulæ patet.	96	Sicambri pluribus gentibus ex Alisone domi- nati.	72. 73
Petrus Wertheimius ad res novas moliendas primus Marpurgi Monasterium missus.	16	Sicambri sub Francis illustres.	71
Philippus Melanchthon contendit honores A- cademicos iis in gymnasii tribui posse stu- diosis, que auctoritate Summi Pontif. con- firmata non fuerint.	24	Sicambri num stirpites excise sint qui in Dia- ecesi Paderbornensi sedes habuerunt.	70
Philippus Melanchthon ofor Gymnasiorum & Academiarum.	16. 17	Stanslaus Hoſius Cardinalis.	91
Philonis dictum de Athenis.	83	S. Sibertus Boructuarius fidem Christi predi- cat.	74
Popo Paderbornensis Episcopus ex Preposito Bamberensi.	44	T.	
Primi decem Patres Soc. Jesu in universi- tate Pariseni graduati fuerunt.	27	Theodorus Furstenbergius è Preposito Pä- derbornensis Ecclesiæ, ejusdem Episcopatu- mus eligitur. 94. Ecclesiam Paderbornen- sem are alieno gravatam liberat.	ibid.
R Eligio Christiana Paderborna manavit in universam Westphaliam.	38	Theodorus Furstenbergius Episc. & Princeps Paderbornensis Calendarium Gregorianum in sua Diaecesi primus promulgat.	95
Romanorum res ad Alisonom gesta.	64. 65	Theodorus Episcopus ac Princeps Paderbor- nenensis colonia literis operam dedit.	91
Romanum Imperium à Pont. Maximo ad Francos est translatum.	80	Theodorus Princeps confitit fundatque Col- legium Societ. Jesu Paderborna & in- signi bibliotheca adornat.	120
Roma Schola Saxonum instituta prope adem S. Ferri principem.	41	Theodorus Princeps construit suis impensis A- cademiam Paderbornensem, eamque fun- dat.	
		S. 2	

I N D E X.

dat.	120	Urnanus Archiepiscopus Bremensis è collegio
Theodorus Episcopus Vectigalia censusque per-		cathedrali Paderbornensi assumptus. 43
petuos alendis sublimiorum doctrinarum		M. Vinicius Legatus Tiberii. 63
Professoribus è Soc. Jesu confituit. 121		W.
Theodorus Episcopus instituit Paderborna do-		Walterus Brabeck Propositus Paderbor-
mum Probationis pro PP. Soc. Jesu illud-		nenfis. 119
que suā liberalitate fundat. 121		Wenemarus Furstenbergius. 88
Theodorus Furstenbergius male afflictam, &		Wenemarus Horstius Nob. Westph. 9
heresi inquinatam Diocesim Paderbornen-		Wernerus Rollevinctus. 7
sem nactus, ab erroribus repurgavit. 93		Westphalorum indoles docilitasque laudata. 13
Theodorus Princeps templum S. Joannis Apo-		Westphalorum ingenii adjuncta modestia ac
stoli profanatum, are suo redimit & PP.		moderatio. 12
Soc. Jesu attribuit. 120		Westphali alias nationum vitiis non cor-
Theodorus Episcopus & Princeps Paderbor-		rumpuntur, et se diutius inter illas ver-
nensis civiles motus auctore Liborio Wi-		suntur. 13
ebardo Paderborna excitatos componit. 99		Westphalii natura propensa ad literarum studia,
Theodori Principis prudens in diffundenda fa-		& horum amore longinqua loca adaeant.
ctione Liberiana consilium. 101		10
Theodorus Episcopus Paderbornensis quam		Westphali extra patriam muneribus publi-
pacis studiofus, tam in prædones acer, &		cis, consilii Principum, &c. admoventur
in defensionem suorum vigilans. 98		frequenter. 13
Theodorus Princeps prædones Diocesim suam		Westphalica ingenia in celebrioribus orbis A-
incurvantem profligat cadique. 98		cademis flowerunt. 6
Theodorus Furstenbergius Episcopus & Prin-		Westphalorum integritas. 12. Erasmi Rose-
ceps Paderbornensis constructor arcis Neu-		rod. de Westphalorum ingenii judicium. ib.
busane. 81		Westphalia tota merito obstricta Theodoro
Theodori Episcopi ac Principis Paderborn. Fun-		Principi ob fundatam Paderborna Academe-
datoris Academia, modestia commendata.		iam. 32
86		Wewelsburgum arx ab Hunnis, vel contra il-
Theodori Furstenbergii Episcopi & Principis		los constructa. 94. à Friderico Comite
Paderbornensis laudes. 92		Arenbergensi restauratur. ibid. In disti-
Theodorus Archepiscopus Dorovernensis Chri-		nem dynastiarum de Beuren venit. ibid.
sti fidem propagat. 39		Exstruatur à Principe Theodoro Fursten-
Theodorus Archepiscopus omnium scientia-		bergio formâ triangulari. ibid.
rum promus conatus. ibid.		Wesleph depravator Academia Pragensis. 30
Tiberius Drusus frater Sicambros in deditonem		Wicelphi fœdum errorem a Concilio Constan-
accipit. 63		tieniſ damnum, approbat & resuscitat
Tumultuarii fontis descriptio. 55		conatur Ph. Melanchthon. 17
V.		Wintfeldt campus non longe ab Horna oppido.
S. Vicelinus Episcopus Aldenburgensis,		67
Paderborne literis operam navat.		Wireburgi XII. obides Saxonum Christianæ
ejus Sandi vita synopsis, & res præclaræ		fidei dogmatibus imbuti. 40
gestæ. 46		Wexilo Germanus S. Annonis, Archepiscopus
S. Vicelinus Apostolus Holstorianus. 45		Magdeburgensis. 45

Erratum.

Pag. 8. lin. 16. pro Spilenbergio. leg. Spiegelbergio.

